

P. RAMI REGII
PROFESSORIS
DIALECTICÆ
LIBRI DVO.

*Exemplis omnium artium & scientiarum illus-
trati, nō solum Divinis, sed etiam mysticis,
Mathematicis, Phisicis, Medicis, In-
ridicis, Poëticis & Oratorijs.*

Per Rolandum Makilmenæum Scotum.



L O N D I N I,

Excudebat Thomas Vautrollerius.

I 5 7 4.

Cum Privilegio Regie Maiestatis,

P. RAMI EPITAPHIVM.

*Praluxi virtute mea maioribus : artes
Ornari ingenuas, perfacileſque dedi:
Pectus Aristoteli finxi, linguam Ciceroni:
Euclidi ingenium. Quintiliane tibi
Iudicium. Sic vita fuit. Laus una perennis
Vitaque, pro Christo sic potuiſſe mori.*





PIISSIMO AC HV-
MANISSIMO VIRO, ED-
MVNDO DOCVRAODE CHAM-
BERHOVSE, ANGLO, IN COMITATV
Barcherie armigero, honoris & castri Vindeforij
totiusque nemoris eiusdem Vicecomiti fidelissimo,
ROLANDVS MAKYLMENÆVS SCOTVS
foelicem rerum successum in hac vita, & in futura
gloriam æternam precatur.



CUM typographus (vir multis no-
minibus ornatissime) hanc Diale-
cticam P. Rami typis committere
decreuisset, obnixè mecum egit, vt
in prouectorum gratiam Inuétio-
nis & Iudicij præcipua capita, non
solùm Poëtarum & oratorum ex-
emplis (in quibus seligendis plurimùm sudauit author)
sed artium etiam atque scientiarum quotidiano vsu,
planius illustraré. Cuius petitioni honestæ, cum multis
de causis acquiescédum mihi censui, tum maximè quòd
in rapsodiam quandam tunc temporis incidere cōtigit,
quæ huius artis vsu, vt hic describitur, aut nullum om-
ninò esse, aut in Poëtis & Oratoribus mortuum, planè
contendebat. Quod cùm legissem, mehercule dixi, ve-
rum illud video vulgo quod dici solet: scientiam non
habere inimicum alium præter ignorantem. Non enim
A. ij.

quod P. Ramus Poëtarum & Oratorum exemplis sit præcipuè vsus, ob id statim sequitur Dialecticam in alijs nullum habere locum: cùm contrà id imprimis docere conetur, hanc artem esse omnium artium & scientiarum, entis & non entis commune instrumentum. Ipsamet P. Rami verba adferam: Obtestor, inquit, Deum optimum Maximum, vt logicum lumen in bonis & veri percipiendi studiosis ingenijs accendat: tùmque ad ingenuas artes exornandum, tum ad cælestia sacræ doctrinæ mysteria illustrandum magis ac magis augeat. Hic videmus quàm impudenter mortuo insultant, quem viuum etiam inuiti venerari cgebantur. Exempla vero Poëtica & Oratoria (vt ait Talæus) ad illustrandum & demonstrandum Logicæ artis vsum quam illustrissima selegit, Quod Aristoteles (quem vt Deum sequitur) nominatim iubeat octauo Topicon exemplis vtédum esse Homericis, qui Demosthenicis pariter vtédum dixisset, si Demosthenis scripta tum perinde celebrata fuissent. Et Aristorelei præcepti ratio magna prorsus esto Primum puero à Grammaticis & Rhetoricis artibus ad Logicam venienti, Poëtæ & Oratores iam noti erunt, artium sequentium scriptores adhuc ignoti: deinde exempla hæc Poëtica & Oratoria vsum artis dialecticæ talem demonstrant, qualis nempè apud principes ciuitatum & populorū doctores fuit. Sic vsus hic è politica illa Socraticæ & Aristoteleæ Logicæ dignitate ac præstantia deprometur: prætereque fructum Grammaticæ puerilis & ornatus Rhetorici spontè & sine labore consequatur: Vt qui consuefcet politicorū eiusmodi & popularium logicorum more differere, consuefcet inereà etiam non cogitans tamen eorum more & loqui & dicere. His igitur Aristoteleis de causis P. Ramus exemplis illustribus & luculentis vsus est, in quibus Logicus artis suæ veritatem agnosceret, posteaque in perpetuis Poëmatum, & orationum operibus, easdem logicas laudes sibi retexeret, & imitandis alienis exemplis, similibusque

libusque confingendis & commentandis sese exerceret. Sed hæc in defensionem authoris dicta sufficiant: nunc quàm verum sit quod aiunt videamus. Qui hanc Dialecticam P. Rami communem esse negat, illud vel de præceptis artis, vel forma dicant necesse est: sed de neutro verè dicitur. Primum enim, vt Logicæ artis præcepta secundum leges veritatis, iustitiæ & sapientiæ explicantur: id est, vt omnia præcepta Dialecticæ sunt necessariò omninoq; vera, homogenea & cognata, vniuersalia prima siue propria, ita omnium artium & scientiarum documenta vera, homogenea & propria esse debent. Qui primum negat, mendax est, qui secundum iniustus, qui tertium stultus. Deinde forma artis talis est, vt generalia præcedant, specialia sequantur: naturaq; primum primo loco sit, secundum secundo, tertium tertio, & ita deinceps, vt ab vnitatem per media genera ad indiuiduam multitudinem descendatur. Hanc qui in omnibus artibus obseruandam negat, Platonem negat, Aristotelem negat, ipsam rerum animam è medio tollit, histerologiam mirabilem, vsuiq; vehementer ac valdè repugnante introducit. Nil hic falsum, nil alienum, nil improprium, nil sæpius iteratum: vera à falsis, homogenea ab alienis, propria ab improprijs seiunguntur atque separantur. Hæc bonus artifex in sua arte obseruanda curabit: sin minus non est artifex, sed mendax, sed Sophista, sed iuventutis pernicies: Sed dicent fortasse inuentionis vim, & iudicij sapientiam non esse communem: audiant igitur non me tantum, sed viros in singulis artibus præstantissimos. Disputationis disciplina, inquit Augustinus, ad omnia genera quæstionum, quæ in libris sacris sunt penetranda ac dissoluenda plurimum valet: tantum ibi cauenda est libido rixandi, & puerilis quædam ostentatio decipiendi aduersarium. Er Hieronymus enarrans illud Ezechielis capite 25. ait: Quicquid in seculo peruerforum dogmatum est, quicquid ad terrenam sapientiam pertinet & putatur esse robustum, hoc Dialectica arte

*Lib. 2. de doctrina Christi.
Cap. 31.*

subuertitur, ac instar incendiij, in cineres fauillasque dissoluitur, vt probetur nihili, quod putabatur esse fortissimum, quomodo quæso probatur, nisi argumentis aptè dispositis. Idem in commentarijs ad Oseam dixit aliquem etiam ex solis verbis inordinatè prolatis incur-rere in hæresim. Hic videmus, & omnes iusti & pij vi-dent, quàm necessarius sit huius artis vsus in sa-cra pagina: Neminem ritè posse aut vera religionis nostræ dogmata stabilire, aut hæreticorum falsas opi-ones diruere, aut quouis modo quæ ex scripturis colle-gerit, quidue sentiat explicare, nisi qui mediocriter sal-tem sit Dialecticæ patrociniò suffultus. Sed Mathema-tica, an non & ipsa ab hac arte pendet? si demonstret Mathematica vt omnes fatentur, quid quæso demon-strat? an non adiuncta de subiectis nunc per causas? nunc per effecta? quæ per impossibile fiunt demonstrationes, an nō ex dissentaneorū Topicis? Quid iudicij capita ponā, cum omnes propositiones, omniaque genera syllogis-morum adhibear, topicis deductæ sunt? An non vitur definitionibus in substantiali rerum explicatione? & diuisionibus in inueniendis rerum speciebus? Et me-thodum quasi sibi propriam retineat? Hæc Euclidis & aliorum scripta docent, & in huius libri progressu ma-gis apparent. Nunc ad Medicinam veniam, & vnus Galeni verba (ne in re tam manifesta tempus teram) in medium adferam, vt omnes sciant quàm necessa-ria sit differendi ratio, ijs qui Medicinæ cognitionem assequi volūt. Quod autem, inquit, exercitatum requirat in Topicis harum rerum commētatio, apertum esse pu-to. Deinde subiungit: Ego differendi artis rudes & igna-ros, qui homonymiam distinguere nequeunt Pseudodia-lecticos vocare non dubito. Licet enim omnes confusæ cuiusdam Logicæ sint natura participes, tamē vt omnia aptè & distinctè agas, arte opus est, quæ dux certior est quàm natura. Quis adeò perficiat frōtis est, qui se me-dici nomine dignum esse dicat, nisi morborum causas & effecta

effecta cognoscat? subiecta & adiuncta distinguat? Qui enim causas morbi ignorat, vt ait Heraclitus, qui fieri potest vt causas propellat? et nisi dissentaneorum Topica nouerit, quomodo contrarijs (vt volunt medici) contraria curabit? breuiter nisi comparatorum classes exactè tenuerit, quomodo illud Hippocratis assequi potest? Similia an dissimilia sint principio est inspiciendum. Cæterum num Philosophiæ conducat hæc ars, non modo non dubitat Cicero, sed quasi omnibus in confesso reliquit: Licebit, inquit, diligentius cognitis argumentorum locis, non modo Oratoribus & Philosophis, sed iuris etiam peritis copiose de cōsultationibus suis disputare. Et merito: Nam an non subinde iurisperito siue in foro causas agat, siue priuatim consilijs iuuet homines, siue publicè leges profiteatur & enucleet, res obscuræ finiendæ & diuidendæ sunt? Et magistra finiendi & diuidendi res, est Dialectica. Ad hæc quis ignorat iuriscōsulto plurimis in locis res confirmandas & infirmādas esse? At res confirmari & infirmari sine locorum, quos Dialectica monstrat, exacta cognitione non possunt: id quod vel vnus Trebatijs iuriscōsultus arguit, qui cū in Tusculano apud Ciceronem versaretur, & in Aristotelis Topica forte fortuna incidisset, edoctus à Cicerone quidnam Aristoteles in illis libris traderet, valdè institit Ciceroni, vt quæ Aristoteles obscurè de locis Dialecticis scripsisset dilucidius explicaret, rat⁹ id quod res erat, se citra horum locorum cognitionē egrè rebus & probandis & improbandis iuriscōsultum agere posse. Præterea Dialectica iuriscōsulto etiam hoc commodi affert, vt de argumentis quibus vel leges in Pandectarum libris confirmantur, & quibus res suas aduersarius aliquis in foro corroborat, iudicare possit, quàm firma, quàm bellè coherentia sint, quàm appositè ad rem præsentem faciant. Nam Dialectica vt Cicero in partitionibus inquit, docet argumentationem ipsam concludere, quidque ex ijs quæ sumpta sunt, efficiatur: docet & quæ

aut male sumpta sunt, aut male conclusa reprehendere. Sed quid ego singulis recensendis immoror, cum nulla sit disputatio, in qua non aliquis locus incurrat, nulla pars humanæ vitæ neque priuatæ, neque publicæ, quæ vfu Dialecticæ careat, sed forum, sed curia, sed nostra omnium iudiciorû consiliorum, concionum, magistræ Dialecticam habent: ita vt Logica sit omnibus in ocio, in negotio, domi, forisq; in pace & bello dux cogitandi, & iudicandi, regulæque confirmandæ rationis. Sed de his satis, qui enim commoda quæ humanæ vitæ ex Dialectica proueniunt scire velit,

Lybici volet aquoris idem

Discere quam multa Zephiro turbentur arena:

Aut ubi nanigys violentior incidit Eurus

Nosse quot Ionij veniant ad littora fluctus.

Ego vero his rationibus motus quas prius adduxi, singula Inuentionis & Iudicij capita illustraui, exemplis non solùm è sacra pagina allatis, sed è mystica Theologia, Philosophia, Mathematica, Medicina, Iure ciuili. &c vt non solùm puer in Poëtis & Oratoribus huius artis vsum videat, sed diuinus in Theologia, medicus in medicina, singularumq; artium studiosi in suis artibus, hac discant & doceant, hac reprehendant & corrigant, hac confirment & confutent. Quædam in Wecheli vltima editione correxi, sed tribus tantum in locis, idq; iubente authore. Cùm enim aliquot diebus ante actam tragediam publicè inter alia, hanc Dialecticam Lutetiæ prælegerem, & eius consilio, vtpote in sua arte præstâtissimo, quotidie ante meas prælectiones vterer, de tribus illis locis mutandis conuentum est. De varijs alijs locis disputabamus, quæ mutare nolui, quod nihil de eorum dispositione cõcluserit author: de quibus meum iudicium in margine scribendum censui. Sed hoc quicquid sit, vir humanissime, quod parum esse fateor, sub tuo nomine, tuisque

tuisque auspicijs, in lucem prodire volumus: vt cum alia in præsentia non suppetant, grata saltem animi recordatione, nostram erga te voluntatem perspicere queas. Vnùm tamen, finem dicendi vt faciam, te ac lectores quoscunque beneuolos rogo, atque obsecro, hæc munuscula conatusque nostros tam boni consulatis quàm maximè: & à Deo optimo Maximo imprimis optetis, vt hoc lumen Logicum cum diuini numinis gloria & Reipub. commoditate ad omnium artium & scientiarum vtilitatem tendat.

TVI OBSERVANTISSIMVS
Rolandus Makylmenæus.



P. R A M V S
LECTORI, S.



ARCHIMEDES (*Lector*) *spha-*
ra & cylindri rationem (in cuius
inuentione vehementius elabo-
rasset) sepulchro suo incidi vo-
luit. Et quidem si me de vigilis
studijque meis interrogas, sepulchri mei colum-
nam è logica artis institutione desiderem. De
caussa voti respondebunt, primò ad artis accu-
rationem, libri de inuentione argumentorum &
eorum dispositione ad indicandum non solum ab
Aristotele organici, Rhetorici, Physici, sed à Cice-
rone & Quintiliano tam multi oratorij: in qui-
bus uniuersis in duorum libellorum pugnum ra-
tione viâque contrahendis omni studio diligen-
tiâque contendimus, ne qua Logica particula
cuiusquam vel umbra illic cõfusa esset, cuius ve-
ritas non hic expressa teneretur. Atque hac pri-
ma problematis Archimedei conscientia erit. Re-
spondebunt deinde ad Logica vsum, elegantiam,
dignitatem partibus omnibus explicandum ex-
citata Logicis meditationibus, cū populares poë-
tarum, oratorum, historicorum laudes, tum li-
berales & ingenue artes noui corporis noua spe-
cie sui studiosis adolescentiores, præclarisq; do-
tibus

tibus ornatiores & locupletiores facta: ac ne qua
 agrestium procorum proteruita timeretur, sua-
 rum quoque scholarum tanquam liberali custo-
 dia septa & comitata. Hac secunda problema-
 tis Archimedei conscientia erit. Testes igitur isti
 Logicam & veritatem & utilitatem tot dierum
 noctiumque vigilis exquisitam testati de voti no-
 stri causa respondebunt: Teque (Lector) ut
 spero, commonefacient, insanam nescio quam in-
 plerisque omnibus Europae academis alitercandi
 de suis praeceptis sophisticam, Logica & veritatis
 & utilitatis longe dissimilem esse: teque ad ve-
 riora & utiliora praestantissima facultatis studia
 praemiaque inflammabunt. Ecquid verò interea
 turba tam graues obiecta, theatra scenicis pro-
 bris extructa, tribunalia, iudicum poenis mina-
 cia, damnatio tandem foedis ignorantiae calum-
 niaeque notis infamis, è toto Philosophiae regno
 manibus & lingua velut amputatis inaudita
 praescriptio, an exiguam voti nostri causam per-
 hibebunt? Quid cōsecuta per Henricum Regem
 à iudicij tam dementis inuidia liberatio, & in so-
 lidam sanctioris iudicij laudem regia professio?
 Quid postea (cū logicus hic ardor in religio-
 nis causam inuasisset) longè grauissima offen-
 sio, vita salutisque propterea tribus iam bellis ci-
 uilibus iactatio nullamne voti nostri causam in-
 dicabunt? imo verò etiam admonebunt, ut Deo
 Optimo & Maximo gratias habeamus, quod
 studiorum nostrorum cursum hoc tanquam circo

agitari & exerceri, neque tamen vlla metarum
 conuersione frangi voluerit. Ideoque obtestor vt
 logicum lumen in bonis & veri percipiendi stu-
 diosis ingeniis accendat: cūque ad ingenuas ar-
 tes exornandum tum ad cœlestia sacra doctri-
 nae mysteria illustrandum magis ac magis
 augeat: perficiatque vt isto in no-
 minis sui gloriam epigram-
 mate logici epitaphij
 tabula conclu-
 datur.

P. R A M I.



P. RAMI DIALECTICÆ LIBER PRIMVS

DE INVENTIONE.

CAP. I. *Dialectica.*



IALECTICA est ars bene dis-
ferendi: eodémque sensu Lo-
gica dicta est.

Dialecticæ partes duæ sunt,
Inuentio & iudicium. Inuen-
tio est pars Dialecticæ de inueniendis argu-
mentis: Argumentum est quod ad aliquid
arguendum affectum est: quales sunt singulæ
rationes solæ & per se consideratæ. Argumẽ-
tum est artificiale aut inartificiale: Artificia-
le, quod ex sese arguit: est autem primum
vel à primo ortum:

Primum, quod est suæ originis: est que sim-
plex aut comparatum. Simplex, quod sim-
pliciter & absolutè consideratur: Estque cõ-
sentaneum aut dissentaneum. Cõsentaneum
est, quod consentit cum re quam arguit: est
que consentaneum absolutè aut modo quo-
dam: absolutè, vt causa & effectum.

Cicero in prin-
cipio Top. A-
rist. Cap. 1. li.
1. Top. Plato
in Albiciade,
Cratylo, Pha-
dro & 7. de
Repub. Arist.
primo Elench.

Aristo. in 1.
Analytic. 8.
Topi. capi. 1.
3. Rhet. c. 1.
Cice in initio
Topi. Quin-
tillian. in fine
lib. 5. Adra-
sus peripate-
ticus Cicero
in Top. 5. c.
14. lib. 5.

Arist. cap. 2.
primi Rhe. ad
Theodest. &
8. c. ad Alex.
Cice. in orat.
Dialogi, in
partis. in Top.
Quintil. li. 5.
cap. 1.
Arist. 7. c. lib.
1. posteriori.

C A P. I I.

De efficiente procreante & conseruante.

Doctrina generalis causarum tractatur ab. Arist. 11. 12. 13. & 17. cap. post. & in totis Topicis In 2. primis li. Physic. & 2. prima Phil. li.

Arist. 3. Physic. & in Philosoph. 2. c. li. 5. Plato in Philebo, in Hippia maiore. Arist. in Philosoph. c. 1. li. 5.

Causa est, cuius vi res est. Itaque primus hic locus inuentionis, fons est omnis scientiæ: sciri quæ demum creditur, cuius causa teneatur: ut merito dicatur à Poëta:

Fælix, qui potuit rerum cognoscere causas.

Causa est efficiens & materia, aut forma & finis. Efficiens est causa, à qua res est: cuius etsi vera genera nulla nobis appareant, vbertas tamen permagna modis quibusdam distinguitur: Primò quòd procreet aut tueatur. Ouidi. 4. de Remedio:

Ergo ubi visus eris nostra medicabilis arte,

Fac monitis fugias otia prima meis:

Hæc ut ames, faciunt: hæc quæ fecere, tumentur.

Hæc sunt incundi causa cibûsque mali.

Otia si tollas, periere cupidinis arcus:

Contemptæque iacent & sine luce faces.

Postea a se, ponitur efficiens.

NEQUE id solum (pacem habemus & spe gloriæ diuinæ gloriamur) sed etiam gloriamur in oppressi- bus, scientes quòd oppressio patientiam efficiat: Pati- tia verò experientiam, experientia autem spem. Porro spes non pudefacit, quòd charitas Dei effusa sit in cor- dibus nostris per Spiritum sanctum, qui datus est no- bis. Rom. cap. 5. 3.

Deus res omnes conseruat & incitat.

DEVS quidem est vnus, qui & omnium pater. Is au- tem non est, ut quidam existimant, extra mundi admi- nistrationem, sed est totus in ipsa, in toto circulo specu- lator

lator totius generationis, vniuersorum contemplario, qui semper est, & suas facultates deducit ad opus, omnium in celo illustrator operum, mens & illuminatio toti circulo. Pythagor.

Ex motu puncti linea generatur: ex motu lineæ superficies: ex motu superficiei solidum. Hic motus vnius est causa generationis alterius.

HÆC Galeno teste sanitatem pariunt, & partem *Causa efficiens sanitatis & conseruantes.* tuentur atque conseruant. In pueris: lac, musica, motus, ioci. In prouectionibus: frictio, vinctio, diæta moderata & frigida, exercitatio modica, aer ambiens purus, nitidus corporis cultus, excrementorum opportuna vacuatio, abstinencia à venere, vino, & calidis. Deinde magis adultis, qui vigesimum annum superauerunt, labor cibum præcedat: cibus, potus, somnus, venus, omnia mediocria. Lib. 1. & 2. de Sanitate tuenda. Huc pertinent prædictiones, & prænotiones medicæ quibus quid ex quaque causa futurum sit prædicunt.

Eorum quidem quæ generantur in sublimi, primum efficiens, & proprium atque primum orbis est, in quo præcipue sol qui motu & cursu suo dissipat, & conglobat, originis interitusque rerum est causa. Arist. lib. 1. cap. 9. Meteorum.

OBLIGATIONIS causa est contractus: nam ex contractu oritur obligatio: ex obligatione actio. Sophonius domum à Titio emit: ergo Sophonius Titio obligatione obstrictus est. Locatio & Conductio contrahitur consensu: Sempronius dum locatur ei à Titio consensit: ergo Sempronius cum Titio contraxit.

PRIMUM igitur considerandum est, quod nam sit *Regis est liberare tuos officere.* regium officium. Atque illud arbitror constare inter omnes, conuenire eis, vt ciuitatem à calamitatibus liberent, & res eius secundas tueantur, & ipsam è parua magnam efficiant. Isocra. ad Nicoc.

SI QVIS vestrum Athenienses indagare velit, quæ *Effectus legi.* causa sit, quidve efficiat, vt senatus conueniat, vt popu-

*Tolluntur legi
effeſſa, ſub-
blata lege.*

*Leges conſer-
uant Remp.*

*Memoria, ſer-
mones, litera-
rum monumē-
ta quid ſa-
ciant.*

lus in concionem aſcendat, vt iudicia frequententur, vt veteres magiſtratus nouis cædant, vt omnia per quæ vrbs regitur & conſeruatur fiant: leges in cauſa eſſe, & quæ legibus præſtatur, obedientiam inueniet: quæ ſi abrogentur, & pro ſua cuique libidine viuendi licentia detur: non Reſpub. duntaxat intereat, ſed nihil etiam inter noſtram & beluarum vitam interſit. Quid enim ipſum futurum putatis abrogatis legibus: qui vigentibus illis eſt talis? Cùm autem in conſeſſo ſit leges proximè & ſecundum deos conſeruatrices eſſe Reip. decet omnes vos perinde acſi ad collectam complendam ſederetis, obtemperantem illis, vt qui ſalutis ſtipem ferat patriæ, honorare & laudare: contumacem punire. Demoſt. contra Ariſtogenem.

MEMORIA veſtra Quirites, noſtræ res alentur, ſermonibus creſcent, literarum monumentis inueteraſcēt & corroborabuntur. Cic. 3. Catel.

Sic pater & mater procreant: nutrix tuetur: 4. Æneid.

*Nō tibi diua parēs generis, nec Dardanus author
Perſide: ſed duris genuit te cantibus horrens
Caucaſus, Hyrcanæque admorūt ubera tigres.*

SIC PATER 2.

*Commiferat.
à cauſa
procreante.*

VB I eſt zelus tuus & fortitudo tua, multitudo viſcerum tuorum & miſerationum tuarum? mihi continēt ſeſe. Tu enim pater noſter es etiamſi Abraham neſciat nos, & Iſrael non agnoſcat nos: tu tamen Iehouah pater noſter, redemptor noſter, à ſæculo eſt nomen tuum. Eſa. 63. 15.

*Pater ab omni
aternitate fuit
filij pater &
cauſa.*

AB hoc ſummo bono (Deo Patre) ratione quadam hominibus incognita, genitam mentem (filium) tradit Plato, quæ per ſe ipſam exiſtat: in qua videlicet ſunt veræ res, & omnis rerum ſubſtantia, quod & primo pulchrum, & per ſe pulchrum ſit. Proceſſit autem ante
ſæcu-

ſæcula, ab authore Deo promanans, & per ſe genita exiſtens: Porphy. lib. 4. de Philoſ. Hiſt.

VTRVM illud dicam, patrem tuum Trometem ſeruiſſe ſeruitutē apud Elpiam, qui literas docuit ad Theſei fanum, cralliſſis compedibus & ligno vinctum? Aut matrem tuam quotidianas nuptias in fornice apud Calamitem heroem celebrantem, te nobis elegantem iſtam ſtatuum, & ſummum hiſtrionem edidiſſe. Demoſth. pro Corona.

Taxatur. E-chines à cam-ſis generantibus.

MVLIER, quid tibi cum Cælio? quid cum homine adoleſcentulo? quid cum alieno? cur aut tam familiaris huic fuiſti, vt aurum commodares: aut tam inimica vt venenum timeres? non patrem tuum videras: non patruum non auum, proauum, attauum, audieras conſules fuiſſe? Cice. pro Cæl.

Vrget orator cauſis procreantibus.

*Nam pater & mater tui ſunt in inferis,
Fieri nequit frater vt illi germinet. Soph.*

Sublata cauſa, tollitur effectum.

Sic vrbium cæterarumq; rerum cōditores & inuētores vt Romulus Romanæ vrbis conditor, Reges deinde reliqui, Conſules, imperatores, tutores & conſeruatores fuere.

(FILIVS) eſt imago Dei incōſpicui primogenitus omnis rei creatæ. Nam per eum condita ſunt omnia, quæ in cælis ſunt & quæ in terra, viſibilia & inuiſibilia, ſiue Throni, ſiue Dominia, ſiue Imperia, ſiue Poſteſtates, omnia inquam per eū & eius reſpectu cōdita ſunt. Hic filius Dei eſt cauſa creationis omnium rerum. Ex his Paulus æternitatem Filij manifeſtè concludit, quòd cauſa ſuum effectum ſemper antecedere intelligatur. Et eſt, inquit, ipſe ante omnia, & omnia per eum conſiſtunt. Colof. cap. 1. 15.

Filius Dei omnia cōdidit.

*Inuentum medicina meum eſt, opifexq; per orbem
Dicor, & herbarum eſt ſubieſta potentia nobis.*

Cauſa inuenitrix.

Apollo de ſe 1. Metamorph.

CAP. III.

De efficiente sola & cum alijs.

Plato in po-
litico. Arist.
cap. 5. lib. 5.
Philos. & cap.
2. lib. Physi-
corum Cicero
in fato.

Secundo caussa efficiēs sola efficit aut cum alijs. Earumquē omnium sæpe alia principa-
lis, alia adiuuans & ministra. 9. Æneid. Ny-
sus auocat ab Euryalo in se factæ cædis &
culpam & pœnam: quia solus author fuerit:

*Me me: adsum, qui feci: in me conuertite ferrū
O Rutuli: mea fraus omnis: nihil iste nec ausus
Nec potuit ----*

Esai. Cap. 43. vers. 11.

Iehoua est so-
lus Deus: so-
lus Omnipot-
ens, solus Sal-
uator & con-
demnator, so-
lus peccata
remittit.

Ego, ego Iehouah, & non est præter me seruator.
Ego annuntiaui, & seruauī, audire quoque feci, & non
fuit in vobis Deus alienus: vos autem testes mei, dixit
Iehouah, & ego Deus. Et iam à die ego sum, & non est
qui de manu mea eruat: operabor, & quis reuocabit
illud? Hinc illud Iacobi cap. 2. Vnus est legislator, qui
& seruare potest & perdere: & illud Phariseorum: Quis
potest remittere peccata nisi solus Deus?

Vnus solus
creator.

*In veritate est unus, est unus Deus,
Qui machinam cæli solique condidit:
Sed errantes prohi dolor lucro nos homines,
Et recreantes qui incidunt casus graues,
Deos quidem aureos & ligneos,
Et lapideos posuimus, & festos dies
His celebrantes, esse dicunt pios.*

Huc pertinent demonstrationes quamobrem, vbi af-
fectio per primam & solam causam demonstratur de
subiecto, hanc tibi sume pro exemplo:

Propius esse
à nobis est cau-
sa cur stella
nullis micant
radijs.

Quæ propius sunt à nobis, nullis micant radijs:
Stellæ errantes propius sunt à nobis: Ergo nullis mi-
cant radijs.
Sic lunæ oppositio in capite vel cauda Draconis, est so-
lis eclypsæ causa efficiens.

In

In morbis multæ causæ concurrunt: Antisthenes tamē Dælius medicus vel vnam hanc dixit morborum omnium causam, in ciborum varietate ingluuiem.

Ingluuiem variorum ciborum sola morborum causa.

Perpicuum est aliquod primum esse, & vnum quod omnia complexu suo cōtineat, idque cum extra res singulas sit, causam esse & originis rerum, & interitus, perpetuæque mutationis, ipsumque quibusdam hæc ipsa cæteris causam motus dare. Arist. lib. 8. Phys. cap. 6.

Sapientia efficit sapientes sola per se: Beatos efficiat nec ne sola per se, quæstio est. Cic. in Top.

Patria tecū Catilina sic agit, & quodammodo tacita loquitur. Nullum iam tot annos facinus extitit, nisi per te, nullum flagitium sine te: tibi vni multorum ciuium necesse, tibi vexatio, direptioque sociorum, impunita fuit ac libera: tu non solum ad negligendas leges & quæstiones, verumetiam ad euertendas perfringendæque valuisti, quamobrem discede, atque hunc mihi timorem eripe. Cic.

» Solitaria causa cum plerisque & principi-
 » palibus & socijs pro Marcello variè adhibe-
 » tur. Nam bellicas laudes (ait Orator) solent
 » quidam extenuare verbis, easque detrahere
 » ducibus & communicare cū multis, ne pro-
 » priæ sint imperatorum: & certè in armis, mi-
 » litum virtus, locorum opportunitas, socio-
 » rum auxilia, classes, commeatus multum
 » iuuant: maximam verò partem, quasi suo
 » iure fortuna sibi vēdicat, & quicquid est pro-
 » sperè gestum, id penè omne ducit suum. At
 » verò huius gloriæ, Cæsar, quam es paulò an-
 » te adeptus, socium habes neminem: totum
 » hoc, quantumcunque est (quod certè maxi-
 » mum est) totum (inquam) est tuum. Nihil

tibi ex ista laude centurio , nihil præfectus, nihil cohors, nihil turma decerpit: quinetiam illa ipsa rerum humanarum domina fortuna in istius se societatem gloriæ non offert: tibi cedit, tuam esse totam ac propriam fatetur.

Cum alijs.

ELEGANTI causarum gradatione vitur Aposto-
lus ad Rom. 10. 13. Quisquis inuocauerit nomen Do-
mini, seruabitur. Quomodo igitur inuocabunt eum in
quem non crediderint? quomodo autem credent ei, de
quo non audierint? quomodo autem audient absque
prædicante? Quomodo autem prædicabunt nisi missi fue-
rint? Ergo fides ex auditu est: auditus autem per ver-
bum Dei.

1. Causa.

2.

3.

Quæris cur Iudas factus est Christi proditor?

Quia auarus fuit, & fur habens oculos (Io. 12.)

Quia diabolus ad tantum flagitium impulit. (Lu. 23. Io. 13)

Quia Deus iuste punire voluit illius malitiam ante-
cedentem. (Act. 2.)

Maximum est huius Topici vsus apud medicos.

Variæ enim morborum statuuntur causæ efficientes:
vt eorum quæ in caliditatis intemperie consistunt causæ
esse possunt, motus vehemens, putredo, vicinia corporis
feruidioris: vt ignis, balnearum, solis: Ira, vis, lascitudo.
Frigidæ autem ægritudinis causæ esse possunt, frigidorum
propinquitas, ocium, adstrictio. Affectionis autem siccæ:
curæ, vigiliæ, aëris circumfusi siccitas, natationes in a-
qua quæ nitri, aut sulphuris, aut aluminis, aut butiminis
est particeps, & quæcumque medicamenta vim habent
exiccandi, siue intro assumantur, siue foris exhibeantur.
Humidorum autem morborum causæ sunt contrariæ,
veluti ciborum qui humidiori natura constant copia, &
potuum excessus, & omnis viuendi ratio delicatior, &
animi securitas, & balnearum ex aquis dulcibus pluri-
mus vsus, præsertim post cibum: sic & tota vita ociosa,
atque omni labore vacans, & pluuiarum abundantiâ, atq;
omnis

omnis status temporis humidus, & medicamenta quæ humectandi habent potestatem.

Quod si numinis alicuius aut fortunæ vis, aut ducum *Demost. se excusat quod non sit solus causa.* socordia aut vestra Æschines, qui vrbes proditis, improbitas, aut hæc simul omnia summæ rerum tantisper incommodarunt, dum eam subuertissent: quid Demosthenes deliquit? pro Corona.

Earumque omnium:

Quis est Paulus, quis autem Apollos, nisi ministri per quos credidistis, & ut cuique Dominus dedit? Ego *Causa adiuvantes & ministra Apostoli, & Deus principalis.* plantavi, Apollos rigavit, sed Deus dedit incrementum. Itaque neque is qui plantat est aliquid, neque qui rigat: sed Deus qui dat incrementum. 1. Corinth. 3. 5. & Paulo post 4. Cap. ver. 1.

Sic de nobis reputet homo, ut de ministris Christi, & dispensatoribus mysteriorum Dei. Et ibidem. ver. 15. In Christo Iesu per Evangelium ego vos genui.

Pytho Atheniensibus ob res feliciter gestas ipsum admirantibus ac prædicantibus, quod Cotyn regem interemisset: dijs, inquit, habenda est gratia quibus auctoribus hoc facinus præclarum gestum est. Nam ipse nihil aliud quàm manum & operam meam commendavi. Euentus rei in manu Dei est, & huic debetur gratia, si quid feliciter cesserit: Sed interim vult nostram operam accedere. Plutarch. in Politicis.

Consensus in matrimonio est primaria matrimonij causa, per regulam Nuptias consensus, non concubitus facit, sic in actione reali princeps causa est Dominiû: in actione personali, princeps causa est obligatio.

Quod si hæc ego dicere aggrediar, vos a me excitatos esse ad elationem animorum dignam maioribus: Nemo est qui me reprehederet. Nunc ego vestra hæc esse instituta declaro & ostendo, etiam ante me his animis fuisse Remp. cæterum ministerij partem in singulis rebus gestis ad me quoque esse referendam affirmo. Iste autem dum omnium me accusat, & succensere mihi vos iubet,

Demosthenes est tantum minister.

vt qui terrorum & periculorum causa Reipublicæ fuerim: non mihi tantum hunc honorem eripere studet: sed laudationibus etiam vos: & omnem posteritatem priuat. Demost. pro Corona.

Instrumenta etiam in causis adiuuantibus »
connumerantur, quo argumento impius Epicureus disputat mundum nunquam esse factum. 1. de Nat. Quibus enim (ait) oculis » animi intueri potuit vester Plato fabricam illam tanti operis, qua construi à Deo atque » ædificari mundum facit? Quæ molitio? quæ » ferramenta? qui vectes? quæ machinæ? qui » ministri tanti operis fuerunt? »

Heb. 11.

Hic impius Epicurus omnia humano cerebro librauit, neque illud Pythij legisse videtur, quæ in Deo dixit perinde esse dicere ac facere, sed audiat si velit fide non intelligere facta fuisse secula verbo Dei, vt ex his quæ non apparebant ea quæ videntur fierent. Si autoritas non placeat suam audiat Sibyllam:

*At rex supremus qui mundum condidit omnem
Sic factus, fiat factumq. est. Namque locauit
Tellurem circa nigra tartara, dulcèque
Lumen adidit, & celum partes euexit in altas,
Hæc verbo fecit, & sunt protinus omnia facta,
Est planè: siquidem per se parit ipse sua vi.*

Ego ne Titium interfeci inermis cum sum? Vbi gladius &c,

CAP. IIII.

De efficiente per se & per accidens.

*Arist. 5. ca. 2.
Physic.
Idè in Ethicis
ad Nicomachum.*

Tertiò, causa efficiens per se efficit aut per accidens: Per se, quæ sua facultate efficit: vt quæ

quæ natura vel consilio faciunt. Ventorum naturalis efficientia est. I. Æneid.

*Incubuerè mari totùmque à sedibus imis
Vnà Eurúsque notúsque ruunt crebèrque pcellis
Africus & vastos tollunt ad littora fluctus.*

Apud vosmetipsos iudicate, num decorum est mulierem non velatam Deum orare? An ne natura quidem ipsa hoc vos docet, quòd viro quidem, comatum esse dedecori sit: Contra mulieri, comatam, gloriæ sit? Nam coma pro velamine data est ei. I. Cor. II. 13.

Latus est hic cāpus apud medicos & Philosophos: omnia enim elementa, orbes, plantæ, stellæ, cælum denique ipsum, vi quadam ingenita & inata agunt. Sic ignis vrit sol lucet: sic herbæ gemmæ omnesq; res naturales agūt, ipsius videlicet naturæ vi. Omnia meteora, pluuia, nix, grando, tonitrua, turbines, fulgura: omnia terrestria, arbores, herbæ, aquarum scatebræ, & quæ in immēsis terræ visceribus crescunt, ferrum, æs, aurum, huius naturæ conatu atque opera producuntur: prætereà arteriarum & cordis motus sunt naturæ opus: singularum partium actiones, attrahere, concoquere, retinere & expellere.

Est enim (iudices) non scripta sed nata lex: quam non didicimus, accepimus, legimus: Verùm à natura ipsa, arripuimus, hausimus, expressimus: ad quam non docti sed facti, non instituti, sed imbuti sumus, vt si vita nostra in aliquas insidias, si in vim, in tela aut latronum aut inimicorum incidisset, omnis honesta ratio esset expediendæ salutis. Cicero.

Quæ iure illo fiunt, quæ natura omnia animalia docuit, sunt naturæ effecta, & horū omnium est natura causa. Huiusmodi sunt maris atque fœminæ coniunctio: Liberos procreatio & educatio: nos & quæ nostra sunt tueri atque defendere. Natura mas fœminæ amore & cupiditate capitur: ergo verissimile est Titium etiam

Berthæ amore & cupiditate captum fuisse.

Consilij exemplum est illa Ciceronis de se confessio. Suscepto bello, Cæsar, gesto etiam magna ex parte, nulla vi coactus, iudicio meo, ac voluntate ad ea arma profectus sum, quæ erant sumpta contra te.

EGRESSI sunt itaque vniuersa synagoga filiorum Israël à facie Moseh. Veneruntque omnis vir cuius cor eleuauit ipsum, & omnis cuius spiritus erat spontaneus apud ipsum, attuleruntque oblationem Iehouæ apud opus tabernaculi ecclesiæ, & ad omne opus eius, atque ad vestes sanctitatis. Venerunt, inquam, viri cum mulieribus, omnis spontaneus corde, attulerunt fibulas, &c. Omnes voluntario ad Iehouam munere fungebantur. Exod. 35. vers. 20.

Ratione quoque & consilio liberæque voluntate agunt Angeli, Archangeli, omnésque cælicolæ & imprimis Deus.

Sic homo est efficiens causa contractus alicuius.

Vos si vt homines negotia cōsiderare vultis, felicitissimam è meis consilijs vrbein esse factam reperietis: sin quæ Dij soli eximia tenent vos consequi postulatis, ea quæ fieri nequeunt affectatis. Demost. Epist. 4.

Qui data opera aliquid mali agunt, non moerentur veniam. Hinc illud Demosthenis aduersus Timocratem. Iam Timocrates quoniam & clanculum & subitò, & contra leges, istam legem in cæteras intrusisti, potius quàm tulisti, omnem tibi postuladæ veniæ causam admisti. Nam eis qui peccant inuiti, venia cōcedi debet, non eis qui de industria ex insidijs delinquant, id quod te nunc facere constat.

Hic Medici & Phisici latè spaciantur. Actiones enim aliæ sunt naturales, de quibus prius diximus: aliæ quæ voluntate, & spontè ab anima fiunt. Iacere telum volūtatis est: Item surgere, loqui, & respirare.

Per

Per accidens efficit caussa, quæ externa facultate efficit : vt in his, quæ fiunt necessitate vel fortuna : necessitate, cum efficiens vi cogitur ad effectum, qualis est Pompeianorum excusatio. At mihi quidem (ait Orator) si proprium & verum nomen nostri mali quæ- ratur, fatalis quædam calamitas incidisse videtur & improuidas hominum mentes occupauisse : vt nemo mirari debeat humana consilia : diuina necessitate esse superata.

Hic necessitas pro violentia accipitur, iuxta illud Eueni. Omne necessarium, res violenta est. Porro magnum est discrimen inter necessitatem & violentiam: multa enim diuina prouidentia facimus, quæ nulla vi coacti facimus. Etenim si Euangelizem, inquit Paulus, non est quod glori-er: necessitas enim mihi incumbit. vñ autē mihi est, nisi euangelizem. Nam si volens hoc faciam, mercedem habeo : sin inuitus, dispensatio credita est mihi. 1. Cor. 9. 16.

Neque quicquam interea mali & damni patietur antequam

Ipse suam terram conscendat. Deinceps autem

Patietur quacunq; fatum, parcaque graues,

Iam nato nerunt filo, quando ipsum peperit mater. Odyss.

Huc referri potest cū dicimus nos inuitos ad aliquid faciendū coginisi in grauiora velimus incidere pericula. Hoc pacto docet Christus à necessario, Iohā. 3. eos qui suam fidem in Christo testari velint, oportere Baptismi signaculum accipere, mensæ item dominicæ participes fieri. vt, Nisi quis fuerit genitus denuò, non potest videre regnum Dei.

Hinc aliquando sumitur deprecatio, cū nos inuitos aliquid fecisse asserimus, & in causam externam culpam rei reijcimus. Vt si quis dicat : Inuitus pecco, quia Deus me cogit, quam argumentationem Homericus Iupiter in mortalibus reprehēdit tāquam à non causa pro causa

Arist. 3. cap.

lib. 5. Philosa.

& cap. 2. li. 6.

& 7. c. lib. 11.

*Hec heu quam falso mortales numina culpant !
Esse malum a superis affirmant, quum tamen ipsi
Criminibus proprijs homines suis damna crearent.*

Et illud Demosth. Si quem potes Æschyne, qui sub hoc sole sunt, referre mortalium, qui indemnus & expers olim Philippi nunc Alexandri fuerit dominatus, siue græcorum, siue barbarorum : esto, concedo tibi meam siue fortunam, siue infortunium nominare mauis omnium malorum fuisse causam. Si verò eorum, qui neque me viderunt vnquam, neque vocem meam audierunt, multi multa acerba sunt perpeffi, non modo viritim, sed & totæ vrbes & gentes, quanto est æquius & verius omnem, & par est, mortalium communem fortunam, & impetum quendam rerum grauem, & alium quam oportebat, horum causam existimare ? quibus tu omisiss me qui tali statu rerum gessi Remp. criminaris: idque cùm scias, si non totum, partem saltem conuitij conuenire in omnes & in te maximè Demosth. Pro Corona.

Multum interest in iure ciuili spontè ne agat aliquis, an vi coactus, Nam vt ait Demosth. Siquis volens damnum dederit, duplum : si inuitus, simplū pro dato damno soluere iubetur. Neque ijs qui inuiti benefaciunt referenda est gratia, iuxta illud:

*Si iniusta in illum est omnis iracundia,
Qui quempiam laesit per imprudentiam;
Non est habenda ei ulla iure gratia,
Necessitate qui coactus profuit.*

*Arist. 5. & 6.
cap. 2. Physic.
& 7. cap. 11.
Philos. Pli-
nius lib. 7. Ci-
uic. 3. de Nat.
deorum.*

Fortuna est causa per accidens, quando præter efficientis scopum aliquid accidit. Sic casu fortuito (ait Tullius 3. de Nat. Deorum) Phereo Iasoni profuit hostis, qui gladio vomerem eius aperuit, quam sanare medici nō poterant.

H v i s Topici nullus vsus est in sacra pagina, nisi fortè hæc mimeticos à Salomone dicantur.

Con-

Conuersus sum, & vidi sub sole quod non est velocium cursus, nec est fortium bellum, sed nec sapientum panis, neque prudentium diuitiæ, neque etiam scientium est gratia: sed tempus & casus accidit omnibus. Quia etiam nescit homo tempus suum: sicut pisces qui capiuntur reti malo, & vt aues quæ capiuntur laqueo, sic capientur filij hominum in tempore malo, quum irruerit super eos repente.

Iacere telum voluntatis esse diximus, sed ferire quem nolueris, Fortunæ est. ex quo Aries ille subiicitur in iuris actionibus si telum manu fugit, magis quàm iecit, Cicero in Topicis.

Multum enim interest data opera aliquid facere & fortuito. Nam Demosth. aduersus Midiam: Leges, inquit, capitalium facinorum, cædes consilio factas, morte, perpetuoque exilio & publicatione bonorum puniunt, qui autem fortuito cædem fecerunt, cum his multo remissius, & humanius esse faciendum sanxerunt.

Arbitror autem, si quis eos ipsos qui in acie steterunt, roget, vtrum existiment se, suapte virtute, an inasperata & impotenti fortuna rem bene gessisse, sui que imperatoris peritia, & audacia, & animositate: neminè ita vel impudentem vel confidentem fore, qui res gestas sibi vendicet. quum igitur rerum fortuna omnium domina euentum suo arbitratu gubernauit, in ijs cæterorum nulli prorsus cum quidem homines fuerint, ignauiz sunt accusandi, Oratio funebris.

In hoc genere caussarum imprudentia cõnumerari solet. Ouid. 2. Trist.

Cur aliquid vidi? cur noxia lumina feci?

Cur imprudenti, cognita culpa mihi est?

Inscius Actæon vidit sine veste Dianam:

Præda suis canibus nec minus ille fuit.

Scilicet in superis etiam fortuna luenda est:

Nec veniam, læso numine, casus habet.

Sic quæ ira commoti facimus, imprudentia quadam fieri dicuntur, & veniam merentur. Sic Demosth. cum Midia agit.

Midias nullam defensionem habet. Quæ causa enim, humana saltem, quæ mediocris excusatio, facinoris illius proferetur? iracundia nimirum, nam hoc fortasse dicet. Nam ad quid aliquis subito, non expectato consilio mentis, facienda impulsus fecit, etiamsi contumeliosè fecerit, per iram tamen esse facta dicere potest: quæ verò dum ante præmeditatus, continenter per multos dies contra leges palàm facere deprehenditur: non modò abest ab eo ut iratus fecerit: sed nemini dubiù iam esse debet, quin de industria datæque opera talis homo contumeliam fecerit.

Ista aliquando etiam in legibus venia donantur, & excusant homines in criminibus: ut si iracundia commotus, conuitia in aliquem congero, si ad me reuersus non porro perseveraui, veniam mereor. Item si propter linguæ lubricitatem contumeliosus fuero in aliquem, non ilicò puniendus sum: nam lubricum linguæ ad penam facti trahendum non est. Sic simplicitas seu imperitia qualis in rusticis esse solet, regulariter excusatur.

Hinc sumitur deprecatio: qualis est pro Ligario: Ignosce pater: errauit: lapsus est: nò putauit: si vnquã post hac? Et paulò post. Erraui: temerè feci: pœnitet: ad clemētiam tuam confugio: delicti veniã peto: ut ignoscas oro. Fortunæ autem nomen ignoratio caussarum confinxit: cùm enim aliquid præter cōsiliū spēmque contigerit, fortuna vulgo dicitur: nec inscitè Iuuenalis,

*Nullum numen abest, si sit prudentia: sed te
Nos facimus, fortuna, deam, calòque locamus.*

Hinc

HINC stultus apud Menandrum in hūc modum argumentatur.

*Adesse semper non decet prudentiam,
Etiam fortuito evenire aliqua oportet.*

Nam Epicurus solebat dicere:

Exigua fortuna interuenit sapienti.

Et Philemon Comicus:

*Fortuna non est nobis usquam vlla dea,
Non est, sed unicuique quod euenerit,
Casus fit, fortuna nobis dicitur.*

C A P. V.

De Materia.

Materia est caussa, ex qua res est. Hoc argumentum ficto, apud Ouid. 2. Metam. solis domus auro, pyropo, ebore, argento componitur.

*Arist. 3. c. 2.
Physicorum.*

*Regia Solis erat sublimibus alta columnis,
Clara micante auro, flammæque imitante pyropo:
Cuius ebur nitidum, fastigia summa tegebat:
Argenti bifores radiabant limine valua.*

Cæsar 1. bel. ciuil. Imperat militibus Cæsar, vt naues faciant, cuius generis eum superioribus annis vsus Britaniæ docuerat: carinæ primum ac statumina ex leui materia fiebant: reliquum corpus nauium viminibus contextum, corijs integebatur.

PRIMVS homo inquit Apostolus, è terra, terrenus. 1. Cor. 15. 47. Formauit Dominus Deus hominem puluerem de humo, Genes. 2. Hinc illa Abrahæ argumentatio Genes. 18. 27. Næ ego audax qui cum domino meo colloquor, cum sim ipse puluis & cinis.

Iesum proposuit Deus, vt esset placamentum per fi-

dem, in sanguine ipsius, ad declarandam iustitiam suam, per remissionem præcedentium peccatorum, ex Dei tolerantia ad declarandam iustitiam suam.

Hic habes nostræ regenerationis causam efficientem Deum patrem : materialem, Christi sanguinem : instrumentalem, qua eam apprehendimus, fidem : finalem denique, ut ipse iustitiam suam demonstret.

Si te inquit Callimachus finxit Prometheus, & non ex alio luto factus es, ne superbias.

Omnis angulus qui continet duas medietates duorum rectorum angulorum, est rectus:

Sed Angulus D cadens in semicirculo A B C est eiusmodi:

Ergo Angulus D in semicirculo A B C cadens est rectus : Arist. 2. Phisic. Euclid. 3. Hic partes toti comparatæ habent materiæ rationem.

Corpora omnia suam habent materiam, siue simplicia siue concreta : stipulæ, faces, capræ saltantes, stellæ traiectæ, flamina, hiatus, fossæ exhalationem : pluuiæ, nubis, ros, pruina, grando, &c. vaporem. Nullus præcessit vapor : ergo pluuiæ fieri non possunt. Stellæ non sunt ex elementis conflata, nihil ergo terreni continent, nec vaporibus aluntur. Omnia quæ oriuntur, generantur & crescunt : Metalla, homines, arbores suam habent materiam.

Morborum varia est materia: humores quatuor, sanguis, pituita, bilis, melancholia : putridus humor, spiritus flatulentus & id genus alia.

Medicamenta omnia suam habent materiam : pharmacæ, potiones, pillulæ. Quis est qui morbum rectè curare potest, nisi prius materiam morbi cognouerit?

Quis pharmacorum æquus æstimator, qui fuerit huius categoriæ ignarus? Illud enim inter omnes constat, pro varietate materiæ alia atque alia adhibenda esse remedia. Non abundat bilis : ergo exquisita tertiana nõ laborat. Vinum & mel non adsunt: ergo nec mulsum fieri potest.

CAP.

CAP. VI.

De Forma.

Causæ primum genus eiusmodi est in efficiente & materia : secundū sequitur in forma & fine. Forma est causā, per quam res est, id quod est: ideóque hinc à cæteris rebus distinguitur : & forma simul cum re ipsa ingeneratur. Anima rationalis est forma hominis quia per eam homo est homo, & distinguitur à cæteris omnibus naturis. Geometricarum figurarum in triangulis, quadrangulis sua forma est: Physicarum cæli, terræ, arborum, piscium sua forma est, vnde præcipua rerum vt natura est, sic erit explicatio, si possit inueniri: vt inartificiosis rebus facilius occurrer. *Cæsar. 7.*

» Muri autē omnes Gallici hac fere forma sunt:
 » trabes directæ perpetuæ in longitudinē, paribus
 » interuallis distātes inter se binos pedes, in
 » solo collocantur: hæ reuinciuntur introrsus &
 » multo agere vestiūtur: ea autē, quæ diximus,
 » interualla gradibus in frōte saxi effarciūtur.
 » His collocatis & coagmentatis alius in super
 » ordo adijcitur, vt idē illud intervallū seruetur
 » neq; inter se cōtingāt trabes, sed partibus in-
 » termis spatij singulæ singulis saxi interie-
 » ctis arcu cōtineātur: sic deinceps omne opus
 » cōtexitur, dum iusta muri altitudo expleatur:
 » hoc cum in speciē varietatēq; opus deforme
 » nō est, alternis trabibus ac saxi, quæ rectis li-

neis suos ordines seruāt: tum ad vtilitatem & defensionem vrbiū summā habet oportunitatem: quod & ab incendio lapidis, & ab ariete materia defendit: quæ perpetuis trabibus pedes quadragenos plerūque introrsus reuincta, neque perrumpi, neq; distrahi potest. Sic forma Virgiliani portus explicatur Æneid. I,

*Est in secessu longo locus: insula portum
Efficit obiectu laterum, quibus omnis ab alto
Frāgitur, inque sinus scindit sese vnda reductos.
Hinc atque hinc vasta rupes, geminiq; minantur
In calum scopuli, quorum sub vertice latē
Æquora tuta silent: tum syluis scena coruscis
Desuper, horretique atrū nemus imminet umbra
Fronte sub aduersa scopulis pendentibus antrum.
Intus aquæ dulces, vinūque sedilia saxo,
Nympharum domus: hic fessas non vincula naues
Vlla tenent: unco non alligat ancora morsu.*

DEVS hominem ad suam, id est, ad diuinam imaginē creauit, Hinc illa Pauli argumentatio.

Vir non debet velare caput, quum imago sit & gloria Dei: at mulier, gloria viri est. I. Cor. II. 7.

Ecquid inquit Euresus Pythagoræus homine præstantius? quid diuinius? an non rerum opifex eum fecit seipso vsus exemplari? tabernaculum quidem est reliquis simile, vt quod factum fuit ex terrena materia, à præstantissimo tamen effectum artifice, qui seipso vsus est archetypo.

Omnis angulus qui habet dimidium duorum rectorum est rectus:

Sed angulus A.B. est huiusmodi:

Ergo angulus A.B. est rectus.

Quod

Quòd rotundum est, in rotundam semper formam accrescit :

Luna autem est rotunda :

Ergo in rotundam semper formam crescit.

Philicorum dogma est celeritatis & tarditatis, formā esse causam. Aristot. lib. 4. cap. 6. de Cælo.

Cognoscendæ sunt medico morborum ac herbarum formæ, & variæ pharmacorum atque excretorum permissiones. Nam pro formæ ac missionis varietate, nunc hoc, nunc illud prænoscit medicus. Vomitus (inquit Hip.) ex pituita & bile permixtus minime est molestus: at meraciores vomitiones deteriores sunt. Prænor. Coacæ.

Interrogatio & responsio est actu continuo facta :

Ergo est stipulatio.

De precio venditor & emptor conueniunt :

Ergo emptio est perfecta.

Scyphus in massam redactus est: Ergo ad poculum amplius non est aptus.

CAP. VII.

De Fine.

Finis est caussa, cuius gratia res est. Physi- Arist. 11. cap. post. & 13. c.
cis rebus finis homo propositus est: homini 2. Physic. & 2. cap. 2. Physic.
Deus. Omnium artium est aliquod summum Plato. 7. de Repub.
bonum & finis extremus: vt Grammaticæ, Arist. 3. c. 8. politic.
bene loqui: Rhetoricæ, bene dicere: Logi-
cæ, bene differere. Iuno. 1. Æneid. connubij
finem assumit, cum Aeolo Deiopeiam polli-
cetur, solatij scilicet prolisq̃ue gratia.

*Sunt mihi bis septem præstanti corpore Nympha
Quarum (quæ forma pulcherrima) Deiopeiam
Connubio iungam stabili, propriamque dicabo,*

*Omnes ut tecum meritis pro talibus, annos
Exigat, & pulchra faciat te prole parentem.*

In defensione Ligarij Cicero Tuberonem accusatorē vrget, cum armorum contra Cæsarem susceptorum finem premit. Et certē (ait) contra ipsum Cæsarem est congressus armatus. Quid enim Tubero tuus ille districtus in acie Pharsalica gladius agebat? cuius latus ille mucro petebat? quis sensus erat armorum tuorum? quæ tua mens? oculi? manus? ardor animi? quid cupiebas? quid optabas:

*Finalis causa
aduentus Christi.*

PROFECTI verò discite quid sit, Misericordiam volo, & non sacrificium. non enim veni & vocarem iustos, sed peccatores ad resipiscentiam.

*Finis humana
vita.*

Hic mea quidem sententia, inquit Posidonius, est rerum humanarum finis: contemplare vniuersorum Deum, & se quoad eius fieri potest, ita instituere, vt nulla in re ducatur à parte animæ quæ caret ratione.

Quamobrem deambulamus? vt valeamus. Non fluctuare cibos in stomacho est vtile ad sanitatem tuendā: id autem efficit deambulatio post cœnam: Deambulatio ergo post cœnam efficit vt valeamus.

Vinum bibim⁹ vt stomacho prosit & animos pariat.

Iusiurandum si postulabitur, duabus de causis dabis, vel vt te ipsum turpi crimine liberes: vel vt amicos è periculis eripias. Isocrat. ad Demonic.

Finis vsucapionis.

Ne rerum dominia in incerto sint est bonum:

Vsucapio autem introducta est, ne rerum dominia in incerto fluctuent: Ergo vsucapio est res valdè bona.

Alicuius rebus perinde prospicere ac suis, est valdè pium: Curator vt alienis rebus perinde ac suis prospiciat, puberibus à magistratibus datur: Ergo curatorem pube-

puerum agere, valdè pium est.

Omnem autem legem, quæ quidem rectè lex appellari possit, esse laudabilem quibuldam talibus argumentis docent.

*In quem finē
sunt leges cō-
dita.*

Constat profectò ad salutem ciuium, ciuicūq; incolumitatem, vitāque hominum & quietam & beatā, inuentas esse leges: eosque qui primū eiusmodi scita sanxerunt, populis ostendisse se ea scripturos atque laturos, quibus illi adscriptis susceptisq; homines honesti beatiq; viuerent.

Ex quo intelligi par est eos qui perniciofa & iniusta populis iussa descripserunt, quiduis potius tulisse quàm leges. Cicer. lib. 2. de leg.

*Fælicitates atque opes dat maximas
Fortuna multis, non quòd illos diligit
Sed de gradu præstantiore ut decidant.*

CAP. VIII.

De effectis.

Effectum est quod è causis existit, siue igitur gignatur, siue corrūpatur, siue modo quolibet moueatur quidlibet, hic motus & res motu facta effectum dicitur: huius loci sunt laudes & vituperationes, quarum pleni sunt libri sacri & profani. Æneid. 6. facta variorum populorum comparantur ad nominis Romani laudem:

*Arist. in Phi-
sica sub no-
mine motus.*

Excudent alij spirantia mollius æra:

Credo equidem, ducēt viuos de marmore vultus

Orabunt causas melius, cœlique meatus

Describent radio, & surgentia sydera dicent.

Tu regere imperio populos Romane memento:

C ij.

*He tibi erunt artes, paci^qq₃ imponere morem:
Parcere subiectis, & debellare superbos.*

Hoc argumento Christus docet se esse verum Messiam. Interrogatus enim, tu ne is es qui venturus erat, an alterum expectabimus? respondit in hunc modum: Profecti renuntiate Ioanni quæ auditis & videtis. Cæci visum recipiunt & claudi ambulant: leprosi mundantur & surdi audiunt: mortui excitantur & pauperibus euangelizatur: & beatus est qui non fuerit offensus in me.

Si non facio opera patris mei, nolite credere mihi: sin verò facio, etiam si mihi nō credatis, operibus credite: vt cognoscatis & credatis Patrem in me esse, & me in eo.

Vos o ignaui primum nos docete quid est Deus, vt impij cū dixeritis fidem meremini, vbi est Deus? an in templis inclusis? pij quidem vos qui Deum in tenebris erigitis. Si nulla Dei erigatur ara, non est Deus: & si non Dei erigatur, Deus est, quasi lapides deorū essent testes.

Imò oportet opera illi testimonium ferre, quale est, sol: nox illi & dies sese in testimonium offerūt: tempora illi testes, terra tota fructum ferens illi testis, Lunę circulus illius opus cœleste testimonium. Hieraclitus Euthicli.

Qua nullis radijs micant propius sunt a nobis:

Stella errantes nullis micant radijs:

Ergo stella errantes propius sunt a nobis.

Arist. Lib. 1. de Demonst. Cap. 10.

Huc pertinent demonstrationes quòd res sit, vbi non ex causa ostenditur effectus sed contra.

Omne quòd defrondescit latiora habet folia:

Omnis vitis defrondescit:

Ergo omnis vitis latiora habet folia.

Arist. Lib. 2. Demonst. Cap. 17.

HO C anno non fuit Lunæ defectus, ergo neque solis & Lunæ directæ oppositio in capite vel cauda Draconis.

Hæc categoria est in maximo vsu apud medicos, non enim morbi causa est semper manifesta, sed ab effectis quæ

quæ in pulsu, respiratione & corporis euacuationibus apparent sæpe cognoscitur.

*Respiratio est iusto frequentior & pulsus crebrior:
Amplior ergo in corpore est collectus calor.*

Quid erat civi Reip. studioso agendum? quid illi qui omni cura & alacritate, & integritate, patriæ consultum vellet? non oportebat è mari Eubea munire Articam? è mediterraneo Beotia? è Poleponeso, locis nostro agro finitimis? non providere ut inuectio frumenti per omnia loca nobis amica usque ad Piræum perveniret? non ea quæ tenebamus, missis tueri præsidij: eiusque rebus quæ eo pertinerent, agendis & dicendis? Proconesum, Chersonesum, Tenedum? non alia conari ut coniuncta & sociata essent: Byzantium, Abidos, Eubæa? non hostibus maximas quas haberent copias eripere? non quæ reipub. deessent ea supplere? Atque hæc quidem omnia vobis perfecta sunt meis decretis & actionibus. Efficax est argumētatio ab effectis, ad causas affirmatiuè & negatiuè.

Huc dicta scriptaque referenda sunt. Pericles & Hortensius benè dicendi laude celebrantur: eodémque argumēto Demosthenes & Cicero etiam bene scribendi. Ad hunc locum referuntur consilia & deliberationes, etiam si omninò ad exitum perductæ nō fuerint. Parmenio & Philotas morte mulctati sunt, quia cōiurationis in Alexandrum essent suspecti: ut Curtius & Arrianus meminerunt. De Lentulo & Cethego alijsque Catilinæ popularibus, Romani Senatus iudicio supplicium sumptum est. Sunt etiam effecta virtutū & vitiorum. Horatius hoc modo ebrietatis effecta describit.

*Quid non ebrietas designat ? operta recludit,
 Spes iubet esse ratas, in praelia trudit inermes
 Sollicitis animis onus eximit, ac docet artes.
 Fœcundi calices quem non fecere disertum ?
 Contracta quem non in paupertate solutum ?*

CAP. IX.

De subiecto.

Argumentum modo quodam consentaneum succedit, ut subiectum & adiunctum. Subiectum est cui aliquid adiungitur. Anima est subiectum scientiæ, ignorantæ, virtutis, vitij, quia hæc præter essentiam accedunt. Corpus, sanitatis, morbi, roboris, infirmitatis, pulchritudinis, deformitatis: homo subiectum est diuitiarum, paupertatis, honoris, infamiæ, vestitus, comitatus. Locus, est subiectum rei locatæ. Sic Philosophi diuinis entibus licet parte & magnitudine carētibus attribuunt locum. Sic geometræ locum locique differentias in rebus geometricis: sic Physici multo etiam diligentius in rebus Physicis considerant, in mundo, in elementis simplicibus, in rebus compositis. Sic Virgilius in Georgicis suum quemque propositis rebus locum deligendum admonet, ut segetibus, arboribus, vitibus, pascuis:

*At prius ignotum ferro quam scindimus aquor.
 Ventos & varium calipradiscere morem*

Cura

*Arist. in Sub-
 stantia, Poste-
 rioribus ana-
 lyticis.*

*Arist. lib. 4.
 Physic. 14. ca-
 pit.*

*Arist. 10. c.
 8. Phys. & 3.
 c. 1. de calo.*

*Cura sit, ac patrios cultusque habitusque locorum:
Et quid quæq; ferat regio, & quid quæq; recuset.
Hic segetes, illic veniunt felicius una:
Arboris foet⁹ alibi, atq; iniussa virescunt Gramina.*

Sensilia sensuum, & res virtutibus ac vitijis propositæ, subiecta vitiorum & virtutum hoc modo nominantur: Color est subiectum visus, sonus subiectum auditus, quia hi sensus in his sensilibus occupantur & exercentur. Virtutes & vitia declarantur in Ethicis hoc argumento: temperantia & intemperantia voluptate, magnanimitas & ignavia periculo: liberalitas & avaritia diuitijs. Sic res numerabilis Arithmeticæ, mensurabilis (vt ita dicā) Geometriæ subijcitur. Eiusmodi subiecto Cic. 2. Agra. disputat, inter Campanos nullam contentionem esse, quia nullus sit honor. Non gloriæ cupiditate (ait) efferebātur, propterea quod vbi honos publicè non est, ibi cupiditas gloriæ esse non potest: non contentione nec ambitione discordes: nihil enim supererat, de quo certarent: nihil quod contrā peterent: nihil vbi dissiderent: Eodem argumento à Propertio dictum est:

Nauiæ de ventis, de tauris narrat arator:

Enumerat miles vulnere, pastor oves.

FUGITE scortationem. Omne peccatum quod fecerit homo, extra corpus est: sed qui scortatur, in proprium corpus peccat. An ignoratis corpus vestrum esse templum spiritus sancti, qui est in vobis, quem habetis

*Corpus hominis
subiectum
spiritus Sancti.*

à Deo, neque esse vestri iuris? 1. Cor. 6. 18.

Posito subie-
cto ponantur
adiuncta.

Quale subie-
ctum tale ad-
iunctum.

Sublato sub-
iecto tollitur
adiunctum.

Deus est, igitur est arx, petra, asyllum, refugium nostrum. Item Deus est, bonus ergo.

Ne mortale odium mortali in pectore serues.

Hoc argumento urgebis eos qui animas mortuorum negant esse, & tamen verentur ne miseræ sint futuræ. Qui enim omnino non sunt, ut ait Cicero, ij ne miseri quidem esse possunt. Talis fuit Axiocus, ad quem Xenocrates Platoniscus.

Vt in Repub. Clistenis & Draconis, inquit, nihil tibi contigit mali, tu enim non eras, circa quem esset malum, sic post mortem nullum tibi aduersum: tu namque non eris circa quem futurum sit malum.

Subiectum in Geometria est res ipsa de qua doctrina est instituta, cuiusmodi sunt trianguli, quadrata, circuli, sphaera, cylindri: & ut summatim dicam, figuræ planæ, corpora solida, denique omnes magnitudines immobiles, & horum termini: Quæ verò his insunt, adiuncta dicuntur, & per axiomata & petitiones, rebus subiectis inesse demonstrantur.

Quod partes nullas habet, nec rectum est nec rotundum: Et quicquid figuræ est particeps, aut rectum aut rotundum est: Quod ergo partes non habet, nullius figuræ est particeps Alcynous ex Permenide Platonis.

Illud etiam absurdum est, aquam in superiori loco cogi, cum nec aqua cogi possit, quàm existat, nec vlllo tempore, nec certo loco manere. Arist. Meteor. Lib. 1. Cap. 12.

Quævis pars affecta est affectionis subiectum, cuius cognitio est imprimis necessaria medico. Nam febris aliam quærit curationem, cum est in spiritu, ut diaria: aliam cum est in venis, ut continua: aliam cum partes solidas inuadit, ut hæctica. Calor præter naturam in corde accensus, solidas partes inuasit: ergo hæctica febre laborat. Animi affectiones & perturbationes, sua dicuntur habere subiecta in corpore, ut caret felle: non ergo irascitur.

scitur. Hucera œdemata & id genus alia requirūt huius categoriæ peritum. Illud enim apud omnes constat, pro natura partis affectæ remedia esse adhibenda.

Si quis rem quæ in rerum natura non est, aut esse non potest, dari stipulatus fuerit: veluti Stichum, qui mortuus sit, quem viuere credebat: aut hippocentaurum, qui esse non possit, inutilis erit stipulatio. Iust. lib. 3. tit. 10.

Si legatus est Titio annulus: ergo & gemma quæ annulo additur legata est. Si charta dono data est: Ergo & aureæ literæ quæ in charta depictæ sunt.

A subiecto loco docet Apostolus Christum esse superiorem Dauide, præstantiorem cunctis angelis, imò prorsus esse Deum, ac Deo patri per omnia equalem. Heb. 1. Ex dicto Dauidis Psalmo. 110. Dixit Dominus Domino meo, sede à dextris meis.

Titius promisit Sempronio pecuniam dare certò loco: an non ergo verisimile est, quòd nullo alio loco, quàm stipulator voluit, illam pecuniam dare possit?

Subiecta sæpenumero sua habent certa adiuncta. Hinc Dauidi offerenti se ad singulare certamen ineundū cū Goliath Philistæo, obijcitur, quòd puer esset planè imbellis. Luc. 2. stupebant omnes super intelligentia & responsis Christi in templo factis, cū duodecim tantum esset annorū. Genes. 18. Postquàm iam vieta sum (inquit Sara) indulgebo credo voluptati, cū meus etiam dominus iam sit senex? Hinc amplificatur ab Apostolo fides Abrahæ. Rom. 4. Quod non sit infirmatus fide, licet ipsius corpus iam esset emortuum,

C A P. X.

De Adiuncto.

Adiunctum est, cui aliquid subijcitur: quod argumentum & si subiecto est leuius, attamē est copiosius & frequentius: Itaque quod de eiusmodi signis ait Ouid. 2. de Remedio:

Arist. in Categorijs.

Cicero in Topicis. Quintil. lib. 5. cap. 5.

*Forſitan hæc aliquis (nam ſunt quoque) parua
vocat:*

Sed quæ non proſunt ſingula, multa iuvant.

*Ariſt. in Phi-
ſic. 10. 11. 12.
13. 14. capiti.
lib. 4.*

*Ariſt. cap. 4.
1. Top.*

Animi corporiſque & totius hominis bona
& mala, quæ dicuntur, adiuncta ſunt animi,
corporis, hominis: Deniq; quicquid vlli ſub-
iecto extrinſecus accidit, adiunctum eius eſt:
vt autem locus eſt in ſubiectis, ſic tempus eſt
in adiunctis, duratio nempè rerum, præterita
præſens, futura: omninoque qualitates ſub-
iectis præter cauſſas adiunctæ ſive propriæ ſint,
quæ omni ſoliq; ſubiecto ſemper conueniunt,
vt homini riſus, equo hinnitus, cani latratus:
ſive communes quæcunque non ſunt eo mo-
do propriæ. Hoc genere argumenti Fannium
Chæream Cicero pro Roſcio Comædo ca-
uillatur: Nónne ipſum caput & ſupercilia illa
penitus abraſa, olere malitiam & clamitare
calliditatem videntur? Nónne ab imis vngu-
ibus vſque ad verticē ſummum (ſi quam con-
iecturá affert homini tacita corporis figura)
ex fraude, fallacijs, mendacijs conſtare to-
tus videtur? qui idcirco capite & ſupercilijs
ſemper eſt raiſis, ne pilum vllum viri boni ha-
bere dicatur: Sic Martialis 2. lib. Zoilū ludit,

*Crine ruber, niger ore, brevis pede, lumine luſcus,
Rem magnam præſtas, Zoile, ſi bonus es.*

Sic veſtitus & comitatus res adiunctæ ſunt:
quo circumſtantiæ genere Dido venatum pro-
ficif-

ficiscens, magnificè 4. Æneid. depingitur.

Oceanum interea surgens aurora reliquit.

It portis iubare exorto delecta inuentus:

Retia rara, plagæ, lato venabula ferro:

Massylique ruunt equites, & odora canum vis:

Reginam thalamo cunctantem, ad limina primi

Pœnorum expectant, ostroque insignis & auro

Stat sonipes, ac fræna ferox spumantia mandit.

Tandem progreditur magna stipante caterva

Sydoniam picto chlamydem circumdat a limbo,

Cui pharetra ex humero, crines nodantur in aurâ:

Aurea purpuream subnectit fibula vestem,

Ex hoc omnes cognoscent vos esse discipulos meos, si charitatem habueritis alij in alios. Iohâ. 13. 35. Quum in vobis sint liuor & contentio, & dissidia: nōne carnales estis: & secundum hominē inceditis? Etenim quum dicit quidam, Ego sum Pauli: alter, Ego sum Apollo, nōne carnales estis? 1. Cor. 3. 3.

Christus habuit commercium cū carne & sanguine, tentationibus fuit obnoxius, per omnia similis factus est nostri, degustauit mortem: Ergo Christus fuit verus homo.

Ex adiunctis alia rem præcedunt, alia vel ei annectuntur vel sequuntur vt.

Si tibi docendum esset Iudam esse impium, atque vt Christus vno verbo ait Io. 6. diabolum, id docebis primò signis antecedentibus, tum ex adiunctis negotio proditiōis, tum ex sequentibus, euangelistarum more. Antecedentia sunt. Inuidit Christo honorem delatum à Maria, quæ vnguento præcioso vnixerat Christi pedes. Hypocrita erat, fingens sibi curæ esse pauperes: denique erat auarus, habens marsupium: & fur id est, malæ administrationis reus: Io. 12. Christus insuper aliquoties

apertè significauit Apostolis, vnum ex ipsis fore proditorem: neque impius vnquam est his permotus. Mat. 26. Luc. 22. Io. 6. 13. Porro vltra adit pontifices, ac de præcio prodicionis paciscitur. Math. 26. Lu. 22. Ad hæc captat cõsilia quomodo opportunè & sine turbis destinatũ facinus perpetret. Luc. 22. Post hæc omnia, interest extremæ cœnæ, quo omnem de se suspicionem aboleat.

Christus iterum verba facit de quodam qui ipsum sit proditurus, & signo addito de porrecta buccella intincta certiores omnes facit: quin etiam iterum admonet Iudam, vt quodd semel constituerat ocus perficiat. Verùm hæc omnia obturato præstat ille animo, ceu nullius mali sibi conscius. Io. 13.

Iam in negotio ipso adiuncta talia sunt, inquit Iudas cœnam & egreditur cohortes armatos petiturus, Io. 13. His acceptis noctu hortum adit, ad quem sciebat Iesum precandi causa venire solitum Ioh. 18. Militibus signum dat, ne errent in persona: quem osculatus fuero inquit, ipse est. Math. 26. Christus autem spõte occurrit: interrogat quem armati petant: osculum non recusat: placidè & blandè alloquitur: amice, inquit, ad quid ades? atque nihil horum ferit proditoris conscientiam, quo minus destinatum scelus exequatur. Mat. 26. Io. 18.

Nunc de consequentibus: Tandem pœnitet Iudam, palam in templo reddit pecuniam, peccatum suum confitetur, & Christi innocentia testimonium ipse dicit, vehementissimè perturbatus abiit foras, laqueo se suspendit, crepuit medius, effusa sunt omnia eius viscera. Math. 27. Act. 1.

Antiphanes Comicus meretricem egregiè ab adiunctis depingit. Venit ipsa, inquit, transit, accedit, non transit, venit, adest, abest, erigitur, accedit, sinegmate saponèue purgatur, peccatur, egerit, tergitur, lauatur, se contempletur, componitur, vnguentis perfunditur, ornatur, vngitur, & si quid non habet enecatur.

De subiectis geometricis prius diximus: illis verò per se

se insunt diuisiones, constitutiones, contractus, applicationes, excessus, defectus, æqualitas & inæqualitas: cum alijs quibuldam huius generis quæ omnia ad hanc categoriam referuntur.

Sirectum est, aut rotundum, figura participat:

Quod partes habet est rectum aut rotundum:

Ergo quod partes habet, figura participat.

Huc pertinent Phisicorum prognostica, de ventis & pluuijs: & augurum cæterorumque diuinationes.

*Posito adiū-
cto, ponitur
subiectum.*

Cicero lib. primò de Diuinat.

*Hic Iouis altifoni, subito pennata satelles
Arboris è trunco, serpentis sancio morsus
Ipsa feris subigit transfigens unguibus anguem
Semanimum, & varia grauiser cervice micantem.
Quem se torquentem lanitus, rostroq; cruentens,
Iam satiata animos & duros vltia dolores,
Abiecit efflantem, & laceratum affligit in unda.
Sæque obitu à solis nitidos conuertit ad ortus,
Hanc ubi præpetibus pennis lapsuq; volantem
Conspexit Marcius, diuini numinis augur:
Fausaq; signa sua laudis reditusq; notauit.
Partibus intonuit cæli pater ipse sinistris:
Sic Aquila claram firmavit Iupiter ormen.
Et secundo Fastorum:
Fallimur? an veris prænuntia venis hirundo.*

*Diuinatio au-
guris ab adiū-
ctu.*

Nam vt illa omittam (ait Orator) Visas nocturno tempore ab occidente faces, ardoremque cæli vt fulminum iactus, vt terræ motus, cæteraque quæ ita multa nobis consulibus facta sunt, vt hæc quæ nunc fiunt, cauere Dij mortales viderentur. Cicero. 3. Cat.

Non prædicabant? non significabant nobis dii vt caueremus, tantum non humanis vocibus editis? Equidem nullam vnquam urbem vidi quæ magis à dijs immortalibus conseruaretur, & à quibuldam oratoribus perderetur. Non satis monere potuit portentum illud, quod inijs Cereris extitit, vt caueremus, cum initiati interierunt? Non ea de causâ cauendum esse monuit Amyniades, & Delphos mittendos aliquos, qui oraculum sciscitarentur? Sed Demosthenes refragabat, quod Pythiam

*Aruspiciū di-
uinatio ab ad-
iunctis.*

Philippo studere diceret, homo ineruditus, & fruens ac repletus ea licentia, quæ à vobis ei datur. Nōne is nuper, sacris ominosis & infaustis milites oblegavit ad manifestum discrimen: quamvis dudum dicere ausus, ea de causa Philippum, in nostram regionem nō venisse, quod victimæ prosperæ non fuissent? Quo igitur dignus es supplicio ô Græciæ pestis? Nam si victor propterea in eorum quos vicerat regionem non venit, quod sacra infausta essent: cur tu qui nescires quid futurum, antequam litatum esset, milites ablegasti? Virū igitur corona dignus es ob calamitates publicas an exilio? Æschines aduersus Ctesiphontem.

Si motus simplex (adiunctum) est, necesse est quoque corpus esse (subiectum.)

Prænotio ab adiunctu.

Iudicatio ab adiunctu.

Quod si motus simplex in rerum natura est, simplex autē is est, qui in orbem incitatur, & motus simplex simplicis sit corporis, corpus aliquod simplex sit necesse est, quod suapte natura eo motu qui circa medium fertur cieatur. Arist. lib. 1. de Cœlo. cap. 2.

Huc referuntur medicorum prædictiones, & iudicationes. Faciei corruptio lethalis, talis autem fuerit, oculi cani, nasus acutus, tempora collapsa, aures frigidæ ac contractæ, cutis dura, color pallidus aut niger. Hip. in prænot.

Vrina autem optima est, quæ habet albissimam subsidentiam, & leuem ac æqualem, per totum tempus donec iudicatus fuerit morbus. Significat enim securum & breuem fore morbum. Hip. in Iud.

Si ea mulier testamentum fecit, quæ se capite nunquam diminuit, non videtur ex edicto prætoris secundum eas tabulas possessio dari: adiungitur enim vt secundum seruorum, secundum exulum, secundum puerorum, tabulas possessio videatur ex edicto dari. Cicero in Top.

Res sacra est: ergo non recipit estimationem.

Titius Sempronium vulneravit.

Nam Titius ædes Sempronij ingressus, gladio cruento visus est.

Ab adiuncto temporis.

Paulus Rom. 4. ab adiuncto temporis probat Abrahamum

hamum iustificatum fide absque operibus. vt. Ista igitur beatitudinis prædicatio, in circumcissionem solum an & in præputium cadit? Dicimus enim imputatam fuisse Abrahamæ fidem pro iustitia, quomodo ergo imputata est? Cum esset in circumcissione, an quum esset in præputio? non in circumcissione sed in præputio.

Si non ante tertiam horâ, pecuniam sum pollicitus, quid iam me vrget ante tempus?

Notet lector hoc Topicum aliquando verisimilia tantum signa supplere, quæ licet vim aliquam habere videantur, tamen non semper necessario inferunt. *Signa verisimilia.*

Ioseph fugiens reliquit vestem apud vxorẽ Putipharis vociferantem: igitur voluit hanc per vim stuprare. non valet argumentum.

H V I V S, Topici sunt promissio diuina, comminatio diuina, prædictio seu vaticinium propheticum mysterium, typus & allegoria: quæ quidem omnia sunt veluti adiuncta præcedentia, quæ res nonnullas necessariò subsequi ostendunt.

Petrus Act. 2. comprobat Apostolos collegas suos non esse ebrios, vt maleuoli suspicabantur: sed potius afflatos spiritu diuino, ac nouo linguarum dono ornatos. Ita namque Deum ipsum promississe per Ioelem Proph. c. 2. Et erit post hæc: inquit, effundam Spiritum meum super omnem carnem, & prophetabunt filij vestri & filiæ vestræ: senes vestri somnia somniabunt, iuuenes vestri visiones videbunt: quin & super seruos & super ancillas in diebus illis effundam spiritum meum. Dabóque prodigia in cælo & in terra, & sanguinem & ignem, & columnas fumi, & erit præterea, quicumque inuocauerit nomen Domini, euadet. *Promissio diuina.*

Iere. 29. Psal. 17. 145. promissit Deus laturum se opem pijs ipsum in necessitate inuocantibus. Igitur Deus haud dubie præstabit, atque pios eripiet è periculis. Rursus Deus non promissit se adiuturum impijs: igitur nequam liberabuntur. Iere. 11. Iob. 9. *Affirmatiue. Negatiue.*

*Comminatio
diuina.*

Rom. 10. Astruit apostolus tempus adesse quo Iudæi reijci atque excludi ab ecclesia Dei, gentiles autem vocari, & Iudæorum loco substitui debeant. Confirmat istud proposita comminatione Dei aduersus Iudæos olim pronuntiata. Deut. 32. Ego ad æmulationem prouocabo vos per gentem quæ non est gens, per gentem stultam commouebo vos.

*Vaticinium
Propheticum.*

Matthæus cap. 1. postquã exposuisset quomodo Maria grauida fuisset depræhensa à spiritu sancto sine viri opera, & Angelum significasse Iosepho, quod paritura esset filium populi seruatorem, addit: totum hoc factum est, vt perficeretur quod dictum fuerat per Prophetam (Esaïam cap. 7.) ita loquentem: Ecce virgo erit prægnas & pariet filium, & vocabunt nomen eius Emanuel, quod si quis interpretetur, sonat nobiscum Deus. Pondus verò inest hisce probationibus maximum, vt ex his locis satis apparet Ephes. 2. 3. Heb. 1. 2. Pet. 1. Act. 3. 10. Hinc illa formula crebro in No. Test. repetita: hoc factum est vt impleretur quòd dictum est &c. Et Christus Math. 26. Luc. 24. ait impleri oportere scripturas, & fieri quæ prædicta fuerunt.

Typus.

Quando autem probationes sic instituuntur, vt dicatur meritò aliquid hoc tempore accidere, vel debere fieri, quandoquidem olim facta ea præcesserunt, quæ presens negotium quodammodo prætenderunt, magna istud fit cum gratia, ac dici non potest quantopere illustrentur conciones seu disputationes istiusmodi argumentis.

Christus asserit Io. 3. se esse verum Deum, Dei filium, mortem nihilominus debere pro generis humani salute perferre: Comparabat illud adducto Typo ex Num. 21. dicens: Sicut Moyses exaltauit serpentem, in deserto, ita exaltari oportet filium hominis, vt omnis qui credit in eum, nõ periat, sed habeat vitam æternam. Talis est argumentatio Io. 19. Mat. 12. 1. Pet. 3. 1. Cor. 10.

Affirmatiuè.

Moyses exaltauit serpentem æneum, quem qui intuebantur manebant incolumes. Num. 21.

Igitur

Igitur & Christum oportuit exaltari in crucē vt quicunque fidem in ipsum defixerit, adipiscatur salutem.

Os non debuit confringi agno pascali:

Ergo neque Christo confringentur crura.

Negat.

Vt in typo actio similem portendit actionem:

Ita in allegoria verba certam rem significant.

Allegorē

Omnis victima sale salietur: Leu. 2.

Igitur & homo Domino addictus sale condietur. Marc. 9. Colof. 4

Affirmat.

Non obligabit os boni trituranti. Dent. 25.

Ergo non est ministris verbi denegandus victus. 1. Cor. 9.

Negat.

1. Timoth. 5. de hoc argumenti genere, vide Luc. 10. ex

2. Reg. 4.

Per mysterium actionem intelligimus externam & corpoream, siue ceremoniam diuinitus institutam, quæ rem quandam internam & spiritualement denotat.

Mysterium.

Titus sacro baptismo tinctus est:

Ergo debet nouam & sanctam vitam viuere.

Affirmat.

Titus non est circumcissus:

Igitur non est obstrictus ad legis obseruantiam.

Negat.

Sed in his omnibus notet lector imprimis cauendum esse, ne quis suo cerebro aliquid tribuat, sed soli Scripturæ adhereat, videatq; vt allegoriæ, typi, mysteria & quæ huius generis sunt decenter rebus applicentur.

Est verò adiunctorum ad subiecta, quibus occupantur, vsus item magnus. Hoc argumento Plato miseras ciuitates auguratur, quæ medicorum & iudicum multitudine indigeant, quia multam quoq; & intemperantiam & iniustitiam in ea ciuitate versari necesse sit.

Sed consentaneorum categoria sic est, vnde quiduis alteri consentaneum, vel idem vel vnum dici possit: omnesq; modi vnitatis, & vt ita dicam, identitatis huc sunt tanquam ad primos & simplices fontes referendi.

D

*Arist. 3. cap.
lib. 5. Top.*

*Arist. 3.
Rhet. cap. 2.
& 17.*

Argumentum primum consentaneum expositum est, Dissentaneum sequitur, quod á re dissentit: sunt autem dissentanea inter se æque manifesta, alterumq; ab altero æqualiter arguitur: tametsi sua dissensione clariùs elucescant. Dissentanea sunt diuersa vel opposita. Diuersa sunt dissentanea, quæ sola ratione dissentiunt. Quo de genere sunt illa frequentissima. Non hoc, Sed illud. Quamquam, Tamen. pro Pompeio, Non victoriã, sed insignia victoriæ reportarunt. Ouid. 2. de Arte,

Non formosus erat, sed erat facundus Vlysses.

2. Æneid. *Hic Priamus (quamquam in media iam morte tenetur)*

Non tamen abstinuit.

Paulo secus in Eunucho,

Nam si ego digna hac contumelia

Sû maximé, at tu indignus qui faceres tamen.

Item illa aliusmodi. Pro Lig. Scelus tu illud vocas Tubero? cur? isto enim nomine illa adhuc caussa caruit. Alij enim errorem appellant, alij timorem, qui durius, spem, cupiditatem, odium, pertinaciã, qui grauissimè temeritatem: scelus præter te adhuc nemo.

*Aliud premi
aliud oppri-
mi &c.*

IN omnibus præmimur, inquit Apostolus, sed non opprimimur: Æstuamus, sed non exæstuamus: Vexamur, sed non deferimur: Deijcimus, sed non perimus.

2. Cor. 4. 8.

2. Cor. 4. 8. Ecclesia de se ipsa : Nigra sum, inquit, sed decora filia Ierusalem. Cant. 1.

Dissentaneorum Categoria refutationi maximè inferuit. Cum itaque nulla sit ars, quæ non aliquando in refutatione versetur immensum huius Topici vsum esse manifestum est. In scola etiam mathematica quæ multò seuerioris Logicæ sibi leges imposuit, demonstrationes per impossibile ex dissentanearum Topicis deductæ sunt.

Luna hæc inferiora suo illustrat lumine, & tamè ipsa suum lumen à sole accipit.

Torpefactoriæ exsolutiones difficiles quidem ex partibus contingunt, & mentem emouentes, non tamen perniciosæ, Hip. Coacæ prænot.

Non si vxori vir legauit omne argentum quod suum esset, idcirco quæ in nominibus fuerunt, legata sunt. Multum enim differt in arca ne politum argentum, an in tabulis debeat.

In Alcmeone Theodectis cum Alpheſibea rogaret: quis non tuæ scelus parentis oderat?
Respondet:

*Dignam mori illam censuerunt, non tamen
A me necandam.*

Mihi quidem contigit Æschyne, dum fui puer, conuenientia discendi loca frequentare, & ea habere, quæ opus sunt homini turpè nihil facturo propter inopiam: Egresso è pueris, his consentanea agere, ædilitia muncera obire, triremes instruere, tributa conferre, nulla vel priuata in re vel publica, meam liberalitatem requiri sinere, sed & amicos & Remp. iuuare. Postquã ad Remp. accessi, ea instituta sequi mihi visum est, vt & à Patria & cæteris Græcis sæpe sim corona donatus, & vt ne vos inimici quidem, non præclara esse quæ agenda suscepi, dicere agredere mini. Talis igitur fortuna mea fuit: Tu verò cum hac eam fortunam confer qua tu es vsus. Puer in magna ægestate es educatus, vna cum patre ad ludum literarium sessitans, atramentum terens, & subsellia spò-

gijs detergens, & pædagogium verrens, famuli vicem nō ingenui pueri obiens. Vir factus matri initianti libros lectitasti, & in cæteris rebus ad imposturā adiutasti, &c. Postquam autem in municipij album inscriptus esses, statim pulcherrimum tibi munus delegisti, vt dicta scriberes, & in conuenticulis operam locares, &c. Eam denique gerendæ Reip. rationem delegisti, qua florentē patria, leporis vitam degeres, & perterritus ac tremens, & semper verbera expectans propter scelerum conscientia. Cōfer, igitur, inter se tuam & meam vitam leuiter & nō acerbē Æschyne. Docuisti lireras? ego didici. Initiaisti? ego initiatus sum. Saltaisti? ego sumptus præbui. Dictata scripsisti? ego conciones habui. Tertias actitasti partes? ego spectauī. Excidisti? ego explodi. Pro hostibus egisti omnia? ego pro patria. cætera omitto. Demosth. pro Corona.

C A P. XII.

De Disparatis.

*Arist. cap.
de Oppositis,
& 10. c. lib. 5.
de Philosoph.*

*Arist. 2. Rhe-
to. cap. 3.*

Opposita sunt dissentanea, quæ ratione & re dissentiant: itaque eidem attribui, secundum idem, & ad idem & eodē tempore non possunt. Sic Socrates albus & ater non potest eadem parte esse: pater & filius eiusdem: sanus & æger eodem tempore: At albus esse potest alia parte, & ater alia: pater huius, filius illius: sanus hodie, cras æger. Itaque ex altero affirmato alterum negatur. Opposita sunt disparata, aut contraria: disparata sunt opposita, quorum vnum multis pariter opponitur, vt viride, cineraceum, rubrum, media sunt inter album & nigrum, quæ singula extremis, & inter se disparata sunt.

Sic

Sic Deus, Angeli, Archangeli, Cherubin, Potestates, Throni, & vniuersus cælestis cætus inter se disparantur: Sic triangulus, quadrangulus cæteræque figuræ: Binarius Ternarius cæteri que numeri: Sic morbi, liturgia, Epilepsia: Sic res, persona, actio.

Sic liberalitas & auaritia inter se disparantur. Sic homo, arbor, lapis, & eiusmodi res infinitæ disparantur, nec eadem res potest esse homo, arbor, lapis. Virgil, 1. Æneid. hoc argumento disputat.

*O quā te memorem virgo? namq; hand tibi vultus
Mortalis: nec vox hominem sonat: O dea certè?*

PAVLVS Apostolus edoctus est, atque ad Apostolicam euectus dignitatem à Deo ipso: Igitur non est edoctus & Apostolus designatus à Petro vel Iacobo vel quouis alio homine. Hoc pluribus explicatur 1. ad Galatas.

Redempti estis à vana vestra conuersatione, quam à Patrum traditione accepistis, prætioso sanguine Christi: Igitur non auro, non argento, vel alijs caducis rebus. 1. Petr. 1.

Affligitur aliquis vt Christianus: Igitur non vt homicida aut fur, aut facinorosus, aut curiosus alienarum rerum. ibidem. & cap. 4.

Hæc est seruitus aquæ ducendæ: ergo non est seruitus aquæ hauriendæ.

CAP. XIII.

De Relatis.

Contraria sunt opposita, quorum vnum vni tantum opponitur: suntque affirmantia, aut negantia. Affirmantia, quorum vtrumque

*Arist. in categoria de relatis.
Cicero in Topicis.*

affirmat, vt relata & aduerfa : Relata sunt cōtraria affirmantia, quorum alterum constat ē mutua alterius affectione : atque inde nominata sunt relata : vt pater qui filium habet, & filius qui patrem habet : & ob hanc mutuam relationis cauffam, relata dicuntur fimul effe natura, vt qui alterum perfectè norit, norit & reliquum. Pro Marc. Ex quo profectò intelligis, quanta in dato beneficio, fit laus, cum in accepto tanta fit gloria. Martialis in Soffibianum lib. 1.

*Tum feruum fcis te genitum, blandèque fateris,
Cum dicis dominum, Soffibiane, patrem.*

FILIVS Patrem, & dominum feruus debet honorare. Quòd fi ego Pater, vbi eft meus honor? Si ego Dominus, vbi eft mei metus? Inquit armipotens Iehouah vobis, sacerdotes, mei nominis contemptoribus. Malach. cap. 1.6. Hic continetur tacita relatio. Si me agnofcitis Patrem, debebatis vos gerere vt decet filios : Si agnofcitis dominum, quin morè geritis vt fideles ferui?

Sic apud Quintilianum lib. 5. cap. 10. Si portorium Rhodijs locare honeftum eft, & Hermacreonti conducere. Quomodo & in oratore perfectò Tullius. Num igitur eft periculum (ait) ne quis putet in magna arte, & gloriofa turpè effe docere alios id, quod ipfi fuerit honeftum difcere? Studium verò quoddam fuū Cicero ē relatis illis in oratore prodidit. iam illa (inquit) matura, vxor generi: nouerca filij, filia pellex. Quòd idem in ferrez

rex ætatis descriptione Ouidius apertius affectauit. 1. Metamor.

-- Non hospes ab hospite tutus,
 Nō socer à genero, fratrū quoque gratia rara est.
 Imminet exitio vir coniugis, illa mariti:
 Lurida terribiles miscent aconita nouerca:
 Filius ante diem patrios inquirat in annos.

Atqui argumentum talis relationis contrarium nihil habet, imò arguit mutuas causas: ut sum tuus pater: tu es igitur meus filius: at cum dico sum tuus pater, non igitur sum tuus filius, tum contraria verè sunt.

A natura relatiuorum Christus redarguens aduersarios Phariseos. Math. 22. probat se multo excellentiorem Dauide, imo & esse Deum. Interrogabat Phariseos: Quid vobis videtur de Christo? cuius filius est? Dicunt ei, Dauidis. Ait illis: Quomodo ergo in spiritu vocat ipsum Dominum? dicens: Dixit Dominus Domino meo &c. Si ergo Dauid vocat eum Dominum, quomodo filius eius est? Athanasius hoc sumpto argumento æternitatem filij Dei concludit: Ab omni æternitate fuit pater: Ergo ab omni æternitate habuit filium.

Si nulla coeli pars sit dextrorsum, nulla erit sinistrorsum: & si nulla antè, nulla erit ponè. Si nulla sursum, nulla erit deorsum. Arist. de Cælo.

Si tibi non sum vxor, non eris tu mihi maritus: Si Titius Dauis Dominus est, non potest esse seruus eiusdem: Si qui damnum accepit honestè & iustè multatus est: ita etiam qui damnum illud dedit. Et contra. Si qui damnum dedit, honestè & iustè fecit: ita etiam qui passus est. Aristot. Rhet. Lib. 2. Cap. 22.

Posito vno relatorum ponitur alterum: Si Abraham pater est multarum gentium, igitur aliqui ex gentibus

D iij.

*Sublato vno
relatorum, tollitur alterum.*

*Relata non
conueniunt vni.*

sunt eius filij. Rom. 4.

Sempronius est conductor domus, ergo aliquem locatorem esse necesse est.

Et vno sublato tollitur alterum: Abraham non est pater gentilium, (ex falsa Iudæorum opinione Io. 8.)

Igitur Gentiles non sunt illius filij.

Testator non est: ergo hæredes non instituuntur.

C A P. X I I I I.

De Aduersis.

Cicero in Topicis: Arist. in Categorijs & Topicis.

Aduersa sunt contraria affirmantia, quæ inter se velut è regione perpetuò aduersantur, Æneid. I I.

Nulla salus bello, pacem te poscimus omnes.

Sic Deus & Mammom vel Satanas & Beelzebub: Angelus siue spiritus bonus & angelus siue spiritus malus: Iustitia legis & iustitia fidei: Spiritus & caro: Benedictio & maledictio: Fides & incredulitas: Electio & rebrocatio: sic albor & nigror, calidū & frigidum, virtus & vitium opponuntur. Parad. I. contra Epicureos. Illud tamen arctè tenent, accurateque defendunt, voluptatem esse summum bonum: quæ quidem mihi vox pecudum videtur, non hominum. Tu cum tibi siue deus, siue mater, vt ita dicam, rerum omnium natura dederit animum, quo nihil est præstantius, neque diuinus, sic te ipse abijcies ac prosternes, vt nihil inter te atque inter quadrupedem interesse putes? Pecudem & hominem aduersa Cicero opposuit: voluptas, pecudis

cudis bonum est, non igitur hominis. Sic libertas & seruitus, apud Tibullum 2. lib.

*Sic mihi seruitium video dominamq³ paratam,
Tu mihi libertas illa paterna vale.*

Pro Marc. Nunquam enim temeritas cum sapientia commiscetur, nec ad consilium casus admittitur.

Christus eijcit dæmonia præsidio, digito seu virtute Dei: Igitur nō eijcit dæmonia virtute Beelzebub. Mar. ii. Si vites malum, igitur facies bonū. Psal. 34. Spiritu ambulate, & concupiscentiam carnis non facietis. Luc. 16.

Nemo seruus potest duobus Dominis inferuire, aut enim vnum odio habebit, & alterum diligit: aut vni adherebit, & alterum contemner. Non potest Deo seruire & Mammonæ. Vbi vides repugnātia Deum & Mammona: Diligere & odio habere: adherere & contemnere.

Iustitia legis nō iustificat: igitur iustitia fidei iustificat. *Negatiuè.*

Quod inflexo motu per lineam rectam cietur, motibus feratur contrarijs necesse est. Nam & motus is qui in locum supremum fert ei qui in locum infimum: & is qui antè, ei qui ponè: & qui sinistrorsum, ei qui dextrorsum repugnat, estque cōtrarius: quippe cū hæ sint loci discrepantiæ. Arist. Lib. 8. Phis. Cap. 8.

Curationes medicorum hinc potissimum auxiliū habent. Si enim calidum est aut frigidum, aut siccum, aut humidum, quod hominem lædit, oportet peritum medicum id contrario soluere ac liberare: Frigidum, calido: Calidum frigido: Humidum, sicco: Siccum, humido, Hip. de veteri medicina.

Non debet ea mulier cui vir bonorum suorum vsum fructum legauit, cellis vinarijs & olearijs plenis reiectis, putare id ad se pertinere. Vfus enim non abusus legatus est. Cic. in Topicis. *Vfus abusus.*

Ille est contractus bone fidei: ergo nō potest esse cō-

tractus stricti iuris : Si institutoria rectè actum est : tributoria ipso iure locum non habet.

Si furti actione experiri voles : mādati agere nō poteris.

Prima lex apertè iubet , si quis aliquem occiderit Senatū iudicare : iste si quis occiderit statim scripsit abducere licere. Hoc custodite & memineritis, nihil posse iudicio fieri contrarium magis , quam sine iudicio proscriptionem.

Non finit secūda lex, etiam damnatum cædis, excarnificari aut multari pecunia : At iste dum eum abduci permittit, hæc omnia concessit. Abducere iubet lex ad Sexuiros, idq; , si quis homicidam in interfecti patria deprehenderit : iste ipsi accusatori dat abducendi potestatem in suas ædes , etiam si in aliena terra deprehenderit. Iste eum proscibit, quem leges indemnem & infontem dimittunt. Ius primum postulare, lex iubet : Iste contra nullum iudicium, nec ipse designauit, neq; à quibus pœnas exigit, petijt : sed statim scripsit, eum abducere licere. Non finit lex aliquā legem, nisi eadem pariter ad omnes pertineat, promulgare : Iste ob vnum virū peculiare decretum scribit. Non finit lex decretum, lege plus valere : Iste quum tot sint leges, decretum ratum facit, leges tollit. Demost. contra Aristocratem.

Si stultitiam fugimus, sapiētiam sequamur : & bonitatem, si malitiam. Cicer. in Topicis.

Ego quis sum ? æquum me comemque prebeo erga omnes : Sum misericors, beneficus in multos : Alter iste, quis ? Violentus, qui tum nemini miseretur, tum neminem hominem esse putat. Demost. contra Midiam.

Eam quam nihil accusas, damnas : bene quam meritā esse autumas, dicis male mereri : id quod scis, prodest : nihil id quod nescis, obest. Cicer.

C A P. XV.

De Contradicientibus.

Arist. 3. cap.

Contraria negantia sunt, quorum alterum
ait,

ait, alterum negat idem: eaque sunt contradicentia, aut priuantia. Contradicentia sunt contraria negantia, quorum alterum negat ubique: ut iustus non iustus, animal non animal, est non est, sunt contradicentia. Sic in defensione Murænæ contradicitur sententijs Catonis & Ciceronis, illius Stoici, huius Academici. Dialogus est his verbis, Nihil ignoueris: imo aliquid, non omnia. Nihil gratiæ caussa feceris: imo ne resistito gratiæ, cum officiū & fides postulabit. Misericordia commotus ne sis: etiam in dissoluenda se veritate, sed tamen est aliqua laus humanitatis. In sententia permaneto: enimuerò nisi sententia alia vicerit melior. Martialis, lib. i.

Bella es, nouimus: & puella, verum est:

Et diues, quis enim potest negare?

Sed dum te nimium, Fabulla, laudas,

Nec diues, neque bella, nec puella es.

Cicero i. Tusc. cogit hoc argumento Atticum Epicureum fateri mortuos miseros non esse, si omninò nulli sint, ut Epicurei credebant. Iam malle (ait) Cerberum metueres, quàm ista tam inconsideratè diceres. Atticus. Quid tãdem? Marcus. Quem esse negas, eundē esse dicis: Vbi est acumen tuum? cum enim miserum esse dicis, tum qui non sit, esse dicis. Tum post lógam disputationem Atticus ait, Age, iam cōcedo nō esse miseros, qui mortui sunt: quoniã extorsisti, ut faterer, qui omninò

nō essent, eos ne miseros quidem esse. Sic Teretianus Phædria Dori Eunuchi dictū eleuat, quod affirmasset prius, quæ post inficiaretur:

Modo ait, modo negat.

VOCABO populum qui meus non erat, populum meum: & eam quæ dilecta non erat, dilectam, & erit, in loco vbi dictum fuerat eis, non populus meus vos, illic vocabuntur filij viuientis Dei, Rom. 9. 25.

Profecti in mundum vniuersum, prædicate Euangelium omni creaturæ: qui crediderit & baptizatus fuerit, seruabitur: qui verò non crediderit, condemnabitur, Marc. 16. 15. Sic Ioan. 3.

Chrisippus sibi ipsi aduersari, ac pugnatia inter se dicere non aduertit: cuius in oratione de voce, tum vbi interdū negat vllum sensum nos sedis illius in qua principalis animæ pars consistit habere, interdum ait. Gal. de dog. Plat. & Hip. lib. 2.

Si contractum est matrimonium: Ergo non contractum esse dicere non potest. Si verum est Titium esse reum criminis lesæ maiestatis: Igitur falsum erit Titium non esse reum criminis lesæ maiestatis.

Nōne indignum facinus est, Athenienses, ac potius impium asserere homicidam, esse eundem: ac rursus id se non dixisse, eiurare? cui eadem obiecerit, cum illo sub eodem versari tecto? Demosth. contra Midiam.

CAP. XVI.

De Priuantibus.

*Arist. in Philosoph. cap. 4.
lib. 10. & 32.
cap. lib. 5.*

Priuantia sunt contraria negatia, quorum alterum negat in eo tantum subiecto, in quo affirmatum suapte natura inest. Atque hinc affirmatum dicitur habitus, negatum autē priuatio. Sic motus & quies. Sic ebrius & sobrius.

brius. Martial. lib. 3.

Ebrius es: nec enim faceres hac sobrius unquam.

Sic cæcum esse & videre. Pro Cælio, Existat igitur ex hac familia aliquis, ac potissimum cæcus ille, minimum enim dolorē capiet, qui istam non videbit. Sic pauper & diues opponuntur apud Martialem lib. 5.

*Semper eris pauper, si pauper es, Emiliane:
Dantur opes nullis nunc, nisi diuitibus.*

Talia sunt mors & vita in Miloniana, Huius mortis sedetis ultores, cuius vitam, si putetis per vos restitui posse, nolitis? Item tacere & loqui. 1. Catil. Quid expectas auctoritatem loquentium, quorum voluntatem tacitorum perspicias? Pro Marc. Doleo cum resp. immortalis esse debeat, eam in vnius mortalis anima consistere. Sed dissentaneorum categoria sic est, vnde quiduis ab altero differre quolibet modo possit.

Ne impari iugo copulemini cum infidelibus, quod enim consortium iustitiæ cum iniustitia? & quæ communio lucis cum tenebris? Et quæ concordia Christo cum Belial? aut quæ pars fideli cum infideli? Et quæ cōsensio Dei cū simulachris? nam vos templum estis Dei viuentis, sicut dixit Deus: Habitabo in ijs, &c. Qua propter exite è medio eorum & separamini. Vide plura. 2. Corinth. 6.4. & 8. Rom. 13. Prouerb. 8. Rom. 5. Item, Ioh. 9.

Fideiussores se plura quàm debitor deberet soluere, aut ignorarunt, aut sciuerūt: Si ignorarūt, excusata ignorātia

est : si sciuerunt, incumbere ijs necessitas prouocandi.

Qui fatetur se rem perdidisse, fatetur quod rem olim habuerit. Priuatio enim presupponit habitū. Sic nemo moritur qui non vixit : nemo se in seruitutem coniecit, qui non fuit antea liber.

C A P. X V I I.

De Paribus.

*Arist. in Top.
13. c. lib. 2.*

Argumenta simplicia ita fuerunt in cōsentaneis & dissentaneis, comparata sunt, quæ inter se comparantur, quæ tametsi ipsa comparationis natura æque nota sint, attamen alterum altero alicui notius & illustrius esse potest : Sapēque notis breuius indicantur, aliquando paribus plenius distinguuntur, quæ propositio, redditioque nominantur : atque omninò comparata etiā ficta arguunt fidēque faciunt. Comparatio est in quantitate vel qualitate : Quantitas qua res comparatæ quantæ dicuntur. Estque parium vel imparium : Paria sunt, quorum est vna quantitas : Argumentum igitur paris est, cū par explicatur à pari, eiusque notæ sunt par, æquale, æquare, idem, quod, tam, quam, tanto, quanto, tot, quot, & non magis, non minus. Virgil. *Æneid.* 2.

*Arist. in Philosophia. 2. c.
lib. 4. & 2.
cap. 11.
Arist. in Philosophia. lib. 5.
cap. 15. & in Rhet. cap. 23.
lib. 2.
Cicero in Topica.*

--*Par lenibus ventis.*

Æne. 3. *Et nunc aequali tecum pubesceret æno.*

Æne. 6. *En huius nate auspiciis, illa inclyta Roma,
Imperium terris, animos equabit olympo.*

Propositio deinde redditioque distinguuntur.
4. Cat.

4. Cat. Cuius res gestæ atque virtutes iisdem, quibus solis cursus regionibus ac terminis continentur. Æneid. 4.

Tam ficti prauique tenax quàm nuntia veri.

Catul. *Tanto pessimus omnium poeta,*

Quanto tu optimus omnium patronus.

Ouid. 4. Trist.

Littora quot conchas, quot amœna rosaria flores,

Quotque soporiferum grana papauer habet:

Syluaferas quot alit, quot piscibus vnda natatur,

Quot tenerum pennis aëra pulsat anis:

Tot premor aduersis: quæ si comprehendere coner,

Icarie numerum dicere coner aque.

9. Philip. Neque enim ille magis iuris consultus, quàm iustitiæ fuit: Itaque quæ proficiscebantur à legibus & à iure ciuili, semper ad facilitatem æquitatémque referebat: neq; constituere litium actiones malebat, quàm controuersias tollere. Ouid. 2. de Arte,

Non minor est virtus, quàm querere, parta tueri.

Pro Mur. Paria cognosco esse ista in L. Muræna, atque ita paria, vt neque ipse dignitate vinci potuerit, neque te dignitate superarit.

2. Philip. Quorum facinus commune, cur non eorum præda communis? Ter. in Adel.

Quando ego non curo tuum, ne cura meum.

Amplissimus est huius Topici vsus in sacra pagina, Nunc enim ab vno pio ad omnes pios fit argumentum à pari: Nunc ad omnes impios ab vno impio. Prioris *Affirmat.*

exempla: Petri Apostoli magna est autoritas: Igitur & Pauli Apostoli magna est autoritas, nam de horum æqualitate prolixè ad Galatas. Cap. 1.

Negat.

Deus non deseruit Iosuum: Igitur neque quemuis alium pium deseret. Ios. Cap. 1.

Posterioris exempla:

Deus indurauit cor Pharaonis. Exod. 9. Hinc colligit Apostolus reliquos impios à Deo indurari. Rom. 9. Sic. Act. 1. hæc verba. Psal. 109. Fiat commoratio. &c. à Dauide quidem dicta sunt in Doeck adulatorem Saul. A Petro verò accommodantur ad Iudam Christi proditorem.

Nunc à persona vnus pij speciatim, ad personam Christi. Sic à Salomone. 2. Sam. 7. ad Christum. Heb. 3. Et à Cyro Esaïæ. 42. ad Christum Matthæi. 12. Et à Dauide Psal. 25. & 41. ad Christum. Io. 15. & 13.

Huius etiam Topici vsus est, cùm à capite ad membra argumentamur, & quod Christus hæc vel illa fecerit pijs quoque eandem potestatem fore: & quòd in capite præcessit, debere in membris sequi, vt auctor Apocalypseos. Capite. 2. ratiocinatur. Sic. 1. Corinth. 12. ad Collos. 1. 3. 4. Ephes. 1. 4. Rom. 8. pluribus docetur ea quæ Christi sunt, communia fieri in Christum credentibus: Resurrexit Christus à mortuis: Ergo fideles resurgent. 1. Cor. 15. Christus omne iudicium habet. Io. 5: ergo fideles iudicabunt. 1. Cor. 6. De hac re Christus ipse. Mat. 9. Luc. 22. Io. 6. 15. Idem in Epistola. 2. 3. 4. Afflictus fuit Christus: ergo pij affligentur. 1. Pet. 2. Christus est rex & sacerdos: ergo omnes credètes sunt reges & sacerdotes. Ibidem. Sed huc cauendum est ne alias à capite ad membra, aut à membris ad caput congeramus ducamusque rationes, quam quas in Scriptura explicatas promptum est inuenire.

Huc referuntur comparata paria à corporali ad spirituale. Esaï. 8. 9. 35. 40. 42. 43. 44. 45. 48. 49. 52. 54.

Sic Apost. Rom. 4. de bonis spiritualibus & internis inter-

interpretatur quæ ad bona corporea, externa & temporalia referuntur. Genes. 15. de qua re fusius agit. Heb. 11.

Sunt etiam comparata paria à spirituali ad corporale.

Domus Dei spiritualis, quæ est Ecclesia siue congregatio credentium, debet in inuocatione diuini numinis indelinerenter occupari & exerceri: Igitur etiam templi materialis hic vñs esse debet, vt in eo pij orent. Mat. 12. Marc. 11. vide plura. Act. 17. 2. Cor. 6. Heb. 3.

Huc pertinet, Si contendamus quod illo obseruatum fuit tempore, etiam par esse vt hoc tempore obseruetur. An nescitis quod hi qui sacra operantur ex sacrificijs viuunt? qui sacrario assistunt vno cum sacrario partem accipiunt? Leuit. 2. 6. Sic & Dominus ordinauit, vt qui Euangelium annuntiant ex Euangelio viuant. 1. Cor. 9. Sic Ro. 9. docetur electio ex capite. Exod. 33. Miserebor. &c. Num secundum hominem hæc dico? an non & lex eadem dicit? Etenim in Mosis lege scriptum est. Deut. 21. Non obligabis os boui trituranti. Num boues curæ sunt Deo? an hoc propter nos omnino dicit? propter nos enim hoc scriptum est.

Præcipua comparatorum redundantia, in mathematicas artes facta est. Si quid enim magnum est aut difficile, in toto Euclide vel Archimede, & cæteris Mathematicis, id per rationes & proportionum præcipuè est declaratum. Itaque in rationum & proportionum doctrina octo axiomata primi libri, tum liber quintus totus, & septimi pars præcipua consumitur.

Par est ratio omnium astrorum & vnus: Luna autè rotunda esse docetur ex ijs quæ oculis nostris apparent: non est igitur dubium, quin cætera etiam rotunda sint. Arist. lib. 2. de Cælo. cap. 11.

Vt minores bona immobilia sine decreto Iudicis alienare non possunt: Ita nec furiosi nec prodigi bona immobilia sine iudicis decreto alienare non possunt. In emptione & venditione bona fides seruanda est, ergo in locatione & cõductione. De his vide plura in Topicis Cic.

Si propter modestiam probitatemque mercenarios milites ciuitate donatis, vt Strabonem & Charidemum, non eos milites mercenarios exterminabitis, qui nefaria scelera perpetrarunt? Arist. Rhet. lib. 2. cap. 22.

Atqui Calliclos, si vobis munire licet vestrum fundū: Nobis vtrique nostrum quoque licuit. Sin pater meus muniendo, vobis iniuriam fecit: & vos mihi nunc facitis iniuriam, sic muniendo. Demost. contrā Caliclem.

Huius verò loci sunt consecraria illa è contrarijs quidem orta, sed parium collatione tractata: vt Martialis illud,

*Tum seruum scis te genitum, blandēque fateris,
Cum dicis dominum, Sosibiane, patrem.*

Ouid. 1. Fast.

*In pretio pretium nunc est, dat census honores,
Census amicitias, pauper vbique iacet.*

Ex aduersis sunt frequentiora. Cice. pro Sylla. Neque verò quid mihi irascare, intelligere possum, si quod eum defendo, quem tu accusas, cur tibi quoque ipse non succenseo, qui accuses eum, quem ego defendo? Inimicum, inquis, accuso meum: & amicum (inquam) ego defendo meum. Sic 5. Tusc. Quod cum fateantur satis magnam vim esse in vitiis ad miseram vitam, nōne fatendum est eandem vim in virtute esse ad beatam vitam? Contraria enim contrariorum sunt consequentia. Sic interdū laceffiti par pari reponimus, qualis est Egl. 3. apud Virgilium contentio pastorum Damœtæ, primo hoc ænigma proponentis.

Dic

*Dic quibus in terris & eris mihi magnus Apollo,
Tres pateat celi spatium non amplius vlnas.*

Dic quibus in terris inscripti nomina regum.

Nascantur flores, & Phillida solus habeto.

Paria verò ficta sunt illa apud Æschinem Socraticum, quibus demonstrat Socrates cum Xenophontis vxore & cum Xenophonte ipso Aspasiā locutā. Dic mihi quæso Xenophōtis vxor, si vicina tua melius habeat aurum quā tu habes, vtrum illius an tuum malis? Illius, inquit. Et si vestem, & cæterum ornamentum muliebri pretij maioris habeat, quā tu habes, tuūmne an illius malis? Illius verò respondit: Age verò, si virum, illa meliorem habeat, quā tu habes, an illius malis? Hic mulier erubuit. Aspasia autem cum ipso Xenophonte sermonē instituit: Quæso, inquit, si vicinus tuus meliorem equū habeat quā tuus est, tuūmne equum malis an illius? Illius, inquit. Quod si meliorem fundum habeat, quā tu habes, vtrum tandem illius malis? Illius, inquit, meliorem scilicet. Quod si vxorem meliorem habeat, quā tu habes, vtrum illius malis? Atque hic Xenophon quoque ipse tacuit.

CAP. XVIII.

De Maioribus.

Imparia sunt, quorū quantitas non est vna.
Impar est maius aut minus: Maius est, cuius

E ij.

quãtitas excedit. Propriã notã sunt huius rationis. Non solùm, sed etiam Malo hoc quàm illud, Plusquam, item per comparationem Grammaticam, Cicero pro Muræna.

Tollitur è medio ---

non solùm ista verbosa simulatio prudentiæ, sed etiam illa domina rerum

--- sapientia: vi geritur res:

Spernitur orator ---

non solùm odiosus in dicendo, aut loquax, verùm etiam --- *bonus, horridus miles amatur.*

Hinc sumitur Logica quædã gradatio climaci rhetorico interdum coniuncta. Pro Milone. Neque verò se populo solùm, sed etiam Senatui tradidit: neque Senatui modò, sed etiam publicis præfidijs & armis: neque his tantùm, verum etiam eius potestati, cui Senatus totam Rempub. omnẽ Italiæ pubem, cuncta populi Romani arma commiserat. Iuuenalis Saty. 8. aduersus gloriosum nobilem.

*Malo pater tibi sit Thersites, dummodo tu sis
Æacida similis, Vulcaniæque arma capeffas,
Quàm te Thersita similem producat Achilles.*

Pro Marc. Plus admirationis habitura quàm gloriæ. Æneid. 1.

*O socij (neque enim ignari sumus antè malorum)
O passi graniora: dabit Deus his quoque finem.*

Cice. pro Mur. Noli tam esse iniustus, vt cum tui fontes vel inimicis tuis pateant, nostros

stros riuulos etiam amicis putes clausos esse oportere. Hinc illa gradatio est sine climache Rhetorico apud Terent.

Thr. *Magnas verò agere gratias Thais mihi?*

Gn. *Ingentes:* Thr. *Ain tu? Lata est?* Gn. *Non tã ipso quidẽ dono, quã abs te datũ esse: Id verò seriò Triumphat.*

Ficta verò maiora etiam plurimũ valent.

Terent. Heau.

Satrapes si fiet

Amator nunquam sufferre eius sumptus queat

Ne dum tu possis. 5. Æneid.

Magnanime Ænea, non si mihi Iuppiter auctor

Spondeat, hoc sperem Italiam contingere calo:

Mutati transuersa fremunt, & vespere ab atro

Consurgunt venti, atque in nubem cogitur aër:

Nec nos obniti contra, nec tendere tantũ

Sufficimus.

Commendat suam charitatem erga nos Deus, quod quum adhuc essemus peccatores, Christus pro nobis mortuus sit, iustificati igitur eius sanguine, seruabimur nunc multo magis per eum ab ira. Nam si quum inimici *Non solũ.* essemus, reconciliati fuimus Deo per mortem filij eius, *sed etiam.* multo magis reconciliati seruabimur per vitam ipsius, neq; id solũ, verum etiam gloriamur in Deo, per Dominum nostrum Iesum Christum, per quem nunc reconciliationem assequuti sumus. Rom. 5. 8.

Ago Deo meo gratias, quod magis quàm vestrũ *Malo hoc quã illud.* quiscumque linguas teneo peregrinas. Sed in concione malo quinq; verba sic eloqui, vt intelligatur oratio mea quò alios erudiam, quàm ignoto sermone mille verba. i. Cor. 14. 18.

Hebræi sunt: sum & ego: Israelitæ sunt? sum & ego:

E iij.

*Comp. à ma-
sors.*

*Si inaequaliū
alterū fuerit
tertiū inaequa-
le. & reli-
quum erit ei-
de inaequale.*

*Si inaequali-
bus aequalia
addantur, to-
ta reunt inae-
qualia.
Si quod vide-
tur minus in-
esse, inest &
quod maius.*

semen Abrahæ sunt? sum & ego. Ministri Christi sunt? (desipiens loquor) supero ego: infatigationibus, amplius: in vulneribus supra illos: in carceribus, amplius: in moribus, sæpe &c.

Maius in elementis Euclidis sub nomine totius explicatur, vt in 8. axiomate primi: & nomine multiplicis, vt 3. definitione quinti, & 5. septimi. Conferantur tria, Item alia tria cum duobus: si tria sunt inæqualia duobus, etiam illa altera tria erunt.

Item lumina Solis & Lunæ sint inæqualia: æqualia addantur vtrique reliquarum stellarum lumina, tot erunt inæqualia. Id est maius erit maius tanto, & minus tanto minus: detrahantur vtriq; æqualia eadem, reliqua erunt inæqualia: Id est vt antea maius perinde maius, & minus perinde minus.

Si in vrbe aquæ arcentur, etiam in vrbe fines regantur. Cicero in Topicis.

Dauid leonem arripuit atque interfecit: similiter occidit vrsam. Quidni, igitur, & Philistæum Goliath conficeret. 1. Sam. 17. Plura vide Io. 13. & 15. & 10. 1. Pet. 4. & 2. Pet. 2. & Mat. 6. Io. 7. & 4. Mat. 12. 1. Cor. 3.

Si in contractibus stricti iuris bona etiam fides interuenire debet: ergo multo magis in contractibus bonæ fidei, bona fides interuenit. Si is qui muros violauerit, capite plectendus est: ergo etiam qui loca sacra violauerit, capite plectetur.

Absurdum certè fuerit, nos ligna, lapides, & ferrum quæ voce & mente carent, si quem delapsa occiderint exterminare: & si quis seipsum occiderit, manum qui id fecit, seorsim à reliquo corpore sepelire: Demosthenem autem qui omnium postremam expeditione decreuit, qui milites perdidit coronare. Dem. aduersus Ctesiph.

C A P. XIX.

De Minoribus.

Minus est, cuius quantitas exceditur. Minus autem

autem sæpe indicatur proprijs notis, vt non solum, sed ne: potius hoc quàm illud: cum, tum. Item per Grammaticam comparationem: denique per negationem parium. Cice. 2. Catil. Nemo non modo Romæ, sed ne vlllo in angulo totius Italiæ oppressus ære alieno fuit, quem non ad hoc incredibile sceleris fœdus ascuerit. 1. Catil. vt exul potius tentare, quàm cōsul vexare Remp. possis. 2. Agr. Quæ cum omnibus est difficilis & magna ratio, tum verò mihi præter cæteros.

Ouid. 3. de Trist.

Senior es tristi Busiride, senior illo,

Qui falsum lento torruit igne bouem.

Ouid. 1. Remed,

Vt corpus redimas, ferrum patieris & ignes.

Arida nec sitiens ora lenabis aqua:

Vt valeas animo quicquam tolerare negabis?

At pretium pars hæc corpore maius habet.

Atque huius eiusdē speciei sunt hæ formulæ, quæ fiunt negatione parium. Phi. 9. Omnes ex omni ætate qui in hac ciuitate intelligētiā iuris habuerunt, si vnum in locum conferantur, cum Seruio Sulpitio non sunt conferendi. Cat. 2. Quanquam illi qui Catilinam Massiliam ire dicunt, non tam hæc queruntur quàm verentur. Pro Muræna, Quod enim fretum, quem Euripum tot motus, tantas, tam varias habere putatis agitationes, fluctuum quātas perturbationes & quātos ætus

E iiij.

habet ratio comitiorum ? Aliquando nota nulla est, Pro Marcel. Tantùm abes à perfectione maximorum operum, vt fundamenta, quæ cogitas, nondum ieceris. Pro Archia. Saxa & solitudines voci respondent: bestię sæpe immanes cantu flectuntur atque confidunt, nos instituti rebus optimis non poëtarum voce moueamur ? 7. Ver. Gradatio illa est à minoribus. Facinus est vincere ciuem Rom. scel⁹ verberare: propè parricidium necare: quid dicam in crucem tollere ? Finguntur etiam minora. Virgil. Egl. 1.

*Antè leues ergo pascentur in æthere cerni,
Et freta destituent nudos in littore pisces:
Antè pererratis amborum finibus, exul
Aut Ararim Parthus bibet, aut Germania Tigrim,
Quàm nostro illius labatur pectore vultus.*

2. Philip. O rem non modo visu fœdam, sed etiam auditu: Si inter cœnam, in tuis immanibus illis poculis hoc tibi accidisset, quis non turpe duceret ? In cœtu verò populi Rō. negotiū publicum gerens, magister equitum, cui ructare turpe esset, is vomens frustis esculentis vinum redolentibus gremium suum & totum tribunal impleuit.

Operibus lege diuina mandatis homo non iustificatur: Ergo multo minus humanis traditionibus. Ro. 3. Galat. 2.

Qui

Qui proprio filio non pepercit, sed pro nobis omnibus tradidit illum: qui fieri potest, ut non & cum eodem nobis omnia donet. Rom. 8.

Minus in Euclidis elementis pars aut partes appellatur. Pars, quando aliquoties sumpta restituit totum: secus partes appellantur, ut prima definitione quinti, & tertia quartæque definitione septimi.

Si maritus cum facere nihil possit, dotem soluerit, in ea causa est, ut repetere non possit: Ergo etiam quod nomine mariti qui soluendo non est, alius mulieri soluit, repetere non potest.

Si precibus paternis, ut possessionibus quas vi occupavit cedat, adduci non potest: Ergo ne amicorum precibus persuadebitur. Plura apud Ciceronem in Topicis.

Improbis atque impiis pater, numquam bonus erit Reipub. gubernator: & qui charissimos & coniunctissimos quosque non diligit, numquam vos alienos pluris faciet: & qui priuatim malus est, numquam futurus est publice bonus: quique domi sceleratus est, numquam in Macedonica legatione virum probum prebuit. Neque enim mores sed locum duntaxat mutauit. Æsch. contra Ctesiphont.

C A P, X X.

De Similibus.

Adhuc comparatio in quantitate fuit, sequitur comparatio in qualitate, qua res comparatæ quales dicuntur: nempe similes aut dissimiles. Similia sunt, quorum est eadem qualitas: similitudo proportio dicitur, ut similia proportionalia. Notæ similitudinis (quæ uno verbo concluditur) sunt, Similis, Effigies, More, Instar, Tanquam, Sicuti: tum

*Arist. in Philosophop. 15. c. 5.
in Categoria qualitatis. 14.
cap. 2. Topic. 1. Poster. or. c. 5. in Physic. cap. 6. lib. 9.*

negatio dissimilitudinis, Haud secus, non aliter. 1. Æneid.

Os humerósque deo similis. ---

9. Philip. Quanquam nullum monimētum clarius Seruius Sulpitius relinquere potuit, quàm effigiem morum suorum, virtutis, constantiæ, pietatis, ingenij, filium. 1. Trist.

*Namq, ea vel nemo, vel qui mihi vulnera fecit,
Solut Achilleo tollere more potest.*

In Pis. Vnus ille dies mihi quidem instar immortalitatis fuit, quo in patriam redij. Verr. 1. Sed repentè è vestigio ex homine, tanquam aliquo poculo Circeo, factus est Verres. Pro Pompeio, Itaque omnes quidem nunc in his locis Gn. Pompeium sicut aliquem non ex hac vrbe missum, sed de cælo delapsum intuentur. 3. Æneid.

Haud secus ac inssi faciunt. ---

Terentius in Phor.

Ego isti nihilo sum aliter, ac fui.

Similitudinis partes deinceps explicantur, & quidem disiunctè vel continuè. Similitudo disiuncta est, quando termini quatuor re ipsa distinguuntur. Ecl. 5.

*Tale tuum carmen nobis diuine pœta,
Quale sopor fessis in gramine. ---*

At dicet aliquis, quomodo suscitantur mortui? quali autem corpore prodeunt? Demens quod tu seminas nō viuiscit nisi mortuum fuerit, & quod seminas, nō corpus
oritu-

oriturum seminas, sed nudum granum, prout inciderit, tritici aut alicui⁹ ex reliquis granis, sed Deus dat ei corpus &c. Ita & in resurrectione mortuorum: seminatur corpus corruptioni obnoxium, excitatur incorruptum. &c. 1. Cor. 15. 35.

Xenophanes dicebat simili modo impios esse illos, qui dicerent deos esse natos, atq; eos qui dicerent deos interire, nam utrôque modo fit, vt dij aliquando non sint Aristot. lib. Rhet. 2. Cap. 22.

Sicut porcum non ornat monile appensum naribus, vel si aureum sit: Ita forma non prodest mulieri, si destituta recto iudicio illa abutatur. Prou. 11.

Quemadmodû linea cui⁹ finis est & terminus, immensa esse non potest, sed ea demùm quæ immensam habet longitudinem, sic etiam extremitas, qua ex parte est terminus, non potest. Aristot. Lib. 1. de Cælo. Cap. 5.

In vniuersum quidem de illis Hip. & Plato disfinierûnt quæ errores & dubitationes vel optimis quibûsque medicis exhibere consueuerunt. At, Plato in hûc modum: Primûm, inquit, debet ille qui alios fallere, se à nullo falli vult, similitudinem & dissimilitudinem rerum optimè tenere. Hippocrates verò scriptum in prælagijs reliquit: In acutis morbis ad hunc modû contemplari debemus. Primum an ægrotantis facies, valèrium faciebus, & precipuè ipsa sibi ipsi similis sit. Optimum enim hoc est in ægrotante iudicium: sicuti pessimum est, cum longè à similitudine diuersa conspicitur: vt. Nasus acutus, oculi caui, &c. Gal. de Dogmat. Plat. & Hip. Lib. 9. De hac re vide plura apud Gal. in Commentarijs ad ea quæ in medicatrina fiunt, vbi hoc axioma apud Hip. extat: Similia an dissimilia sint à principio inspiciendum. Vide etiam lib. de Articulis.

Quemadmodum si in vrbe de finibus cõrouersia est, quia fines magis agrorum videntur esse quàm vrbus, finibus regendis adijcere arbitrium non possis: Sic si aqua pluuiæ in vrbe mouet, quoniam res tota magis agrorum est, aquæ pluuiæ arcendæ adijcere non possis arbitrium. Cicer. in Top.

Carmen ad auditorem, vt sopor ad fessum, termini quatuor distincti sunt. Ad Frat. 1. Quemadmodum gubernatores optimi vim tempestatis, sic sapientissimi viri fortunæ impetum persæpè superare nō possunt. Hic quatuor sunt item termini, vt gubernator ad tempestatem, sic sapiens ad fortunam. 1. Trist.

*Scilicet vt fuluum spectatur in ignibus aurum,
Tempore sic duro est inspicienda fides.*

Cice. 2. Phil. Sed nimirum vt quidam morbo & sensus stupore, suauitatem cibi nō sentiunt: sic libidinosi, auari, facinorosi, veræ laudis gustum non habent. Virgilius fecerat hos versus,

*Noctē pluit tota, redeunt spectacula manè:
Diuisum imperium cum ioue Caesar habet.*

Batyllus arrogauerat sibi, præmiūque magnum erat adeptus. His igitur similibus Batyllum Virgilius lusit,

Hos ego versiculos feci, tulit alter honores:

Sic vos non vobis nidificatis aues.

Sic vos non vobis mellificatis apes:

Sic vos non vobis vellera fertis oves:

Sic vos non vobis fertis aratra boves.

Aliquando nulla prorsus est nota. Ecl. 2.

O formosè puer, nimium ne crede colori,

Alba lignustra cadunt, vaccinia nigra leguntur.

*Similitudo
disiuncta.*

AT qui inania quæ sonum ædunt, siue tibia sit, siue cithara, nisi distinctionem sonis dederint, quomodo cognoscetur quod tibia canitur aut cithara? Etenim si
incer-

incertum sonum tuba dederit, quis apparabitur ad bellum? Ita & vos nisi per linguam bene significantem sermonem edideritis, quomodo intelligetur quod dicitur? eritis enim in aërem loquentes. 1. Cor. 14. 7.

Vxores subditæ sitis vestris viris, quemadmodum Sara Abrahamæ, dominum illum appellans. 1. Pet. 3.

Boni pastoris est nosce oves pertinentes ad ouile suum: Igitur & Episcopus siue ecclesiæ doctor, notiam habere debet suorum auditorum. Io. 10. 1.

Rursus ouium gregem nemo committit rei pecuariæ ignaro: ergo ad Ecclesiæ gubernationem non prouehetur rerum spiritualium & diuinarum imperitus. vide plura. Ephes. 5.

Continua similitudo est, quando est, vt primus terminus ad secundum, sic secundus ad tertium. 3. Leg. Videtisne magistratus hanc esse vim, vt præsit, præscribat recta & vtilia & coniuncta cum legibus? vt enim magistratibus leges, ita populo præfunt magistratus. Hic termini sunt tres: lex, magistratus, populus.

Imitatores mei estote, quemadmodum ego sum Christi. 1. Cor. 11. Similitudo continua.

Ficta similitudo parem vim habet superioribus illis: sed præcipuè in hac explicata similitudine Æsopici apologi excellunt. Horat. 1. Epi.

*Quod si me populus Romanus fortè roget, cur
Non vt porticibus, sic iudiciis fruatur isdem,
Nec sequar, aut fugiam qua diligit ipse, vel odit
Olim quod vulpes egroto canta leoni*

*Respondit, referam : quia me vestigia terrent
Omnia te aduersum spectantia, nulla retrorsum.*

*Ficta simili-
tudo.*

Huc referri debet parabolarum turba, cum adducitur res ficta, verò tamen similis. Sic Apostolus. Rom. 9. 20. docet non posse accusari Deum iniustitiæ, quod hominē aliquē reprobet, sumpta similitudine ficta de figulo qua prius vsus est. Esaias Cap. 45.

O homo, tu qui es, qui ex aduerso responsas Deo? num dicet figmentum fictori? cur me talem fecisti? an nō habet potestatem figulus in lutum, vt ex eadem massa faciat aliud quidem vas ad decus, aliud verò ad dedecus? Plura de hoc Topico, vide Math. 13. 21. 24. Marc. 4. Luc. 8. 14. 15. 19.

Finge mancipio aliquem dedisse id. quod mancipio dari non potest, num idcirco id eius factum est qui accepit? aut num is qui mancipio dedit ob eam rem se vlla re obligauit? Cicer. in Topicis.

C A P. XXI.

De Dissimilibus.

*Arist. in Ca-
tegor. quali-
tatis. in Top.
c. 14. lib. 1.*

Dissimilia sunt comparata, quorum qualitas est diuersa. Dissimilitudinis propriæ notæ sunt, dissimile, dispar, differens, aliud, secus. pro Plā. Quanquam dissimilis est debitio pecuniæ & gratiæ. Ennius,

*Cice. 1. Offi-
cior.*

*O domus antiqua, heu quàm dispari domina-
re domino.*

Cæsar 1. bell. Gall. Hi omnes lingua institutis, legibus inter se differunt. 2. Agar. Alio vultu, alio vocis sono, alio in cessu esse meditabatur. Cic. 2. Nat. Quoniam cœpi fecus agere atque initio dixeram. Dissimilitudinis
notæ

notæ etiam sunt per negationem similium. 3.
de Orat. Non est philosophia similis artium
reliquarum. 2. Æneid.

At non ille, satum quo te mentiris, Achilles,

Talis in hoste fuit Priamo.----

Horat. 1. Epist.

Non eadem est ætas, non mens. ----

1. ad Frat. Sit annulus tuus, non tanquam
vas aliquod, sed tanquam ipse tu. 3. Phil. Cer-
tus dies non ut sacrificij, sic consilij expectari
solet. Hoc argumento pastor ille errorem suū
confitetur:

Urbem (quàm dicunt Romam) Melibœe, putavi

Stultus ego, huic nostræ similem. -- Et mox,

Sic canibus catulos similes, sic matribus hædos.

Noram, sic parvis componere magna solebam.

Ut nec canibus catuli, nec matribus hædi,
sic nec Mantua Romæ similis est. Nota plæ-
rūnque nulla est, & dissimilitudo plenius ex-
plicatur. Quintil. lib. 5. c. 11, Brutus occidit
liberos prodicionem molientes. Manlius vir-
tutem filij morte mulctauit. Catullus.

Soles occidere & redire possunt:

Nobis cum semel occidit brevis lux,

Nox est perpetua una dormienda.

Mat. 11. Tyrannus non potest perdere nisi corpus: at
Deus potest perdere & corpus & animam: ex quo col-
ligitur Deum esse timendum præ omnibus hominibus.

Hypocritæ dant ælemosynas in conciliabulis & vicis,
ut glorificentur ab hominibus: Pij verò impendunt æ-

lemosynas in occulto, vt sinistra manus quid faciat dextra ignoret: itaque hi mercedem accipient à Deo, illi ab hominibus: vide plura Matth. 8. Luc. 9. Item, 2. Corin. 3. Heb. 7. 8. 9. de dissimilibus legis & Euangelij: sacerdotij Christi, & legalis sacerdotij.

*Deus nulla
rei similis.*

Mortalium è rebus Deum seungito

Neque similem unquam eum tibi esse credito. Aeschylus.

Hinc illa Antisthenis argumentatio aduersus simulachrorum cultum: Deus nulli est similis: ergo non potest ex imagine cognosci.

*Piorum &
Impiorum dis
similitudines.*

Qui iniustitiam pluris faciunt, & summum bonum in eo ponunt, vt alienis bonis potiantur: eos similes esse vi-
deo, feris quæ inescantur: ac initio quidem his quæ præ-
hendunt, cum voluptate frui, sed paulò post in maximis
esse malis. Eos autem qui pietatem & iustitiam colunt,
& perpetuò in tuto esse, & de reliquo æui spatio spem
habere meliorem. Isocrat. de pace.

Non quemadmodum quod mulieri debes, rectè ipsi
mulieri sine tutore auctore soluas: Ita quod aut pupillæ
aut pupillo debeas, rectè possis eodem modo soluere.
Cicer. in Topicis.

C A P. X X I I.

De Coniugatis.

*Arist. 2. cap.
2. Topic. & 4.
c. 3. & 2. c. 7.*

Hactenus prima argumenta sunt exposita,
sequuntur orta de primis, quæ perinde sunt
ad id quod arguunt, sicut prima, vnde oriun-
tur: vt coniugata & notatio: distributio &
definitio. Coniugata sunt nomina ab eodem
principio variè deducta, vt iustitia, iustus, ius-
tè. In coniugatis symbolum est cõsentaneo-
rum argumētorum. Propertius libro secundo:

*Libertas quoniam nulli iam refert amanti,
Nullus liber erit, si quis amare velit.*

Hic

Hic libertas caussa est, cur sis liber. Cice. 3. de Nat. Deorum, cum de Dionysio Tyranno loquitur: Iam mensas argenteas de omnibus delubris iussit auferri, in quibus quod more veteris Græciæ inscriptum esset, Bonorum Deorum, vticorum bonitate velle se dicebat: Dij boni sunt: eorum igitur bonitate est vte- dum. Hic ex effectis ad causas est disputa- tum. Terent.

Homo sum, humani à me nihil alienum puto.

Ex subiecto est ad adiunctū. Contrà Phil. 2. Non tractabo vt Consulem, ne ille quidem me vt Cōsularem. In Pison. Cū esset omnis illa caussa Consularis & Senatoria, auxilio mihi opus fuerat & Consulis & Senatus.

Si verè discipuli mei eritis: Cognoscetis veritatem. Io. 8. 31.

Qui à Deo est, Dei verba audit. Vos ideò non audi- stis, quia à Deo non estis. Io. 9.

Arrium illi sequuntur: Ergo Arriani sunt.

In Nestoris sceleratam sectam nomē dederunt: Ergo Nestoriani sunt.

Si pluuiam aquam eo modo intelligeremus, quàm imbri collectam videmus, veniret Mulus, qui quia con- iugata verba essent pluuiæ & pluendo, diceret omnem a- quā oportere arceri, quæ pluendo creuisset. Cic. in Top.

Si compascuus ager est, ius est capefcere. Cic. in Top.

Stipulari est facere: ergo stipulatio est factum.

Iustitiam colūt iurisperiti: ergo iuris sacerdotes sunt.

CAP. XXIII.

De Notatione.

Notatio est nominis interpretatio: nomina-

*Plato in Cra-
tylo. Cicero in
Topicu.*

siquidem sunt notæ rerum, nominumque vel deriuatorum, vel compositorum, si vera notatione fiant, ratio reddi potest ex aliquo argumento primo: vt homo ab humo. Ouid. 6. Fast.

Stat vi terra sua, vi stando uesta vocatur.

Ex caussa est notatio:

At focus à flammis & quod sonet omnia dictus.

Ex effectis est notatio:

Itē 4. Ver. O Verrea præclara: Quo enim accessisti, quo nō attuleris tecum istum diem? Etenim quam tu domum, quam urbem adiisti, quod fanum denique, quod non euersum atque extersum reliqueris? Quare appellentur sanè ista Verrea, quæ non ex nomine, sed ex moribus naturæque tua constituta esse videantur. Ex effectis item est notatio. Ouid. 1. Fast.

Prima dies tibi Carna datur, dea cardinis hæc est,

Nomine clausa aperit, claudit aperta suo.

Hic est notatio è subiecto cardine, circa quæ numen deæ exercetur. At ex adiunctis notatio est Bambalionis 2. Phili. quia balbus & stupidus: hinc igitur cauillatio in Antonium generum. Tuæ coniugis, bonæ scæminæ, locupletis quidem certè, Bambalio quidam pater, homo nullo numero, nihil illo contemptius: qui propter hæsitantiam linguæ stuporémque cordis cognomen ex contumelia traxerit. Ex adiunctis est notatio. E dissentaneis autem

autem sunt illa apud Quintilianum, libro primo capitè sexto *Lucus*, quia *umbra opac*^o, parum luceat: & *ludus* quia sit longissimè à *lusu*: & *Dis* quia minimè diues. Potest etiam è comparatis esse notatio: vt *Pyropus* quod ignis flammam imitetur. Est verò vt notationi ad suum nomen, sic nomini ad notationem sua affectio: vt *Animi* plenus, ergo *animosus*, & contrà, *Animosus*, ergo *animi* plenus.

Author *Epistolæ ad Hebreos* cap. 7. in disputatione de abrogatione sacerdotij *Leuitici* atque legis, & æterna successione sacerdotij *Christi* & *Euangelij*, astruit de *Christo* cecinisse vatem. *Psal.* 110. Tu es sacerdos in æternum secundum ordinem *Melchisedech*. Quo autem fidem faciat, argumento sumpto à notatione nominis, vel ab etymologia euincit, verba illa in *Christum* competere: *Melchisedech* inquit erat rex *Salem* & pontifex Dei altissimi, & ex interpretatione nominis *Melchisedech* dicitur rex iustitiæ. Deinde rex *salè*, idem est quod rex pacis: atque hæ appellationes si rectè expendamus, vni *Christo* iustitiæ atque pacis authori præ omnibus conuenit. *Christus* igitur sacerdotio eterno fungitur, cui verus illud *aronicum* cedere debet.

Emanuel si interpretetur sonat nobiscū *Deus*. *Mat.* 1. Sed hoc est verum *Christi* nomen. *Esa.* 7. Ergo *Christus* est verus *Deus*. Vide plura *Genes.* 27. de nomine *Iacob*. & *Exod.* 2. de *Mosis* nomine &c.

Cum lex *Ælia* Sactia assiduo vindicem assiduū esse iubet, locupletem iubet locupleti. Locuples enim assiduus, vt ait *Ælius*, appellatus est ab ære Dando. *Cicer.* in *Topicis*.

Plebiscitum dicitur quod *plebs plebæio* magistratu interrogante, veluti tribuno, constituebat. Testamētum ex eo dicitur, quod testatio mētis sit. *Instit.* Lib. 2. *Tit.* 10.

Non de meo fit tuum: ergo mutuum non exitit.

Lator est huius Topici vsus in sacra pagina, vtpote cum à communi & vulgata significatione argumentum ducitur.

Huius generis est illud ad Rom. 4. quo asseritur gentes esse filios Abrahæ, probatione ducta à promissione Abrahæ facta. Dictum est, inquit, Patrem multarum gentium constitui te. Sic ergo concionatur. Abrahamus est pater multarum gentium: Igitur & gentes quoque sunt filij Abrahami.

Huc refer illud Sophoclis.

Ferrea verè diceris, nam ferrea es.

Et illud Herodici: Thrasymache, semper Thrasymachus es: & tu Pole semper Polus es. Idem Draconem legislatorem simulabat, quòd eius leges, non hominis, sed Draconis essent: erant enim asperæ. His adde illud Euripidis: aduersus Venerem:

*Accommodatum nomen est tibi inditum,
Regina dementia cum tu sola sis.*

Et Chæremonis de Pentheo dictum.

Penthaus futura sortis agnomen tulit.

C A P. XXIIII.

De Distributione.

*Arist. 32. c.
1. poster. & 5.
14. 16. cap. 3.
poster.*

*Arist. 33. c.
2. prior. 10. c.
1. Topic.*

Reliquum est ex ortis aliunde argumentis argumentum distributionis & definitionis: in qua vtraque affectio reciprocationis est, illic partium omnium cum toto, hinc definitionis cum definito. Distributio est cum totum in partes distribuitur. Totum est, quod continet partes. Pars est, quæ continetur à toto. Atque vt distinctio totius in partes, distributio sic collectio

lectio partium ad constituendum totum, inductio dicitur.

Distributio sumitur ex argumētis toti quidem consentaneis, inter se autem dissentaneis. Itaque tanto accuratior erit, quanto partium & cum toto consensio, & inter se dissensio maior fuerit.

CAP. XXV.

De Distributione ex causis.

Distributio prima est ex absolutè consentaneis, causis nempe & effectis. Distributio ex causis est, quando partes sunt causæ totius. Hic distributio integri in sua membra præcipuè laudatur. Integrum est totum, cui partes sunt essentielles: membrum est pars integri. Sic Grammatica in etymologiam & syntaxim, Rhetorica in elocutionem & actionem, Dialectica in inuentionem & iudicium diuiditur. Ab his enim partibus artes illæ cōstituuntur. Hæc distributio principalis est, cū rei longioris explicatio suscipitur. i. Georg.

Arist. in Philosoph. 26. c. lib. 5.

*Quid faciat letas segetes, quo sidere terram
Vertere Mæcenas, vlmisque adiungere vites
Cōueniat: quæ cura bonum, quis cultus habēdo
Sit pecori, atq; apibus quanta experiētia parcis,
Hinc canere incipiam. ----*

Cice. pro Mur. Intelligo (iudices) tres totius accusationis partes fuisse. & earum vnam in reprehensione vitæ, alteram in contentione

dignitatis, tertiam in criminibus ambitus esse versatam. Quin etiam aliter tractatur hoc argumenti genus, vel à partibus ad totum, vel à toto ad partes. Catullus:

*Quintia formosa est multis: mihi candida, longa
Recta est: hæc ego sic singula confiteor:
Totum illud, formosa, nego: nam nulla venustas,
Nulla in tam magno est corpore mica salis.
Lesbia formosa est: quæ cum pulcherrima tota est
Tum omnibus una omnes surripuit Veneres.*

*A toto ad
partes affirmat.*

Timotheum profert ac tuetur sanam doctrinam: Igitur profert & tuetur legem & Euangelium. &c.

*A toto ad
partes negat.*

Filius Dei condidit omnes creaturas: Igitur condidit inuisibiles, siue cœlestes, & visibiles siue terrenas.

*Divisio à causa
materiali.*

*A toto ad
partes.*

Nulla scriptura docet filium Dei debere pati pro Angelis lapsis: Igitur neque Lex, neque Prophetæ, neque Psalmi, neque Apostoli, neque Euangelistæ hoc docer.

Febrium aliæ biliosæ aliæ pituitosæ. &c.

Sempronius mihi domum suam vendidit: Ergo & omnes parietes, omnia cubicula, omnia vaporaria mihi vendidit.

*A partibus
ad totum.*

Item Emptio, venditio, locatio, conductio, societas, mandatum, solo consensu contrahentium ineuntur, nec constat alias obligationes, huius farinæ aliter contrahi: Ergo omnes obligationes, quæ consensu contrahuntur, solo consensu contrahentium contrahuntur.

*Divisio à causa
finali.*

Interdictorū quædam adipiscendæ possessionis causa comparatæ sunt, quædam retinendæ, quædam recuperandæ. Inst. lib. tit. 15.

Item Actiones rei persequendæ gratia comparatæ sunt, quædam pœnæ persequendæ, quædam mixtæ sunt. Inst. lib. 4. tit. 6.

De hoc Topico in Iure ciuili, vide Cic. in Top.

Non

Non est grammaticus: quoniam Syntaxin non nouit, non Rhetor: quoniam eloquutionis imperitus est. Tu ne dialecticus: qui neque inueniendi rationem, nec iudicandi noueris?

In tres partes distribuitur dies cùm violatarum legum actio proponitur. Nam prima aqua accusatori & legibus infunditur, ac libertati. Secunda aqua rēo & eis qui in ipsam rem dicturi sunt: quod si primo suffragio non soluta fuerit legum violatio. Iam tertia aqua infunditur æstimationi multæ & magnitudini vestræ iracundiæ. Æschynes: dedit præteritum tempus bono viro multas declarandæ beneuolentiæ suæ occasiones: in quarum nulla te fuisse constat, non primum, non secundum, non tertium, non quartum, non quintum, non sextum, non denique vlllo in numero: non certè cum patriæ opes auferentur. Nam quæ societas tua opera est inita cum Re-pub. quod latum auxilium? quæ parta beneuolentia aut gloria? quæ obita legatio? quod ministerium, per quod Respub. facta sit honoratior? quid nostrarum quid græcanicarum rerum, aut hospitalium quibus præfuisi, per te correctum? quæ triremes? quæ arma? quæ naualia? quæ murorum instauratio? qui equitatus? quæ denique vllis in rebus tui fuit vtilitas? quod vel locupletibus, vel tenuibus ciuile & æquum per te latum est pecuniæ auxilium? nullum. Demost. pro Corona.

CAP. XXVI.

De Distributione ex effectis, ubi de genere & specie.

Distributio ex effectis est quando partes sunt effecta: vt in naui nautæ alij malos scandunt, alij per foros cursitant, alij sentinam exhauriunt, gubernator autem clauum tenet in puppi. Distributio generis in species hîc ex-

De genere & specie Porphyrius in categoremat. Arist. in Category & 15. c. 2. poster. in Topic. lib. 4.

cellit. Genus est totū partibus essentialē. Species est pars generis: Sic animal genus hominis & bestię dicimus. Animal enim est totum, cuius essentia, nempe corporea, animata, sentiēs, ad bestiam & hominem communiter attingit. Sic dicimus hominem & bestiam species animalis, quia partes sunt animali subiectę, quę animalis essentiam communem habent. Sic dicimus hominem, genus hominum, singulorum, & leonem, singulorum leonum: contrā verò singulos homines, species hominis, singulos leones, leonis. Genus est generalissimum aut subalternum. Species subalterna aut specialissima. Genus generalissimum, cuius nullum est genus: vt in Logica inuentione, Argumentum est genus, generalissimum artificialium & inartificialium.

Subalternum genus, vt subalterna itē species, quod species huius, illius autem genus est: vt causa, species est argumenti absolute consentanei, genus materię & formę. Species specialissima, quę est indiuidua in species alias, vt materia & forma singulares. Genus verò & species notę sunt causarū & effectorum: vt in animali est essentia corporea, quę materia est ad species communiter attingens: tum facultas vitę & sensus, quę forma item communiter ad species spectat. Quare genus continet causas, quę communiter ad ipsius species attingunt: contrā itaque etiam species effe-

effecta generis sui continent. Hinc vniuersale est insigne ac præstabile, quia causam declarat. Distributio generis in species valdè quidem excellit, sed difficilis est & rara inuentu. Attamen illustrationis & exempli gratia afferemus, quod poterimus. Ouid. 1. Metamor. diuidit animal in quinque species, stellas, aues, bestias, pisces, homines: stellis animam tribuit, vt etiam philosophi tribuere,

*Neu regio foret vlla suis animalibus orba,
Astra tenent caeleste solum formaq; deorum,
Cesserunt nitidis habitanda piscibus undæ:
Terra feras cepit, volucres agitabilis ær.
Sanctius his animal mentisque capaciùs alta
Deerat adhuc, & quod dominari in cætera posset,
Natus homo est. ---*

Sic Cice. 1. Offic. Virtutem diuidit in species quatuor, prudentiam, iustitiam, fortitudinem, temperantiam. Sed omne, quod honestum est, id quatuor partium oritur ex aliqua: aut enim in perspicientia veri solertiaq; versatur, aut in societate hominũ tuenda,tribuendoque suum unicuique, & rerum cõtractarum fide, aut in animi excelsi atque inuicti magnitudine ac robore, aut in omnibus, quæ fiunt, quæque dicuntur, ordine & modo, in quo inest modestia & temperantia.

Idolum nihil est: nõ est Deus igitur Idolum Moloch. Idolum Baal, Idolum Beelsebub. 1. Cor. 8.

Omnis trianguli, quicuis duo anguli duobus rectis

sunt minores: sed scalenus Δ est triangulus, cuius ergo duo anguli scaleni sunt duobus rectis angulis minores.

Febre laborat: ergo vel tertiana, vel quartana, vel ardenti. &c.

Quoniam argentum omne, mulieri legatum est, non potest ea pecunia quæ numerata domi relicta est, non esse legata. Forma enim à genere quoad suum nomen retinet, numquam sciungitur. Numerata autem pecunia nomē argenti retinet: legata igitur videtur. Cic. in Top.

Omnia ornamenta muliebria vxori legauit: ergo & in aures, armillas vxori legauit. Vsurā non est licita: ergo nec centesima usura: ergo nec menstrua usura, ergo nec annua usura est licita.

Distributio generis in formas specierū eadem est, quia formæ cum genere constituunt suas species: vt animalium aliud loquens, aliud mutum. Genus & species non solum tractantur hac simplici diuisionis formula, sed etiam separatim alterū ex altero. Pro Archia, Ac ne quis à nobis hoc ita dici fortè miretur, quòd alia quædam in hoc facultas sit ingenij, atque hæc dicendi ratio aut disciplina: nec nos quidem huic cuncti studio penitus vnquam dediti fuimus. Etenim omnes artes, quæ ad humanitatem pertinent, habēt quoddam commune vinculum, & quasi cognatione quadam inter se continentur. Ars est genus: poetica & eloquentia sunt species. Contrà genus tractatur per species, vt 4. de Trist.

Materiamq; tuis tristem virtutibus imple:

Ardua per præceps gloria vadit iter.

Hæciora

Hectora quis nosset, fœlix si Troia fuisset?

Publica virtutis per mala facta via est:

Ars tua Tiphys iacet, si non sit in equore fluctus:

Si valeant homines, ars tua, Phœbe, iacet.

Quæ latet, inq, bonis cessat non cognita rebus,

Apparet virtus, arguiturque malis.

Exempla igitur specialia suo generi accommodata sunt huius loci. 7. ad Attic. Urbem tu relinquis? ergo idem si Galli venirent? Nō est (inquit) in parietibus Respub. at in aris & focis: fecit idem Themistocles: fluctum enim totius barbariæ ferre vrbs vna non poterat. At idem Pericles non fecit, annum ferè post quinquagesimum, cum præter mcenia nil teneret: nostri olim vrbe reliqua capta, arcem tamen retinuerunt.

Si Christus prædicatur à mortuis resurrexisse, quomodo dicunt quidam inter vos, non esse resurrectionem mortuorum? Porro si resurrectio mortuorum nō est, ne Christus quidam, resurrexit. 1. Cor. 15.

Si est species, est etiam genus. Si non est genus, neque est species.

Paulus Rom. 4. ab vno Abrahamo colligit omnem hominē fide iustificari absque operibus. Scriptura dicit: Credidit Abraham Deo, & imputatū est ei ad iustitiam. Addit postea, Scriptum id esse propter nos. Idem ad Hebræos pluribus singulis enumeratis idē dogma astruit.

Trianguli, quivis duo anguli duobus rectis angulis sunt minores: ergo alicuius figuræ, quivis duo anguli duobus rectis angulis sunt minores.

Tertiana laborat, vel quartana: ergo febre laborat.

Si ita Fabij pecunia legata est à viro, si ea vxor materfamilias esset, si ea in manum viri non conuenerit nihil debetur. Genus est enim Vxor: eius duæ formæ: vna

matrum familias, hæ sunt quæ in manum conuenerunt : Altera earum quæ tantummodò vxores habentur. Qua in parte cum fuerit Fabia, legatum ei non videtur. Cicero in Topicis. Si consul est, certè magistratus: Si stipulatio, profecto obligatio: Si venditio, contractus: Si furtum, ergo maleficium.

C A P. XXVII.

De Distributione è subiectis.

Reliqua distributio est quodammodo cōsentaneorum, vt subiectōrū & adiunctōrum. Distributio è subiectis est, cum partes sunt subiecta, vt apud Catul.

*Virginitas non tota tua est: ex parte parētum est,
Tertia pars matri data, pars data tertia patri:
Tertia sola tua est: noli pugnare duobus,
Qui genero sua iura simul cum dote dederunt.*

Sic Cic. 5. Tuscu. Sint enim tria genera bonorum, vt iam à laqueis Stoicorum, quibus vsum me pluribus quàm solco, intelligo, recedamus. Sint sanè illa genera bonorū, dum corporis & externa iaceant humi, & tantummodo quia sumenda sunt, appellantur bona. Alia autem diuina illa longè latèque se pandant, cœlūmq; contingant, vt ea qui adeptus sit, cur eum beatum modò & non beatissimum dixerim?

Fortis est popul⁹ qui incolit eam regionem, & vrbes
Distribut. à munitæ sunt, & magnæ admodum: ad hæc filios Anac
subiecto loco. vidimus ibi. Amalech habitat in terra Meridiana & Heth-
 thæus & Iebusæus, & Emoræus habitant in montibus:
 Che-

Chananaeus verò habitat iuxta Mare, & ad ripā Iarden.

Febre laborat: ergo illa febris vel est in solidis partibus, vt hectica: vel in spiritibus vt diaria: vel in humoribus vt putrida.

Omnium autem actionum quibus inter aliquos apud iudices arbitrōsue quacunque re queritur, aut enim in rem sunt, aut in personam. Inst. tit. de actionibus.

CAP. XXVIII.

De Distributione ex adiunctis.

Distributio ex adiunctis est, quando partes sunt adiuncta: vt hominum alij sani, alij ægri, alij diuites, alij pauperes. Sic Virg. 1. Geor. mundum diuidit in quinque partes, mediam torridam, duas extremas frigidās, & reliquas duas temperatas:

*Quinque tenent calū zonæ, quarum una cornū
Semper Sole rubens, & torrida semper ab igni:*

*Quam circū extrema dextra laeuāque trahūtur
Cerulea glacie concreta, atque imbribus atris:*

Has inter mediāque duæ mortalibus agris

Munere concessæ diuum. ---

Cæsar 1. belli Gal. Gallia est omnis diuisa in partes tres, quarum vnam incolunt Belgæ, aliam Aquitani, tertiam qui ipsorum lingua Celtæ, nostra Galli appellantur.

Hominum alij Iudæi, alij Græci. Neque Iudæi neque Græci culpa vacant. Rom. 3. Igitur nulli homines culpa vacant coram Deo.

Linearum alia recta, alia circularis, alia mixta, Item superficierum alia plana, alia circularis, & sphærica. Nu-

merorum alius par alius impar.

Febrium alia sicca alia humida, alia vaporosa.

Summa itaque diuisio de iure personarum hæc est, quòd omnes sint aut liberi aut serui. Inst. lib. 1. tit. 3.

Arbitror vos omnes id mihi assensuros, hæc in viro populari esse oportere. Primùm, vt sit & à Patre & à matre ingenuus: ne ob generis infœlicitatem sit inimic⁹ legibus, quæ libertatem populi tuentur. Secundo loco, vt à maioribus eius aliqua sint in Remp. beneficia collata: quòd summè necessarium est, nullæ vt cum Repub. eis inimicitia intercesserint: ne maiorum suorum calamitates vlciscendo malefacere instituat ciuitati. Tertio, in quotidiana ratione victus, natura tēperantem & moderatum esse oportet: ne ob pecuniæ profusionem, pecuniam accipiat contrà populum. Quarto, beneuolum & eloquentem: nam præclara res est, si & animus optima quæq; instituit, & disciplina oratoris atq; oratio audientibus persuadeat: alioqui beneuolentia semper est eloquentiæ præferenda. Quinto, animo forti esse prædictum, vt ne in dubijs rebus & bellis populum deserat. Considerate igitur quid horum insit in Demosthene, isti pater fuit. &c. quæ omnia eodem refellit, quo proposuit ordine.

C A P. XXIX.

De Definitione.

*Arist. 28. c. 1.
prior. & toto
serè 2. poster.
in c. 5. & 6.
& in 7. lib.
Topic.
Plato in Thea-
reto.
Arist. 6. c. 7.
lib. de Philoso.
& 4. c. 1. Top.
Cicer in Top.
Arist. 10. c. 2.
poster. & 4.
Top. 1.
Quinti. lib. 5.
cap. 10.*

Definitio est, cùm explicatur quid res sit, eaque vicissim definito argui potest. Definitio est perfecta aut imperfecta: Illa, propriè definitio: hæc, descriptio dicitur. Definitio perfecta, est definitio constans è solis causis essentialibus constituentibus: quales causæ genere & forma comprehenduntur. Atque hoc modo definitur homo, animal rationale: Nempè

Nempè genere (animal) intelligimus (vt dictum est) essentiam corpoream plenam vitæ & sensus, quæ materies hominis est, & pars formæ: cum qua si addas (rationale) totam formam hominis comprehendes, vitæ, sensus, rationis facultate. Itaque perfecta definitio nihil aliud est, quàm vniuersale symbolum, caussarum essentiam rei & naturam constituentium. Tales definitiones sunt artiũ: Grammatica est ars benè loquendi: Rhetorica benè dicendi: Dialectica benè differendi: Arithmetica benè numerandi: Geometria benè metiendi.

Paulus ad Hebræos. 11. Præclarum dogma inculcat fide nimirum accipi iustitiam, & bona spiritualia in hac vita, & gloriam in futura. Nos inquit nō sumus qui subducamus nos in perditionem, sed ad fidem pertinemus in acquisitionem animæ. Ad comprobandum autem *Definitio.* quòd res ita se habeat, definitionem addit fidei absolutissimam. Fides est rerum quæ sperantur substantia, argumentum eorum quæ non videntur. Hanc fidei naturā exemplis subiectis explicat.

Numerus par est, numerus quem in duas partes æquales diuidere possum⁹: Sed quaternarius est huiusmodi: Ergo est numerus par.

Febris est calor præter naturam, accensus in corde.

Ius ciuile est æquitas constituta ijs, qui eiusdem ciuitatis sunt, ad res suas obtinendas: Eius autem æquitatis utilis est cognitio: Vtilis ergo iuris ciuilis scientia.

Fideiussor est qui pro alijs se obligat: Sempronius pro Titio se obligauit: Ergo Sempronius pro Titio fideiussor factus est.

De Descriptione.

Arist. lib. 5.
Topi. sub. no-
mine proprij.
Idem 4. c. 1.
Topic.
Cic. in Top.
Plato in Thea-
teto.
Arist. 16. c. 3.
Athen.
Cic. de Ora-
tore 2.
Quintil. 3. c.
lib. 7.

Descriptio est definitio ex alijs etiam argumentis rem definiens : vt , Homo est animal mortale, capax disciplinæ. Hic cum aliqua causa miscetur communis itémque propria circumstantia. Atque hæc succincta breuitas non est in hac specie perpetua , sed sæpè illustriorem & magnificentiorem explicationem desiderat. Sic gloria describitur in Miloniana : Sed tamen ex omnibus præmijs virtutis si esset habenda ratio præmiorum , amplissimum esse præmium, gloriam : hanc vnâ, quæ breuitatē vitæ posteritatis memoria consolaretur, quæ efficeret vt absentes adessemus, mortui viueremus : hanc denique esse , cuius gradibus etiam homines in cælum videantur ascendere. Sic 4. Æneid. fama describitur,

*Extemplo Libya magnas it fama per vrbes,
Fama malum, quo non aliud velocius ullum
Mobilitate viget, virésque acquirit eundo:
Parua metu primò, mox sese attollit in auras,
Ingrediturq; solo, & caput inter nubila cõdit.
Illam terra parens ira irritata Deorum
Extremâ, vt perhibet, Cæo Enceladoq; sororẽ
Progeniuit, pedibus celerem, & pernicibus alis:
Monstrum horrendum, ingens, qui quot sunt
corpore plume,
Tot vigiles oculi subter (mirabile dictu)*

Tot

*Tot lingua, totidē ora sonant, tot subrigit aures:
 Noctē volat cali medio, terraq; per umbram
 Stridens, nec dulci declinat lumina somno:
 Luce sedet custos, aut summi culmine tecti,
 Turribus aut altis, & magnas territat vrbes:
 Tam fidei prauique tenax, quàm nuntia veri.*

Paulus ad Hebræos cap. 5. probat Christum esse verum pōtificem, adhibita perspicua quadam descriptione pontificis, in hunc modum. Pontifex est qui ex hominibus vocatur, & pro hominibus constituitur, in his quæ *Descriptio,* agenda sunt apud Deum: vt nimirum offerat donaria & victimas pro peccatis, oretque tam pro se, quàm pro populo.

Quæ omnia cū in Christum cōpetere demonstrasset, deq; singulis membris manifestè disseruisset, reliquit probatum quodd Christus sit verus pontifex.

Sic Rom. 13. docet obediendum esse magistratui, argumento à descriptione magistratus sumpto. Idem argumentum repetitur. 1. Petri. cap. 1. Eiusdem est generis quod ad Ephesios. 5. mariti iubentur diligere vxores, subijcit rationem ab exemplo Christi diligentis Ecclesiæ, vbi mox attexitur elegans descriptio Ecclesiæ. Vide Heb. 13. de Descriptione doctoris Ecclesiæ, & ad Ro. cap. 8. de filiorum Dei & spei descriptionibus.

Circulus est figura plana, vna lineâ contenta, quam vocamus circumferentiam: ad quam ab vno aliquo ex punctis, quæ intra ipsam sunt, omnes lineæ rectæ procedentes, inter se sunt æquales: Sed figura cœli spherica est huiusmodi: Ergo est circularis.

Testamentum est voluntatis nostræ iusta sententia, de eò quod quis post mortem suam fieri voluit, cū heredis institutione.

Fundi possessor est, qui in agro, vel in ciuitate rem soli possidet, aut ex asse, aut ex parte: Sempronius fundum

nec ex asse, ne ex parte possidet : ergo non est fundi possessor.

Tales sunt descriptiones plantarum, animalium in Phycis : item fluminum, montium, urbium in Geographis & historicis.

C A P. X X X I.

De Testimonio diuino.

*Arist. 2. c. 7.
Rhet.*

*Cic. oratorio.
2. & partitionibus.*

*Plato in Protagora &
Gorgia.*

*Cic. 1. de natur.
deorum.*

*Quintil. c. 5.
lib. 1.*

Cicero in partitionibus.

Exposito artificiali argumēto, sequitur inartificiale. Argumentū inartificiale est, quod non sua natura, sed assumpta artificialis aliquius argumenti vi arguit. Itaque cum exquisita rerum veritas subtilius exquiritur, perexiguam vim probationis habet. In ciuilibus autem & humanis rebus plerūmq; hoc argumentum præcipuam fidem è moribus arguentis efficit, si prudentia, virtus & beneuolentia adfuerint. Id vno nomine testimonium dicitur : estque diuinum vel humanum. In diuinis testimonijs numerantur non solum deorum oracula, sed etiam responsa vatum & fatidicorum : quæ omnia 3. Catilin. adhibentur. Nam vt illa omittam (ait Orator) visas nocturno tempore ab occidente faces, ardoremque cæli, vt fulminum iactus, vt terræ motus, cæteraque, quæ ita multa nobis Consulibus facta sunt, vt hæc quæ nunc fiunt, canere Dij immortales viderentur. Deinde paulò post, Quo quidem tempore, cum Aruspices ex tota Hetruria conuenissent, cædes atque incendia & le-

& legum interitum, & bellum ciuile ac domesticum, & totius vr̄bis ac imperij occasum appropinquare dixerunt, nisi Dij immortales omni ratione placati, suo numine prop̄e fata illa flexissent. Tandem cū dixisset vt ex Aruspicum responsis ludi facti & iouis signū maius factum conuersūque ad orientem, tum ait, Illud verò, nōne ita præsens est, vt nutu iouis optimi maximi factum esse videatur? vt cum hodierno mane per forum meo iussu & coniurati & eorum indices in ædem Concordiæ ducerentur, eo ipso tempore signum statueretur, quo collocato atq; ad vos Senatūque conuerso, omnia & Senatus & vos (quæ erant contra salutem omnium cogitata) illustrata & patefacta vidistis. Breuius est illud Tibulli,

Quod si vera canunt sacris oracula templis,

Hæc illi nostro nomine dicta refer:

Hoc tibi coniugium promittit Delius ipse

Fœlix, ac alium desine velle virum.

Si Abrahamus operibus iustificatus est, habet quod gloriatur, sed non apud Deum. Verū quid dicunt literæ? Credidit autem Abrahamus Deo, id quod ei iustitiæ ductum est.

Argumentationis negatiuæ illustræ est exemplum, Heb. 7. vbi euincere volens Apostolus Christum verè esse sacerdotem æternum secundum ordinem Melchisedech, ostendit Melchisedech gessisse Christi typum, vtpote in quo permulta sunt animaduersa, ob quæ cum Christo aptè conferri queat: Imprimis verò quòd Mel-

*Argumentum
ab authoritate
negatiuum.*

chisedech sit sine patre, sine matre, sine genere, neque initium dierum neque vite finem habens. Quid autem hisce verbis vult, nisi quod sic ratiocinatur: Scriptura non exprimitur quando natus sit Melchisedech, quem habuerit patrem, quamvis matrem, ex quo prodierit genere, quando item mortuus fuerit: Igitur Melchisedech, nec initium habuit vite, neque patrem, neque matrem, neque ullum omnino genus. Sed dubium non est quin Melchisedech, more omnium aliorum hominum, fuerit de viro & muliere natus, ex certa familia, & tandem morte vitam finierit: Si divina ordinatione & singulari iudicio, eius genus, parentes, natiuitas & mors tecta sunt silentio, quo videlicet omnibus partibus filio Dei Christo assimilaretur, nomine inquam, officio, seu functione & ceteris.

CAP. XXXVII.

De Testimonio humano legis & sententia, & eorum usu in omni disciplina.

Arist. 8. cap.
ad Alexā. &
15. c. 1. Rhet.

Testimonium humanum est commune aut proprium: commune ut lex & illustris sententia: legis autem & non scriptæ & scriptæ testimonium est pro Milone, Est enim (iudices) non scripta, sed nata lex: quā non didicimus, accepim⁹ legimus: verum ex natura ipsa arripimus, hausimus, expressim⁹: ad quā nō docti, sed facti, non instituti, sed imbuti sumus: ut si vita nostra in aliquas insidias, si in vim, in tela, aut latronum, aut inimicorum incidisset, omnis honesta ratio esset expediendæ salutis: Et ibidem, Quod si duodecim tabulæ nocturnum furem quoquomodo, diurnum autem si se telo defenderit, interfici impune voluerunt,

runt, quis est, qui quoquomodo quis interfectus sit, puniendum putet, cum videat aliquando gladium nobis ad occidendum hominem, ab ipsis porrigi legibus?

Huc refer argumenta Prophetarum, Apostolorum & Euangelistarum cum à legis diuinæ authoritate, vel aliquid confirmant vel refutât. Argumenta ab vtraque legem naturali quàm scripta, vide Rom. cap. 2. vbi Iudæi scripta lege vrgentur & Græci naturali.

Lex naturalis & scripta.

Vt autem vera esse quæ dixi intelligatis, cape ipsam legem & recita, Quos municipia quædam coronant, earum coronarum præconia fiant in ipsis municipijs: nisi si quos ipse populus Atheniensis, aut Senatus, coronat, eos verò liceat in Theatro, bacchanalibus, proclamari. Audis Æschine, legē perspicuè dicere, præterquam si quos Populus aut Senatus corona donauerit, hi vero in Theatro proclamantur? Quid igitur & miser calumniaris? quid fabulas comminisceris? cur helleboro te non purgas ab istis delirijs?

Videntur ad tabulas pertinere quæ de Apostolo Ag. 9. & 20. legimus, accepisse videlicet eum Epistolas & mandata scripta à principe sacerdotum, ad persequendos omnes doctrinæ Christi sectatores. Et 2. Thes. 3. iubet Apostolus notari per epistolas, si quis sermoni ipsius non obediret: & Lu. 1. Zacharias in tabellis scripsit, placere sibi vt filio nomen inderetur Ioannis.

Tabula.

Iurisperiti tabularum nomine testamenta comprehendunt, instrumenta publica, priuata scripta, epistolas, apochas, antapochas, scripta autentica & non autetica, libros rationum, chyrographia & cætera quorum quantus vsus sit in Iuris scientia norunt qui eam vel à limine gustarunt.

Sententiæ illustres sunt proueria: vt, Patres cum paribus facillimè cōgregantur. Spar-

Eras. in Chilian. Cic. oratorio 2. & 4. ad Atticum.

tam nactus es, hanc exorna.

*Sententia di-
uina.*

A&. 10. Galar. 2. Ro. 2. 10. probatur, Deum omnibus, hominibus tam gentilibus quàm Iudæis, modo credet in Christum, salutem ex æquo impendere, ab hac generali sententia in Theologia, quæ extat. Deut. 10. Apud Deum non est exceptio personarum, de his vide plura, Io. 7. è Deuteronomio. 1. & Ephes. 6. Collos. 3. Iacob. 2. è Deuteronomio. 10. & Math. 6. ex Genes. 9.

Nemo cum alterius detrimento locupletari debet: Deceptis non decipientibus iura opitulantur.

*Usus sententia
humana in sa-
cra pagina.*

Apostolus, 1. Cor. 15. vetat Corinthios ne vtantur cōsortio Epicuræorū, qui voluptatib⁹ hīc perinde indulgebāt, atq; si vita melior nulla superesset. Probat id sententia Comici græci: Commercia praua corrumpunt bonos mores. Et ad Titum 1. Cretenses eo esse ingenio vt actius obiurgari debeant, ostendit Apostolus pronuntiata Epimenidis Cretensis: Semper Creti mendaces. &c.

Agè cape Solonis sententias illas, & recita: Vi sciatis etiam Soloni homines Demostheni similes fuisse inuisos:

Nostra quidem, fatis Iouis, vrbs non occidet vnquam

Propitiusq; dijs salua manere potest.

Mania sed cines stolidi, cupidiq; lucrorum

Ardua, subuerti per sua fœta student:

Atque ducem populi, mala mens, elataq; corda

Accersunt penas & mala multa sibi, &c.

Auditis Athenienses de isto genere hominum Solon quid dicat, & de dijs: à quibus urbem conseruari asserit? Ego verò semper hanc orationem veram esse puto, & opro, conseruari urbem nostram diuinitus. Æschynes contrà Ctesiphon.

*Prouerbia in
sacra pagi.*

Ex loquutione prouerbiali sumpta ex Prouerbijs. 26. Petrus. 2. Epist. Cap. 2. ostendit non licere agnitam veritatem, abnegatumque in Baptisma mundum, redire ad pristina peccata. Illis inquit accidit quod prouerbio dici solet: Canis reuersus ad sui ipsius vomitum, & Sus lota reuersa ad volutabrum.

Sunt

Sunt item dicta sapiētum, Nosce teipsum. *Laërtius li. 1.*
 Ne quid nimis, Sponde, præsto est detri-
 mentum.

Huc adferenda censui quæ à responsis prudētum du-
 cuntur argumenta. Prætorum edictis, Constitutionibus,
 More, consuetudine, Rumore, opinione & fama.

Quod responsis prudentum statutum est, iudicaturis *Respos. prud.*
 sacrosanctum esse debet: sed Pauli iurisprudentis respo-
 so statutum est, ne quæ recta contra iuris rationem ten-
 dant, ad consequentiam producantur. Ergo. & c.

Bonorum possessio edicto prætoris liberis emanci- *Edict. præ.*
 patis desertur: Ergo illis adimenda non est.

Solemnes actionum formulæ cōstitutione Iustiniani *Constit.*
 sunt sublata: Ergo illis locus in iudicio esse non potest,
 nec esse debet.

Rom. 1. Congratulatur & confirmat eos Apostolus, *Rumor in sa-*
 cū ait se gratias agere Deo pro omnibus illis, quod fi- *cra pag.*
 des ipsorum toto mundo annuntietur. Idem ad Ephes.
 & Collos. scribit. Luc. Cap. 4. frequenter legimus, longē
 lateque peruagatam de doctrina ex operibus Christi.

Constans est fama Titium à Menio interfectum esse. *Rumor in iu-*
 Ergo Menius Titium interfecit. Nam non rarò ea vera *re.*
 sunt, quæ populari sermone iactata fuerunt.

*Quam populi sermo celebrat creber, irrita nunquam
 Fama cadit penitus: Dea quadam cum sit & ipsa.*

*Fama apud
 Horat.*

Atque & te Æschine hi omnes dicunt ex legatione
 accepisse pecuniam. Itaque in te quoque illud profecto
 valet: Quam populi sermo. & c. Nam quod te longē plu-
 res quam illum criminantur, quid illud sit considera.
 Quare si fama verax est: contra vos etiam valet vulgaris
 ille rumor, cui fidem esse habēdam ait, quædam dea cū
 sit & ipsa. Demosth. de falsa legatione.

Consuetudo est in hac vrbe, vt causæ secundum parti- *Consuetudo in*
 tium affirmationem & negationem transigantur: Ergo *iure.*
 etiam hæc causa in hac vrbe secundum solitum iudicij

morem discussa fuit. Sic cum voluntas Testatoris peruestigatur, non raro animum ad morem & consuetudinem regionis in qua Testator commoratus est intendimus.

Plato in Char-
mide.

Plinius lib. 7.
cap. 32.

Cicero 1. Tuf.
de legi-
bus.

Plato de Re-
pub. 5.

Proprium testimonium est, ut Platonis illud, 1. ad Quintum Fratrem. Atque ille quidem princeps ingenij & doctrinæ Plato, tum denique fore beatas Respublicas putavit, si aut docti & sapientes homines eas regere cœpissent, aut qui regerent, omne suum studium in doctrina ac sapientia collocassent. Talia sunt in poetis. 6. Æneid.

Discite iustitiam moniti: & ne temnite diuos.

Sic Homericò illo versu,

Αἴας δ' ἐν Σαλαμῆνός ἄγει δυοναΐδενά νῆας

Ajax autē ex Salamine duxit duodecim naues.

A testiū dignitate & multitudine probatur. 1. Cor. 15. teritudo resurrectionis Christi, simulque dogmata fidei nostræ fulcitur.

Testes in sa-
cra pag.

Tradidi vobis, inquit, in primis quod & acceperam, quod Christus mortuus fuerit, pro peccatis nostris secundum scripturas, & quod sepultus sit, & resurrexit tertio die secundum scripturas, & quod visus sit Caphæ, deinde duodecim illis. Postea visus est plusquam quingentis fratribus simul, ex quibus plures manent in hunc usque diem.

Et Actorum 1. Christus Apostolos atque Discipulos ait futuros sibi testes, tum doctrine tum actionum, in Iudæa & Samaria, & usque ad extremā terrā: Io. Euāgelista subinde repetit se testimonium ferre pro veritate.

Testes in me-

dicina.

Hippocrates septimo mense nasci perfectum partum scripsit: Titius ex iustis proprijs septimo mense natus est

Ergo

Ergo perfectus partus est, & legitimus filius.

Hec ut à me vera dici constet, accersere mihi harum rerum testes. Testes. Testificatur Demostheni voce omnium hi: Callias Siniensis, Zeno Phayensis, Cleo Phalareus, Demonicus Marathonijs: Cum populus aliquando designasset Æschynem patronum templi Delphici ad Amphictiones: nos in confesso iudicauimus Hyperidem digniorem esse, qui pro ciuitate orationem haberet: & missus est Hyperides. Demost. pro corona.

Megarenses victi ab Atheniensibus. Viuorum testimonia sunt, non tantum cum quaritur de fundo aut cæde & eiusmodi negotio aliquo, sed etiam obligationis, confessionis, iurisiurandi testimonia sunt. Obligationis exemplum est 5. Phi. Audebo etiam obligare fidem meam (P. C.) vobis populoque Romano, quod profecto, cum me nulla vis cogeret, facere non auderem, pertimesceremque in re maximè periculosa opinionem temeritatis: Promitto, recipio, spondeo (P. C.) Cæsarem talem semper fore ciuem, qualis hodie sit, qualémque eum maximè velle & optare debemus: Pignus autem obligatio quædam est, ut apud Virg. Eclog. 3.

Vis ergo inter nos quid possit uterque, vicissim

Experiamur? ego hanc vitulã (ne forte recuses,

Bis venit ad mulctam, binos alit ubere factus)

Depono: tu dic mecum quo pignore certes.

Confessio est libera vel expressa tormentis, quæ propriè quæstio dicitur. Libera confessio- nis exempla sunt apud Demosthenem.

Cicero 2. Tuscul.
cul. Quintil.
lib. 5. cap. 17.
Arist. 15. c. 1.
Rhet. & Quin-
til. lib. 5. c. 11.

Arist. 17. c.
ad Alexand.

*Confessio ad-
versary.*

Quo ego alio maiore teste probem Æschine, te multa & non ferenda, in legatione designasse, quàm te teste contra teipsum? Demost. de falsa legat.

Hæc restare censeo, vobis vt ostendatur, Iudices, vos non modo religioni vestræ consulturos, si ea quæ modo dico decreueritis: sed istum ipsum etiam suopte iudicio Boæti nomen, non Mantithæi habere oportere. Nam cum ego iudicium hoc dictassem Boæto Mantiz filio Thoricio, & statim respondit & calumniam iuravit: se esse Boætum cõfitemens. Cum itaque ipse Boætum iure se pronuntiauit: quid à vobis iuratis iudicibus, pronuntiarì postulat? Demost. aduersus Boætum.

Coactæ cõfessionis exemplum extat apud Milonē, sed à Cicerone deridetur. Age verò, quæ erat aut qualis quæstio? Heus, vbi Rufcio? vbi Casca? Clodius insidias fecit Miloni? Fecit. Certa crux. Nullas fecit. Sperata libertas.

*Quæstio in sa-
era pag.*

Quæstionum siue tormentorum sit quidem mentio actorum. 22. vbi Tribunus iubet Paulum captum induci in castra, & flagris mādāt eum examinari, vt sciret propter quàm causam Iudæi sic ipsi acclamarent.

Argius argentarij seruus in tormentis se Alexandrum occidisse asseuerauit: Ergo occidit. Sed hic locus non semper valet. Multi enim impatientia dolorum in tormentis ea confessi sunt, quæ numquam facere in animū induxerunt.

Huc etiam referri potest argumentum, quo vtimur, cum affirmationis nostræ approbationem & experientiam proponimus. 4. Ver. Ecquis Volcatio, si sua sponte venisset, vnam libellam dedisset? Veniat nunc, experiatur.

riatur: recto recipiet nemo. Ter, Eunu.

Alb. 3. Scē.
no. 3.

--- *Fac periculum in literis,*

Fac in palestra, fac in musicis, qua liberum

Scire equum est adolescentem, solertem dabo.

3. Trist.

*Quod magis ut liqueat, nēue hoc ego fingere
credar:*

Ipse velim pœnas experiare meas.

Bono animo esto fili, inquit Christus, remittuntur tibi peccata tua. &c. Vtrum est facilius dicere remittuntur tibi peccata, an dicere surge & ambula? Vt autem sciatis quod potestatem habet filius hominis in terra remittendi peccata, dixit paralytico: Surge, tolle lectum tuum, & vade in domum tuam. Math. 9. Luc. 7. Experientia.

Æschines nunc alicubi dixit: Demosthenes mihi Alexandri hospitium exprobrat. Ego tibi hospitium Alexandri? unde tibi id cōtiguit? aut qua dignitate es receptus? Neque Philippi hospitem, neque Alexandri amicum ego te dixerim: non ita insanio: nisi etiam mēsores & alij mercenarij, amici & hospites appellandi sunt dominorum. Non ita sunt hæc. Unde? multum certè abest: sed mercenarium ego te Philippi olim, & nunc Alexandri voco, & hi omnes. Quod si non credis: experire, interroga eos, atque aded ego ipse tuo loco id faciam. Vtrum vobis, Athenienses, mercenarius Æschynes an hospes esse Alexandri videtur? Audis quid dicant? nunc ad alia me confero. Demost. pro Corona.

Iusiurandum etiam testimonium est quale est 6. Æneid.

*Per superos, & si qua fides tellure sub ima est,
Inuitus, regina, tuo de littore cessi.*

Testis mihi est Deus, cui seruiſto ſpiritu meo in Euangelio filij ipſius, quod indefinenter meminerim veſtri. &c. Huc refer has loquēdi formulas: Viuat Deus, Teſtis eſt mihi Deus, Deum inuoco teſtem in animam meam. Rom. 1.9.

Tanta eſt iuſiurandi in legibus & canonibus authoritas & efficacia, vt non ſatis de ea dici poſſit. Cū Titius iureiurādo ſe à cauſa liberauerit, merito iureiurādo illius ſtandum eſt, & cauſa non retractari debet. Sed hic nō ſemper valet argumentum: Multi enim natura ad peierandum ſunt propenſi, multi mercede conducti, plerique etiam metu iuſiurandum præſtante.

Huc referuntur imprecationes quarum exemplum extat apud Demotheſenem pro corona. Aduoco autem in conſpectu veſtro, Athenienſes Deos Deaque vniuerſos, qui terram atticam tenent: & Apollinem Pythium, qui eſt huic urbi patrius, & hos omnes precor, vt ſi vera nunc apud vos dixero, & tunc ſtatim pro cōcione dixi, cū primū vidi impurū iſtum eam rem aggredi (cognoui enim ſtatim, cognoui) vt mihi ſollicitatem tribuat & ſalutem. Sin ex odio aut propter priuatā ſimilitatem, crimen iſti falſum impio: ne me vilius boni fructum capere patiantur.

Reciprocatio hic obſcurior eſt, vt quia teſtaturum verum ſit, teſtis ſit etiam verax.

F I N I S.



P. RAMI DIALECTICÆ LIBER SECVN-

DVS DE IVDICIO.

CAP. I.

Quid Iudicium.



AD HVC prima Dialecticæ artis pars fuit in Inventione : pars altera sequitur in iudicio : Iudicium est secunda pars Logicæ de disponendis argumentis ad bene iudicandum : Certa enim dispositionis regula vnum quodque iudicatur : vnde hæc pars Logicæ , & iudicium & dispositio pro eodem dicitur.

CAP. II.

De Axiomatis affirmatione ac negatione.

Iudicium est axiomaticum vel dianoeticū. Axioma est dispositio argumenti cum argumento, qua esse aliquid aut non esse iudicatur. Latine enuntiatur, enuntiatio, pronuntiatum, pronuntiatio, effatum dicitur. Axioma est affirmatum aut negatum : affirmatum

*Cice. in fat.,
in 1. Tus & 4
Academ.
Laertius li. 2.*

*Hic per vin-
culum, intel-
ligit verbum
in simplicibus
Axiomatibus,
& cōiunctio-
nis copulā in
compositis. Vt
in Axiomate,
Ignis urit:
vinculum est
urit, propriū
tamen vincu-
lum est duo-
rum vel plu-
rium.
Cicero in fato
& Arist. 8. c.
de interpretat.
Idem 1. c. 1.
priorum & 2.
c. 1. postea.
Oratio Tulli
20. *Enchirid.*
Arist. 26.
cap. 1. postea.
Idem de futu-
ris contingen-
tibus.

Lib. 12.

quando *vinculum eius affirmatur: negatum,
quando negatur: Hinc nascitur Axiomatum
contradictio, quando idem Axioma affirma-
tur & negatur.

C A P. I I I.

De Vero & Falso.

Axioma deinde est verum aut falsum: ve-
rum quando pronuntiat vti res est: falsum,
contra. Axioma verum est contingens aut ne-
cessarium. Contingens, quādo sic verum est,
vt aliquando falsum esse possit; vt,

Audentes fortuna iuuat.

Fac enim id esse hodie verum, cras falsum
esse poterit: itaque veritatis huius contingen-
tis iudicium, opinio dicitur: quæ præterito-
rum & præsentium homini certa esse potest,
futurorū per naturam non admodum potest,
quamuis Deo tempora omnia præsentia sint:
Itaque Martialis Priscum meritō cauillatur:

Sæpe rogare soles, qualis sim Prisce, futurus,

Si fiam locuples, simq; repente potens.

Quæquam posse putas mores narrare futuros?

Dic mihi, si fias tu leo, qualis eris?

Necessarium, quādo semper verum est, nec
falsum potest esse: & illud affirmatum appel-
latur κατὰ πάντος, de omni. Impossibile, cō-
tra quod de nullo vnquam verum esse potest.
Axiomata artium sic κατὰ πάντος esse de-
bent,

Quintil. 5. li.
cap. 10. & ca.
8. lib. 3.

bent, sed præterea homogenea & catholica. Axioma homogeneum est, quando partes sunt essentielles inter se: vt forma formato, subiectum proprio adiuncto, genus speciei, id appellatur καθ' αὐτό per se. Axioma catholicū est, quando consequens semper verum est de antecedente, non solum omni & per se, sed etiam reciprocè: vt homo est animal rationale: numerus est par vel impar: Lupus est natus ad vlulādum. Id appellatur καθόλου πρῶτον, vniuersaliter primum tres hæ sunt leges documentorum artis priorū: Prima κατὰ παντός lex veritatis: Secunda καθ' αὐτό lex iustitiæ tertia καθόλου πρῶτον lex sapientiæ dicatur. Atq; eiusmodi axiomatum ita catholicorum iudicium, verissima & prima scientia est.

Arist. 4. cap.
1. post. & 7. 8.
& 9. eiusdem.
Arist. 26. ca.
1. post 2. cap.
eiusdem & 4.
cap. 6. Top. 3.
cap. 1. post.
& 18. cap. 2.
post.

CAP. IIII.

De Axiomate simplici.

Atque hæc de communibus axiomatis affectionib⁹, species sequitur. Axioma est simplex aut compositum. Simplex est, quod verbi vinculo continetur: Itaque affirmato vel negato verbo affirmatur vel negatur: vt Ignis vrit: Ignis est calidus: Ignis non est aqua: hic (ignis) est antecedens: Vrit, consequens. Atque hic prima est inuētarum rerum dispositio, causæ cum effecto, vt in primo exemplo, subiecti cum adiuncto, vt in secundo: dis-

Arist. de in-
terprat. cap. 4

sentanei cum dissentaneo, vt in tertio: quomodo argumentum quodlibet enuntiari potest (exceptis plenīs comparationibus & distributionibus) consentanea quidē affirmando, dissentanea negando.

*Arist. s.c. &
6. de interpr.
& 1. c. 1. prio-
rum.*

Axioma simplex est generale aut speciale. Generale quando commune consequens attribuitur generaliter communi antecedenti, atque hic cōtradictio non semper diuidit verum & falsum, sed contingētium vtrāque pars falsa potest esse, vt:

Omnis in urbe locus Baijs pralucet amœnis.

Nullus in urbe locus Baijs pralucet amœnis.

Item non contingentium, vt: Omne animal est rationale: Nullum animal est rationale.

*Omne & non
omne P. Ram.
opponuntur,
siue enim spe-
ciale, siue pro-
prium fuerit,
nō omne recte
dici potest: vt
in hoc Axio-
mate: Fabella
est bella: Bella
attribuitur
non omni an-
tecedenti.
Arist. 4. ca. 1.
priorum.*

Axioma speciale est, quando consequens specialiter antecedenti attribuitur: & hic cōtradictio semper diuidit verū à falso: speciale est particulare aut proprium. Particulare quando consequens commune antecedenti particulariter attribuitur: Huic autem axiomati generaliter contradicitur.

Aliquid ignoscendum est.

Nihil ignoscendum est.

Aliqua clementia non est laudanda.

Omnis clementia est laudanda.

Axioma proprium est, quando consequens antecedenti proprio attribuitur: vt Fabulla est bella, cuius negatio & contradictio est, Fabulla non est bella.

CAP.

CAP. V.

De Axiomate copulato.

Axioma compositum est, quod vinculo
coniunctionis continetur: Itaque è coniun-
ctione affirmata vel negata affirmatur vel ne-
gatur. Contradictionisq̃ pars vera est, pars
falsa. Enuntiatio compositum est pro sua
coniunctione congregativum aut segregati-
vum: congregativum enuntiat omnia cōsen-
tanea affirmando, omnia etiam dissentanea
negando. Est verò copulatum aut connexum:
Copulatum, cuius coniunctio est copulativa,
ut I. Æneid.

*Sub vinculo
coniunctionis
intellige etiā
notā relatio-
nis & conse-
quentia.*

*Vnà Eurúsq̃, Notúsq̃ ruunt, crebérque procellis
Africus---*

Hic igitur negatio crit & contradictio.

*Non vnà Eurúsque Notúsque ruunt crebérque
procellis
Africus---*

Verum enuntiati copulati iudicium pēdet
ex omnium partium veritate, falsum saltem
ex vna parte falsa. Huic generi affine est enū-
tium relatæ qualitatis, cuius coniunctio est
ipsa relatio. 3. Eclog.

*Tale tuum carmen nobis diuine poëta,
Quale sopor fessis in gramine ---*

hic copulatum iudicium est tanquam dicere-
tur: Sopor est fessis gratus, & sic tuum carmē

nobis gratum est : cuius negatio,
*Non tale tuum carmen nobis diuina poëta,
 Quale sopor fessis in gramine. ---*

C A P. V I.

De Axiomate connexo.

*Cicero Aca-
 dem. 4.*

Axioma connexum est congregatiuum,
 cuius coniunctio est connexiua, Si, vt 2. Ænei.
*Si miserum fortuna Sinonem
 Finxit, vanū etiā mendacemq; improba finget.*
 cuius negatio est,

*Non si miserum fortuna Sinonem
 Finxit, vanū etiā mendacemq; improba finget.*

Coniunctio etiam hæc interdum negatur
 apertius, negando consequentiam, vt pro A-
 mer. Non continuò si me in ficariorum gre-
 gem contuli, ficarius sum. De Fato, Nec si
 omne enuntiatum verum est aut falsum, se-
 quitur illicò causas esse immutabiles. Affir-
 matio enim significat, si sit antecedens, etiam
 consequens esse. Negatio itaque & contradi-
 ctio statuit, si sit antecedens, non ideò conse-
 quens esse. Quare cū iudicabis connexum
 absolutè verum esse, necessarium quoque iu-
 dicabis & intelliges hanc necessitatem è ne-
 cessaria partium connexione oriri, quæ ipsa
 potest esse vel in falsis partibus, vt, Si homo
 est leo, est etiam quadrupes, necessarium cō-
 nexum est. At si connexio sit contingens &
 pro sua tantum probabilitate ponatur, iudi-
 cium

cium eius tātum opinio fuerit, vt Terēt. And.

Pamphile, si id facis, hodie postremū me vides.

Connexo axiomati affinis est ista consequentia relatio, vt, Cū Tullius sit orator, est etiā peritus bene dicendi.

CAP. VII.

De Axiomate discreto.

Axioma segregatiuum est, cuius cōiunctio est segregatiua: ideoque argumenta dissentanea enuntiat: Enuntiatum segregatiuum est discretum aut disiunctum. Discretum, cuius coniunctio est discretiua. Itaque è dissentaneis præcipuè diuersa enuntiat. 5. Tusc. Quāquam sensu corporis iudicentur, ad animum referri tamen: cuius negatio & contradictio est. Non quanquam corporis sensu iudicentur, tamen ad animum referri: vel Quāquam sensu corporis iudicentur, non tamen ad animum referri. Nam, tamen, est hic coniunctio præcipua. Discretum enuntiatum iudicatur esse verum & legitimum, si partes non solum veræ: sed etiam discretæ sint falsum vel ridiculum contrā.

CAP. VIII.

De Axiomate disiuncto.

Axioma disiunctum est axioma segregatiuum, cuius coniunctio est disiunctiua, vt 1. Georg.

H ij.

*Illic, ut perhibent, aut intempeſta ſilet nox
Semper, & obtenta denſantur nocte tenebra,
Aut redit à nobis aurora, diemque reducit.*

De Fat. Omnis enuntiatio eſt vera aut falſa. Hic ſignificatur è diſiunctis vnicū verum eſſe. Negatio igitur erit & contradicção. Nō omnis enuntiatio eſt vera aut falſa. Et cōtradictione ſignificatur non neceſſariò alterutrum verum eſſe. Nam ſi diſiunctio abſolutè vera eſt, eſt etiam neceſſaria: partēſq; diſiunctæ ſunt oppoſitæ ſine vlllo medio. Veruntamē quamvis abſolutè vera diſiunctio, neceſſaria quoque ſit: tamen nihil neceſſe eſt partes ſeparatim neceſſarias eſſe: vt,

Homo eſt bonus vel non eſt bonus, diſiunctio neceſſaria eſt: & tamē, Homo eſt bonus, non eſt enuntiatio neceſſaria: Item, Homo nō eſt bonus, non eſt enuntiatio neceſſaria: ſed diſiunctionis neceſſitas pendet è neceſſaria partium oppoſitione & diſiunctione, non ex earum neceſſaria veritate. Diſiunctio autem plerūque eſt ex conditione, vt ſi quærat, Vtrum Cleon venerit, an Socrates: quia ita pactum ſit alterutrum tantum venturum eſſe. Itaque ſi diſiunctio ſit contingens, nō eſt abſolutè vera, & tantum opinabilis eſt: qualis eſt frequenter in hominum uſu, Ouid. in Epiſtola Leandri,

*Aut mihi continget felix audacia ſaluo,
Aut mors ſolliciti finis amoris erit.*

CAP.

CAP. IX.

De Syllogismo & eius partibus.

Atque eiusmodi iudiciū est axiomaticum axiomatis per se manifesti, sequitur dianoeticum. Dianoa est cum aliud axioma ex alio deducitur: estque syllogismus aut methodus: syllogismus est dianoa, qua quæstio cum argumento ita disponitur, vt posito antecedente necessario concludatur. Nam cum axioma dubium sit, quæstio efficitur, & ad eius fidem tertio argumēto opus est cum quæstione collocato. Syllogismi antecedens partes duas habet, propositionem & assumptionem:

Propositio est prima pars antecedētis, qua tota quæstio vel quæstionis saltem consequēs cum argumēto disponitur: Assumptio est secunda pars antecedētis, quæ assumitur è propositione. Syllogismi autem pars consequens est, quæ complectitur partes quæstionis, eamque concludit: vnde complexio & conclusio dicitur: Si qua pars syllogismi defuerit, enthymema dicitur: si quid præter illas tres partes accesserit prosyllogismus. Partium etiam ordo sæpè confunditur: attamen si qua dubitatio propterea fuerit, explenda, quæ defunt: amputanda, quæ supersunt, & pars quælibet in locum redigenda est.

Arist. Analysis prior est in componendo syllogismo. Arist. 25. c. 1. priorum.

Arist. 26. c. 1. priorū & 27. c. 2. priorū & 1. c. 3. Top. & 24. c. Elench.

*De Syllogismo simplici, primò eiusque
contractione.*

Syllogismus est simplex aut compositus: Simplex, vbi pars consequens quæstionis est in propositione: pars antecedens in assumptione: estque affirmatus è partibus omnibus affirmatis, negatus è negata antecedentium partium altera cum complexione: generalis è propositione & assumptione generalib⁹: specialis ex altera tantum generali: proprius ex vtraque propria. Simplicis syllogismi genera sunt duo, Primum & secundum: Primum quādo ex argumento antecedente in propositione vlibet, in assumptione affirmata, complexio specialis efficitur, vt in his exemplis:

AFFIRM. GENERAL.

Constantia est virtus

At est confidentia:

Quedam igitur confidentia est virtus.

NEG. GEN.

Audacia non est virtus

At est confidentia:

Quedam igitur confidentia non est virtus.

AFF. SPEC.

Sapiens est laudabilis,

At quidam est pauper.

Quidam igitur pauper est laudabilis.

NEG.

NEG. SPEC.

Stultus non est beatus,

At quidam est fortunatus:

Quidam igitur fortunatus non est beatus.

AFF. PROP.

Socrates est philosophus,

At est homo:

Quidam igitur homo est philosophus.

NEG. PROP.

Thersites non est philosophus,

At est homo:

Quidam igitur homo non est philosophus.

Verum pro iudicij claritate vsus cōtractio-
ne hic ferè contentus est. Fit autem contra-
ctio quando argumentum pro exemplo ita
subijcitur particulari quæstioni, vt vtrâmque
partem antecedens & assumptione affirma-
tum intelligatur,

Quædam confidentia est virtus, vt constantia,

Quædam confidentia nō est virtus, vt audacia,

Hic enim argumentum quæstionis vtram-
que partem antecedere intelligitur, tanquam
esset expressum. Constātiā esse virtutem &
confidentiam: ideoque quandam confidenti-
am esse virtutem: item, Audaciam non esse
virtutem: & tamen esse cōfidentiam, ideoque
quandam confidentiam nō esse virtutem. Sic
vsus differendi, magister syllogistici iudicij

contrahitur, nec aliter explicatur. Atque ista expositio principium syllogismi partibus explicati ab Aristotele efficitur tanquam per se pleno syllogismi iudicio sit clarior & illustrior.

CAP. XI.

De Syllogismo simplici secundo.

In syllogismo simplici secūdi generis propositio est generalis aut propria, & conclusio similis antecedenti aut parti debiliori. Species duæ sunt, prima vbi argumentum semper sequitur, negatum in altera parte.

GEN. I.

Turbatus non bene utitur ratione:

Sapiens bene utitur ratione:

Sapiens igitur non est turbatus.

Hoc iudiciū ita fit à Cic. 3. Tusc. Et quemadmodum (ait) oculus conturbatus non est probè affectus ad suum munus fungendum: & reliquæ partes totumq; corpus à statu cūm est motum, deest officio suo ac muneri: sic conturbatus animus nō est probè affectus ad exequendum munus suum. Munus autem animi est ratione uti: & sapientis animus ita semper affectus est, vt ratione optimè vtatur: Nunquam igitur est perturbatus.

GEN. 2.

Res mortalis est composita:

Animus

Animus non est compositus:

Animus igitur non est mortalis.

Cic. I. Tusc. hoc syllogismo iudicat animum
immortalem esse. In animi autem cognitione
(inquit) dubitare non possumus, nisi forte in
phyisicis plumbei sumus, quin nihil sit animis
admixtum, nihil cōcretum, nihil copulatum,
nihil coagmētatum, nihil duplex: Quod cūm
ita sit, certè nec secerni, nec diuidi, nec discer-
pi, nec distrahi potest: nec interire igitur: Est
enim interitus, quasi discessus & secretio ac
diremptus earum partium, quæ ante interitū
iunctione aliqua tenebantur.

SPE. I.

Linidus non est magnanimus:

Maximus est magnanimus:

Maximus igitur non est linidus.

Hoc iudicio Ouid. 3. de Pont. Eleg. 3. con-
cludit:

Lisur, iners vitium, mores non exit in altos:

Vique latens ima vipera serpit humo:

Mens tua sublimis supra genus eminet ipsum

Grandius ingenio nec tibi nomen inest.

Ergo alij noceant miseris, obtēntque timeri,

Tinctæque mordaci spicula felle gerant:

At tua supplicibus domus est assueta inuandis,

In quorum numero me præcor esse velis.

SPE. 2.

Saltator est luxuriosus:

Muræna non est luxuriosus:

Muræna igitur non est saltator.

Cic. pro Mur. Nemo enim ferè saltat sobrius, nisi fortè insanit: neque in solitudine, neq; in conuiuio moderato atque honesto: Intempestiui conuiuij, amceni loci, multarū deliciarū comes est extrema saltatio: Tu mihi arripis id, quod necesse est omnium vitiorū esse postremum: relinquis illa, quibus remotis hoc vitium omninò esse non potest: nullum turpe conuiuium, non amor, non commessatio, non libido, non sumptus ostenditur: & cùm ea nō reperiantur, quæ voluptatis nomen habent, quæque vitiosa sunt, in quo ipsam luxuriam reperire non potes, in eo te vmbra luxuriæ reperturum putas? Hoc iudicij modo Ouidius 1. Trist. Elegia 1. tripliciter concludit, dum carminum suorum excusationem exponit.

Carmina proueniunt animo deducta sereno:

Nubila sunt subitis tempora nostra malis.

Carmina secessum scribentis & otia quarunt:

Me mare, me venti, me fera iactat hyems.

Carminibus metus omnis abest: ego perditus ensē

Hæsurum ingulo iam puto iamque meo.

Hæc quoq; quæ facio, iudex mirabitur æquus:

Scriptæque cum venia qualiacunque leget,

PRO. I.

Agefilaus non est pictus ab Apelle:

Alexander est pictus ab Apelle:

Alexander igitur non est Agefilaus.

PRO.

PRO. 2.

Cæsar oppressit patriam:

Tullius non oppressit patriam:

Tullius igitur non est Cæsar.

CAP. XII.

De secunda specie syllogismi simplicis explicati.

Secunda species syllogismi secundi generis est, quando argumentum antecedit in propositione, sequitur affirmatū in assumptione.

AFF. GEN.

Omne iustum est utile:

Omne honestum est iustum:

Omne igitur honestum est utile.

Quod Cice. 2. Offic. ita concludit: Summa quidem autoritate philosophi, seuerè sanè atque honestè hæc tria genera confusa, cogitatione distinguunt: Quidquid enim iustum sit, id etiam utile esse censent: Itémque, quod honestum, idem iustum: Ex quo efficitur, ut quidquid honestum sit, idem sit utile.

NEG. GEN.

Timidus non est liber:

Auarus est timidus:

Auarus itaque non est liber.

Hoc ita concluditur & iudicatur ab Horatio

i. Epist.

Quo melior seruo, quo liberior sit auarus,

*In triuijs fixum cum se demittit ob affem,
Nō video: nam qui cupiet, metuet quoq; porro
Qui metuens uiuit, liber mihi no erit vnquam.*

Sic Terent. in Eunucho concludit & iudicat:

Consilij expers, consilio regi non potest:

Amor est consilij expers:

Consilio itaq; regi non potest.

Syllogismus his verbis sequitur,

Here, qua res in se neq; consilium neq; modum

Habet ullum, eam consilio regere non potes:

In amore omnia hæc insunt vitia: iniurie,

Suspiciones, inimicitia, inducia,

Bellum, pax rursum: incerta hæc si tu postules

Ratione certa facere, nihilo plus agas,

Quam si des operam, ut cum ratione insanias.

AFF. SPE.

*Consules virtute facti, studiosè Remp. tueri
debent:*

Cicero est virtute factus Consul:

Cicero igitur Rempub. studiosè tueri debet.

Sic orator diligentiam suam Agra. 2. con-
cludit & iudicat: Nam cū omnium Con-
sulum, ait, grauis in Republica custodienda,
cura ac diligentia debet esse, tum eorum ma-
ximè qui nō in incunabulis, sed in campo sunt
Consules facti: Nulli populo Romano pro me
maiores nostri sponponderunt, mihi creditum
est: à me petere, quod debeo me ipsum appel-
lare debetis. Quemadmodum cū petebam,
nulli me authores generis mei vobis cōmen-
da-

darūt : sic si quid deliquero, nullæ sunt imagines, quæ me à vobis deprecetur. Quare modò vt vita suppetat (quamquam ego sum is, qui eam possim ab istorum scelere insidijsque defendere) polliceor hoc vobis, Quirites, bona fide, Rempub. vigilanti homini, non timido, diligenti, non ignauo commisitistis.

Quod optatum redierit, gratum est:

Lesbia Catullo optata redyt:

Grata igitur est.

Catullus sic concludit:

Si quicquã cupidoq, optantiq, obigit unquã & Insperanti, hoc est gratum animo propriè:

Quare hoc est gratũ nobis, quoq, charius auro

Quod te restituis Lesbia, mi cupido.

Restituis cupido, atque insperanti ipsa refers te Nobis. ó lucem candidiore nota?

Quis me vno viuit felicior? aut magis hac quid Optandum vita, dicere quis poterit?

NEG. SPE.

Deceptor amantis puella non est laudandus:

Demophoon est deceptor amantis puella, vt Phyllidis:

Demophoon igitur non est laudandus.

Phyllis apud Ouidium ita iudicat Demophoontem laudandum non esse:

Fallere credentem non est operosa puellam

Gloria: simplicitas digna fauore fuit:

Sum deceptatuis & amans & fœmina verbis,

Dysfaciant laudis summa sit ista tua.

AFF. PRO.

Octavius est heres Caesaris:

Ego sum Octavius:

Sum igitur heres Caesaris.

NEG. PRO.

Antonius non est filius Caesaris:

Tu es Antonius:

Non es igitur filius Caesaris.

CAP. XIII.

De Syllogismo connexo primo.

Adhuc syllogismus simplex fuit: syllogismus compositus est syllogismus, ubi tota questio est pars altera propositionis affirmatae & compositae: argumentum est pars reliqua. Togliere autem in composito syllogismo, est specialem contradictionem ponere. Syllogismus compositus est connexus aut disiunctus. Syllogismus connexus, est syllogismus compositus propositionis connexae, estque duorum modorum: primus modus syllogismi connexi est, qui assumit antecedens, & consequens concludit. Quomodo Cicero iudicat & concludit 2. de Diui.

Si di sunt, diuinitas est:

Sunt autem di:

Diuinitas est igitur.

3. Offic. Atque si etiam hoc natura praescribit, ut homo homini, quicumque sit, ob eam ipsam caus-

causam, quod is homo sit, consultum velit, necesse est secundum eādem naturam, omnium vtilitatem esse communem: Quod si ita est, vna continemur omnes & eadem lege naturæ: Idque ipsum si ita est, certè violare alterum lege naturæ prohibemur: verum autem primum, verum igitur & extremum.

Sic Æneid. 4. Dido iudicat Æneæ remanendum esse:

*Mène fugis? per ego has lachrymas dextramque
tuam, te,*

*Quando aliud mihi iam misera nil ipsa reliqui,
Per connubia nostra, per inceptos hymenæos,
Si benè quid de te merui, fuit aut tibi quicquam
Dulce meum: miserere domus labentis, & istam
Oro, si quis adhuc precibus locus, exue mentem:
Te propter Libycæ gentes Nomadumq; tyranni
Odere, infensi Tyry: te propter eundem
Extinctus pudor: & qua sola fydera adibam,
Fama prior, cui me moribundam deseris hospes?*

Frequenter hîc non assumitur idem, sed maius, vt 1. Catil. Si te parentes timerent, atq; odissent tui, neque illos vlla ratione placare posses, vt opinor, ab eorum oculis aliquò cōcederes: nunc te patria (quæ communis est omnium nostrum parens) odit ac metuit, & iamdiu nihil de te iudicat, nisi de parricidio suo cogitare: huius tu neque autoritatem verere, neque iudicium sequere? neque vim pertimesces? Concludendi modus hic idem

est, quādo propositio est relata temporis, quo genere nymp̄ha Oenone, apud Ouidium cōcludit errorem stultitiæ suæ:

Cum Paris Oenone poterit spirare relicta,

Ad fontem Xan̄hi versa recurret aqua:

Xanthe retrò propera, versaq̄, recurrete lymp̄ha:

Sustinet Oenonem deseruisse Paris.

CAP. XIII.

De Syllog. Con. 2.

Secundus modus connexi tollit consequēs, ut tollat antecedens.

Si ulli rei sapiens assentietur vsquam, aliquando etiam opinabitur:

Nunquam autem opinabitur:

Nulli igitur rei assentietur.

Eodem syllogismo Ouidius 2. Trist. stultitiam suam indicat:

Si saperem, doctas odissem iure sorores,

Numina cultori pernicioſa suo:

At nunc (tanta meo comes est insania morbo)

Saxa memor refero rursus adicta pedem.

Hæ duæ syllogismi species sunt omnium vltatissimæ.

CAP. XV.

De Syllogismo disiuncto primo.

Syllogismus disiunctus, est syllogismus cōpositus propositionis disiunctæ: modi duo sunt. Primus tollit vnū, & reliquū cōcludit, ut:

Aut

Aut dies est aut nox est:

At dies non est:

Nox igitur est.

Ciceronis pro Cluentio iudicium tale est: Sed cum esset hæc illi proposita conditio, vt aut iustè pièque accusaret, aut acerbè indignèq; moreretur, accusare quoquo modo posset, quam illo modo mori maluit: Disiunctio clarior sic erit.

Aut accusandum aut moriendum:

Non moriendum:

Accusandum igitur.

Sic idem 2. Phil. ratiocinatur. Nunquam ne intelliges tibi statuendum esse, vtrum illi qui istam rem gesserunt, homicidæ sint, an vindices libertatis? Attende enim paulisper, cogitationemq; sobrij hominis ad punctum temporis suscipe: & ego qui sum illorū, vt ipse fateor, familiaris, vt à te arguor, socius, nego quicquam esse medium: confiteor illos, nisi liberatores populi Romani conseruatoresq; Reipublicæ sint, plus quàm sicarios, pl⁹ quàm homicidas, plus quàm parricidas esse: si quidem est atrocius patriæ parentem, quàm suum occidere. Tu homo sapiens & cōsiderate, quid dicis? Si parricidæ, cur honoris causa à te sunt & in hoc ordine, & apud populū Rom. semper appellati? cur M. Brutus, te referente, legibus est solutus, si ab vrbe plus quàm decem dies abfuiisset? cur ludi Apollinares

incredibili M. Bruti honore celebrati ? cur
prouinciæ Cassio & Bruto datæ? cur Quæsto-
res additi ? cur Legatorum numerus auctus ?
Atque hæc acta per te: Non igitur homicidæ:
Sequitur vt liberatores tuo iudicio sint, quan-
doquidem tertium nihil potest esse. Si partes
disiunctæ propositionis sint duabus plures,
iudicandi concludendiq; ars erit eadem. Sic
Cicero iudicat Rabirium cum Cōsulibus esse
oportere : Atqui videmus (ait) hæc in rerum
natura tria fuisse, vt aut cum Saturnino esset,
aut cum bonis, aut lateret. Latere autē, mortis
erat instar turpissimæ: cum Saturnino esse, fu-
roris & sceleris : virtus & honestas & pudor
cum Coss. esse cogebat.

CAP. XVI.

De Syllog. Dis. 2.

Disiunctus secundus è propositione parti-
bus omnibus affirmata assumit vnum, & reli-
quum tollit, vt:

Dies est, aut nox est:

At dies est:

Nox igitur non est.

Sic Iuno cum Ioue de Turno concludit, 10.
Æneid.

-- *Quid si quod voce granaris,
Mete dares atque hac Turno rata vita maneret
Nunc manet insontem granis exitus, aut ego veri*
Vana

*Vana feror: quod ut ô potius formidine falsa
Ludar, & in melius tua, qui potes, orsa reflectas.*

Eiusmodi syllogismus efficitur è propositione copulata negata, quæ negata cõplexio dicitur: quæque disunctionis affirmatæ vim obtinet.

Non & dies est, & nox est:

At dies est:

Non igitur nox est.

CAP, XVII.

De Methodo secundum Aristotelem vnica.

Methodus est dianoiæ variorum axiomatũ homogeneorũ pro naturæ suæ claritate præpositorum, vnde omnium inter se conuenientia iudicatur, memoriâque comprehenditur. Atqui vt spectatur in axiome veritas & falsitas, in syllogismo consequentia & inconsequentia, sic in methodo consideratur vt per se clarius præcedat, obscurius sequatur, omninoque ordo & confusio iudicatur. Sic disponetur ex homogeneis axiomatis primo loco absoluta notione primum, secundo secundũ, tertio tertium, & ita deinceps: ideòq; methodus ab vniuersalibus ad singularia perpetuò progreditur. Hac enim sola & vnica via proceditur ab antecedentibus omninò & absolute notioribus ad cõsequentia ignota declarandum, eamque solam methodum Aristoteles docuit.

C A P. XVIII.

*De prima Methodi illustratione per
exempla artium.*

Sed methodi vnitatem exempla doctrinarum & artium præcipuè demonstrant præcipuèque vëdicant, quibus quamuis omnes regulæ generales sint & vniuersales, tamen earum gradus distinguntur: quantòque vnaquæque generalior erit, tanto magis procedet. Generalissima loco & ordine prima erit, quia lumine & notitia prima est: subalternæ consequetur, quia claritate sunt proximæ: atque ex his natura notiores præponetur, minus notæ substituentur, tandèmq; specialissimæ constituentur. Definitio itaque generalissima prima erit: distributio sequetur, quæ si multiplex fuerit, præcedet in partes integras partitio, sequetur diuisio in species: partesque ipsæ & species eodem ordine sunt rursus tractandæ, ac definiendæ quo distributæ fuerint: & transitionum vinculis si lógius inter eas intersit explicatio, colligandæ sunt: Id enim auditorem reficit ac recreat: atque vt res familiarius accipiat, exemplo quoque familiari nobis vtendū est. Omnes definitiones, distributiones, regulæ Grammaticæ repertæ sint, atque vnaquæque sigillatim iudicata: omniæque hæc documēta varijs tabellis inscripta, vna confundantur & cōturbentur in hydria aliqua, vt in Ollæ ludo fieri solet: hîc si quæras, quæ pars Dialecticæ

te

te doceat has regulas ita cōfusās disponere & in ordinem redigere: primò locis inuentionis nihil opus est, cū sint omnia reperta: neque primo axiomatis iudicio, cū vnumquòdq; axioma probatum & estimatum sit: neque secūdo syllogismi iudicio opus, cū sint omnes singularū rerum controuersia his de rebus disceptatę & conclusę, sola methodus superest. Dialecticus igitur lumine methodi artificiosę, seliget in hac vrna definitionem Grammaticę (id enim est generalissimum) & primo loco statuet. Grammatica est doctrina benè loquendi: tum requireret in eadem vrna partitionem Grammaticę, & collocabit secundo loco. Partes Grammaticę sunt duę: Etymologia & Syntaxis. Deinceps in eodem vase definitionem Etymologię de vocibus separabit, & tertio gradu antecedentibus adiunget: tum vocis partes in literis & syllabis, speciēsque in vocibus numeri & sine numero requireret, exituūque transitiones suis locis collocabit. Atque ita omnium Etymologię partium definitiones, distributiones, colligationes, exempla denique specialissima in singulis disponet. Idēque in Syntaxi faciet. Hanc viam omnes artes sibi proposuerunt.

*Illustratio Methodi ex sacra pagina &
Analyseos Exemplum elegans.*

Quamuis Prophetę, Apostoli, & Euangelistę vbique hanc methodum obseruare videntur, vt nemini

dubium sit, quin diuinitus ad nos missa, potius quàm ab ullo excogitata aut inuēta sit, adducam tamen vnam illā disputationem de mortuorum resurrectione quam Apostolus instituit. 1. Cor. 15. vt vel cæco pateat quā turpiter hallucinentur, qui satis se officio functos arbitrantur, dummodo quicquid in buccam venerit effutiant.

[Porro vobis declaro fratres, Euangelium quod Euangelizauimus vobis, quod & accepistis, in quo etiam statis. &c.] Hæc est summa vel generalis propositio disputationis futuræ. Cōtinet autem duo capita, An sit resurrectio, Deinde quis modus resurrectionis. De priori mēbro primum agit: [Tradidi vobis excitatum fuisse Christum tertio die secundum scripturas: & visum fuisse Cæphæ. &c.] Et paulò post: [Quòd si Christus prædicatur ex mortuis excitatus esse, quomodo dicunt quidam inter vos non esse resurrectionem mortuorum?] Hic habes ad primum caput confirmandum, primum argumētum: Christus resurrexit: Ergo est resurrectio mortuorum. Antecedens confirmat duobus argumentis, Prius est ab autoritate scripturarum: posterius à testium congerie.

Prophetarum oracula Christum resurrecturum pronuntiant: Ergo resurrexit Christus.

Apparuit post mortem Cæphæ. &c. ergo resurrexit.

ij. Sequitur si resurrectio mortuorū nō est, Christus quoque nō est excitatus & quæ sequuntur in. 20. versum secundum argumentum conficiunt.

1 Si non est resurrectio mortuorum: Ergo nec Christus resurrexit.

2 Si Christus non resurrexit: Ergo inanis est nostra prædicatio, & sumus falsi testes, falsi Apostoli.

3 Si inanis est nostra prædicatio, & sumus falsi testes: Ergo inanis est etiam vestra fides.

4 Si inanis est vestra fides: Ergo non estis fide iustificati, neque remissionem peccatorum consequuti.

5 Si non estis fide remissionē peccatorū cōsequuti: Ergo qui eiusmodi fide in Christo mortui sunt, perierūt.

6 Si

6 Si autem tales perierunt : Ergo fides in Christum prodest tantum in hac vita.

7 Si denique tantum valet fides in Christum in hac vita : Ergo sumus omnium miserrimi, qui propter hanc fidem omni tempore in hac vita affligimur.

Sed hæc omnia sunt admodum absurda: Igitur absurdum quoq; est dicere nō esse resurrectionem mortuorū.

iiij. Sequitur primi capitis tertium argumentum à pari: [Nūc autem Christus primitiæ eorum qui obdormierunt factus est &c.] quasi diceret:

Sicut se habent primitiæ frugum ad fruges reliquas, ita se habet Christus ad reliquos homines:

Atque cum primitiæ frugum sanctificantur, intelliguntur pariter sanctificatæ fruges reliquæ:

Igitur quandoquidem resurrexit Christus, par est intelligantur etiam cæteri homines resurrecturi.

Sed ne quis diceret argumentum ab exemplo vno nō inferre conclusionem generalem, illud probat ratione assumpta à contrarijs per comparationem.

Si per Adam omnes moriuntur:

Quidni per Christum omnes vivificentur ut resurgant?

Atque vt hoc etiam de impijs intelligatur ait omnes resurrecturos, licet quidam ordo servetur, vt post Christum qui Christi sunt resurgant ad æternam gloriam, alij ad sustinenda æterna supplicia.

iiij. [Deinde erit finis. &c.] Hic quartum infert argumentum.

Nisi resurgant mortui, nec pater summus rex, nec Christus omnium Dominus haberi potest. Nec enim domita esset Satanæ & Mortis potestas, nec plena Dei in filio suo, & filij ipsius in suis membris gloria:

Sed ista omnia absurda: Ergo absurdum est dicere quod non sit resurrectio mortuorum.

v. [Alioqui quid faciant qui baptizantur. &c.] Quintum argumentum à fine baptismi.

Permuli quum iam de vita periclitātur, & pro mor-

I iiij.

tuis ob morbi magnitudinem habentur, baptismum sibi impendi postulant:

Sed abs re id facerent, si non haberent spem resurrectionis futuræ ac vitæ melioris:

Igitur confitendum est quod sit resurrectio mortuorum. vj. [Et cur nos periclitamur.&c.] Hic habes sextum argumentum à tolerantia periculorum.

Numquam sane pij tam fortiter ferrent extrema pericula, nisi fidem haberent certam de resurrectione mortuorum, & feliciorem post has erumnas conditionem.

Pios autem fortiter tolerare pericula, comprobat suo ipsius exemplo.

vij. [Edamus & bibamus.&c.] Septimum argumentum ab absurdo.

Si postquã maxima sustinimus pericula, non debemus resurrectionem & vitam meliorem sperare, tum meritò dicemus cum Epicuræis: Edamus & bibamus, cras enim morimur:

Sed nemo nescit impium esse ita sentire & loqui:

Igitur impium quoque est opinari, mortuos non resurrecturos.

Tandem annectit pauca ad deterrendos omnes, ne eiusmodi sermonibus impiorum aurem præbeant, ratione addita ex eleganti sententia Menandri Comici, simulque tractationis primi capitis conclusionem infert.

[At dicet aliquis.&c.] Hic incipit secundi membri tractatio. Summa rei seu propositio, per interrogationem proponitur his verbis: quomodo suscitantur mortui? quali autem corpore prodeunt?

[Demens quod tu.&c.] Primum argumentum de modo resurrectionis, ubi corporum resurgentium dignitas astringitur.

i Quemadmodum granum sue semen quod proijcitur in terram, planè ibi computrescit: & emoritur, postea tamen prodit ex eo sic putrefacto speciosa herba seu planta: ita corpora hominum, quamvis per mortem absu-

absumantur, & computrescant, postea tamen pristinam formam atque eam digniorem recipiunt.

II [Et quod seminas.&c.]

Secundum argumentum à simili ubi corporum cadentium vilitas, & resurgentium dignitas attingitur, & specierum in resurrectione distinctio annotatur.

Quemadmodum cum seminas tu nihil aliud proijcis in terram quam exiguum & vile granum, postea verò erumpit excellens planta, & hæc eiusdem speciei cuius antea fuerant plantæ, quarum iactum est semen: Ita corpus nostrum vile & abiectum sepelitur, corrumpiturque, postea verò erumpit nobile corpus, idque eiusdem planè speciei siue substantiæ, cuius & prius corpus fuerat.

III [Sed Deus ei dat.&c.] Tertium argumentum à pari.

Si Deus pro suo arbitrio & potentia dat unicuique semini corpus conueniens: Perèque facile est ei resuscitare mortuorum corpora & excellentiora reddere.

IIII [Non omnis caro.&c.] Quartum argumentum de diuersis qualitatibus corporum cadentium & resurgentium ubi triplex attingitur similitudo.

I Omnis caro est caro, quod ad substantiã attinet: sed si spectemus qualitates, alia ab alia distinguitur.

Sic etiam corpora nunc viuentium, & olim resurgentium, sunt corpora & caro eadem: Verum qualitates tunc in illis aliæ erunt quam nunc sunt.

2 [Et sunt corpora cœlestia, &c.] Secunda similitudo.

Vt aliæ sunt corporum cœlestium qualitates, aliæ terrestrium:

Sic etiam aliæ sunt viuentium, aliæ resurgentium:

3 [Alia, gloria solis.&c.] Tertia similitudo.

Sol, Luna, Stellæ, eadem sunt substantia, verum qualitatibus differunt: Ita corporum quæ circumferimus, & eorum quæ erunt à resurrectione aliæ atque aliæ sunt qualitates.

Tandem has qualitates nouas infert, & antiquis opponit: Corruptionem, Incorruptibilitati: Ignominiam, Gloriæ: Infirmitatem, Potentiæ: Esse animale, & Esse spirituale.

Deinde quum docuisset aliquod esse corpus animale Adamum nimirum & eius progeniem, & aliquod spirituale Christum uidelicet & qui in eum credunt: rationes addit, cur Deus ab initio non dederit corpus spirituale. Ducitur autem ab ordine temporis: primus homo de terra terrenus: secundus homo ipse Dominus est cælo. Qualis terrenus ille, tales & hi qui terreni sunt: Et qualis ille cælestis, tales & hi qui cælestes sunt. Et quemadmodum gestauimus imaginem terreni, ita gestabimus & imaginem cælestis.

[Hoc autem dico. &c.] A qualitate corporum in hac vita docet corpora mutari oportere. Bona quæ post hanc vitam pijs dabuntur, sunt spiritualia, incorruptibilia & æterna: Ergo oportet corpora nostra animalia ut illis fruamur, similiter spiritualia, incorruptibilia & æterna fieri.

Sed ne quis diceret, si corpus animale non est idoneum ad obtinendam gloriam, quid de ijs statueretur, qui quum Dominus uenerit adhuc erunt in uiuis? Statim per præoccupationem respondet: [Ecce mysterium. &c.] & Omnes mutabimur. &c. Attexuntur rationes cur ita fieri necesse est.

1 [Oportet enim. &c.] prima ratio:

Terrena non erunt capacia: spiritualium bonorum: Ergo oportet ut sint spiritualia.

2 [Cum autem hoc. &c.] Secunda ratio:

Oportet Scripturas impleri, quæ dicunt, Absorpta est mors. &c. atque hoc fieri non potest nisi mutentur corpora: Ergo mutari oportet.

3 [Stimulus uero mortis est peccatum. &c.] Tertia ratio:

A resurrectione mortuorum, neque peccatum, neque

que mors, neque infernus, amplius aduersus homines præualebunt:

Sed hoc fieri non potest, nisi terrena facta fuerint spiritualia: Ergo necesse est eiusmodi mutationem in omnibus corporibus fieri.

Tandem amplifieat liberationem à morte, à causa efficiente videlicet Christo, & breuem conclusionem totius disputationis infert. Itaque mei fratres. &c.

Hic habes, Christiane Lector, inuentionis Topicę & iudicij triplicis diuinum exemplum. Omnia necessariò omninòq; vera: Omnia homogenia & cognata. Omnia prima & propria. Generalia præcedunt, specialia sequuntur. Nihil ambiguum aut falsum: nihil heterogenium, aut extra propositum: Nulla hinc tantologia & inanis garrulitas: nihil denique quod non sit omnibus ecclesiæ ministris amplectendum & imitandum.

*Illustratio methodi in naturali Philosophia,
Mathematica, & Medicina.*

ARISTOTELES res naturales expositur², ab ipsis rerum principijs statim orditur: De quibus tãquam generalissimis agit libris Phisicorũ. Ex principijs oriuntur corpora: quorum alia sunt simplicia, cælum & quatuor elementa: alia composita ex ipsis elementis. De cælo agit duobus prioribus de cælo libris: in principio tertij fit transitio ad quatuor elementa. De compositis disputaturus generalia primo loco ponit. Nam quod omnia composita sint genita & corrumpantur: de ortu rerum & interitu disputationem instituit: Compositorum alia sunt imperfectè mista, alia perfectè. De imperfectè mistis agit libris Meteorum, & ijs qui metallorum naturas nobis complectuntur. Perfectè mistorum alia sunt animata, alia inanimata. Quæ animatis communia sunt primo tractantur: Hinc disputatio de anima, & eius facultatibus libris de animo. Animatorum, alia

sunt animalia, alia plantæ: de illis agit ijs quos de animalium historijs inscripsit: de generatione animalium: de partibus animalium: de motibus: de somno: de vigilia, &c. De hisce agit libris de stirpibus & de plantis, singula definitionibus, diuisionibus & transitionibus illustrando, & inuentionis Topicæ vi, atque iudicij sapientia demonstrando.

Omnis quoque scientia Mathematica hanc naturalem sequitur methodum. Quæcunque enim ea sit, vel versatur in principiorum explicatione, quæ sine vlla demonstratione recipit: vel in doctrina propositionum earum, quæ ex ipsis demanant principijs, & per ea demonstrantur, Generalia præcedunt, specialia sequuntur.

Nam principia ipsa, quæ per se manifesta & simplicia sunt, nulla adhibita demonstratione primò explicantur loco: subsequuntur propositiones demonstratione indigentes, & ex ipsis demanantes principijs. Principia definitionibus & diuisionibus illustrantur: ad propositiones declarandas omnes modos omniæque genera syllogismorum adhibent. Medici denique (ne in re tam manifesta tempus teram) primùm medicinam definiunt: deinde in quinque membra partiuntur. Membra singula eorumque membrorum particulas minimas definitionibus, diuisionibus cæterisque Topicis prout methodi ratio postulat persequuntur, & transitionum vinculis membra cum membris copulant atque connectunt.

Illustratio methodi in iure Ciuili.

Methodus Instituitur. Imp.

IUSTINIANVS primùm quid sit ius definit. Est autem ius inquit, ars æqui & boni. Deinde in priuatum & publicum diuidit. Priuatum definit quod ad singulorum vtilitatem pertinet: & statim in naturale, gentium & ciuile diuidit. Naturale & gentium suis definitionibus persequitur: tandem ad ciuile accedit. Definitio præcedit: sequitur partitio, in scriptum & non scriptum.

Iuris

Iuris deinde scripti partes enumerat sex, Legem, Plebiscitum, Senatusconsultum, Principum placita, Magistratum ædicta & Responsa prudentum: quas partes & earum partium particulas recta serie definitionibus illustrat, & quomodo inter se conueniant, & quomodo discrepent ostendit. Hæc est illa levis & simplex via quam tantopere commendat Iustinianus. Deinde cum singula diligentissima atque exactissima interpretatione tradere aggreditur, eadem methodo atque ordinis serie in illis vitur qua prius. Primum enim iuris data definitione partitio à subiectis sequitur. Omne, inquit, ius quo utimur, vel ad personas pertinet, vel ad res, vel ad actiones, Personarum tractatio præcedit, definitionibus & diuisionibus illustrata: in principio secundi libri fit transitio ad secundum membrum. Superiori, inquit, libro de iure personarum exposuimus: modo videamus de rebus. De rerum diuisionibus ipsæque quæ ad res pertinent in Tit. sextum libri quarti extenditur disputatio. Ibi transitio ad tertium membrum inuenitur, licet imperfectior quod careat epologo.

Superest, inquit, ut de Actionibus loquamur. Primum actionem definit, deinde diuidit, subdiuidit & exemplis atque legum usu illustrat. Hic vides Iustinianum non temerè, sed data opera hanc methodum obseruasse, quam leuem & simplicem viam vocat, quæ sine magno labore, sine vlla diffidentia ad id quod petimus nos perducit. Institut. lib. primo Tit. 1.

Sic Baldus in Commentarijs in lib. Iurium, ut vocant, Fœdal. Primò quid sit fœdum ostendit, deinde quam varium sit ius fœdale demonstrat, postremò quæ causæ, quæ effecta, quæ officia, quæ cognata, quæ pugnantia sint fœdorum declarat.

Sic Rochus Curtius insignis Iurisconsultus in Commentarijs super Rubricam de Consuetudine, quid sit consuetudo, quàm multiplex sit consuetudo docet: quæ officia singularum sunt consuetudinum indicat: quo pacto discrepet à ritu, moribus, &c.

CAP. XIX.

*De secunda methodi illustratione per exempla
poëtarum, oratorum, historicorum.*

Atqui methodus, non solum in materia artium & doctrinarum adhibetur, sed in omnibus rebus, quas facile & perspicue docere volumus, ideoque poëtae, oratores omnesque omnino scriptores quoties docendum sibi auditorem proponunt, hanc viam sequi volunt, quamvis non usquequaque ingrediantur atque insistant. Virgilius in Georgicis distribuit propositam materiam in quatuor partes, ut ante dixi: primoque libro res communes persequitur, ut Astrologiam, Meteorologiam, deque segetibus & earum cultu differit, quae pars operis prima erat, tumque transitio adhibetur initio secundi libri.

*Haecenus aruorum cultus & sydera caeli,
Nunc te Bacche canam: ---*

Deinceps scribit generaliter de arboribus, tum specialiter de vitibus. Transitio secunda adhibetur ad tertiam partem, sed imperfectior & sine epilogo. Tertij libri initio de bobus, equis, ouibus, capris, canibus.

*Te quoque magna Pales, & te memorade canemus
Pastor ab Amphryso. ---*

Tandem initio quarti libri transitio tertia est de quarta parte, sed item imperfecta est sola pro-

propositione de apibus:

Protinus aëri mellis syluestria dona.

Exequar. ---

Sic igitur poëta generalissimū primo, subalterna medio, specialissima extremo loco ponere studuit. Sic Ovidius in Fastis, dispositionis huius gratiam sequitur: proposuit initio summum operis:

Tempora cum caussis latium digesta per annū,

Lapsaque sub terras ortaque signa canam.

Mox imploratione facta, partitionem anni statuit, factam à Romulo primū in decem menses, quam reprehendit:

Tempora digereret cum conditor urbis, in anno

Constituit menses quinque bis esse suo.

Et paulò post Numæ diuisionem pleniorē adiungit:

At Numa nec Ianū nec anitas præterit umbras:

Mensibus antiquis præposuitque duos.

Denique poëta communes differentias interpretatus dici fasti, nefasti, comitalis, nundinalis, calendarum, nonarum, iduum, tum atri, tādē vnumquēque mensem suo loco prosequitur, & præfatione ordinis huius à generalibus ad specialia studium indicat:

Hac mihi dicta semel, totis hærentia fastis,

Ne seriem rerum scindere cogar, erunt.

Tandem singulis partibus expositis transitio coniungitur, ut in fine primi, & initio secundi:

Sed iam prima mei pars est exacta laboris,

Cumque suo finem mense libellus habet.

Ianus habet finem, cum carmine crescat & annus:

Alter ut it mensis, sic liber alter eat.

In singulis libris postea transitiones adhibentur, sed minus accuratè. Oratores in proœmio, narratione, confirmatione, peroratione hunc ordinem affectant, eumque artis & naturæ & rei ordinem appellant, & interdum studiosius affectantur, ut in accusatione Cicero primum proponendo, tum partiendo, Quæstor (inquit) Cn. Papyrio Cos. fuisti ab hinc annos quatuordecim, & ex illa die ad hanc diem quæ fecisti, in iudicium voco, hora nulla vacua furto, scelere, crudelitate, flagitio reperietur. Propositio hinc & definitio summæ rei est, tanquam in hoc iudicio generalissima. Partitio sequitur: Hi sunt anni consumpti in Quæstura & legatione Asiatica, & Prætura urbana, & Prætura Siciliensi: quare hæc eadem erit quadripartita distributio totius accusationis meæ. Quas partes quatuor earumque partium particulas: deinceps suo quamque ordine, & loco tractavit, & transitionibus copulavit, tres primas tertio libro: Quamobrem (ait) Quæstura istius demonstrata, primi que magistratus & furto & scelere perspecto, reliqua attendite. Tum verò expositis legationis

nis criminibus, transitio ad Præturam sequitur: Verum ad illam iam veniamus præclaram Præturam, criminâque ea, quæ notiora sunt his, qui adsunt, quam nobis, qui meditati ad dicendum paratiquē venimus. Transitiō hæc imperfectior est sine epilogo: tandem principio quartæ orationis transitio est consimilis ad quartam partē de Prætura Siciliensi: Multa mihi necessario, iudices, prætermittenda sunt, ut possim aliquo modo de ijs rebus, quæ meæ fidei commissæ sunt, dicere: recepi enim causam Siciliæ: ea me ad hoc negotium prouincia attraxit.

Sic Æschines, Demosthenes, Isocrates, cæterique atticæ eloquentiæ Principes hanc methodum laudant & in omnibus suis orationibus seruare conantur. Adversarias illas Æschinis & Demosthenis orationes in quarum compositione 20. annos consumpsisse feruntur exempli loco in medium adferam. Non enim dubium est quin in his maximam methodi rationem habuerint. Sed quænam ea est?

Conuincam Athenienses (ait Æschines) Cresiphōtem ea scripsisse, quæ & legibus pugnant, & à veritate abhorrent. Propositio hîc & definitio summæ rei est, tanquam in hoc iudicio generalissima. Huic annectitur transitio ad partitionem. Ac de vniuersa accusatione mediocriter me præfatum esse arbitror, &c. Partitio sequitur in 3. generalia capita:

Primum est, Demosthenem non esse coronandum, qui in magistratu esset: Secundum, non licere in theatro coronam proclamare: Tertium, non esse virum bonum Demosthenem nec corona dignum. Quas partes

tres earumque partium particulas deinceps suo quamque ordine, & loco tractat & transitionibus copulat, primam cum secunda his verbis: quo autem pacto quisquam demonstrare posset, hominem legibus magis contraria scripssisse? præterea iubere eum in suo decreto, etiam coronæ proclamationem contra leges fieri: id quoque vos docebo, quibus singulis ordine expositis, sequitur transitio ad tertium caput: Reliqua iam est mihi accusationis pars, quæ maximè mihi curæ est. Ea porro est causa, propter quam eum coronandum censeat. Sed me quidem accusatorem hinc vobis ostendere oportet, falsas esse laudes quæ Demostheni tribuuntur: eumque nec coepisse optima dicere, nec nunc constanter ea agere quæ sunt è re populi. Quod si demonstraro iure Ctesiphon condemnabitur. Sequitur partitio huius 3. Capitis in quatuor tempora. Quoniam, inquit, futurum audio ut Demosthenes ubi dicendi vices ad eum redirent, apud vos quatuor tempora enumeret, quibus apud vos Remp. gesserat: quorum unum, idque primum recenset, quo de Amphipoli cum Philippo gessimus bellum. Id autè tempus definit, facta pace & societate, quam Philocrates Hagnusius decreuit, & iste ipse cum eo, ut ego ostendam. Alterum fuisse tempus ait, quo pacem seruauimus: ad eum diem, quo iste ipse orator, pace qua fruebamur abrogata, bellum decreuit. Tertium, id tempus quo bellum gessimus, usque ad cladem Chæronensem. Quartum, hoc tempus quod nunc est. Ego eodem utar orationis ordine, quem istum instituisse audio, ut primum dicam de primo tempore, secundo loco de secundo, tertio de eo quod secutum est, & quarto de eo rerum statu qui nunc est. Itaque me ad pacem consero, deinde ubi singula primi temporis membra suo ordine atque loco tractauit, transitio ad secundum sequitur: Qua igitur ratione ad hanc rerum mutationem peruenit, nam hoc secundum tempus est, & quæ tandem causa sit, cur Philocrates, qui eadem gessit cum Demosthe-

mosthene, ob crimen lesæ maiestatis sit actus in exiliū,
 Demosthenes autem aliorum extitit accusator: & qua
 ratione homo iste nefarius nos in calamitates coniece-
 rit: hæc iam vel in primis est audire opere præcium.
 His singulis, vt ordinis series postulat, demonstratis, ad
 tertium tempus se accingit de bello secundo. Hic iam,
 inquit, tertium collocatum est tempus, vel potius om-
 nium acerbissima tempestas, qua Demosthenes Græ-
 corum res & vrbs nostræ perdidit: cum templo Del-
 phico violato, tum societate cum Thebanis iniusta, &
 nullo modo æqua, decreta. Auspicabor autē ab ijs quæ
 in Deos immortales commisit, Tandem ad quartum
 tempus transit: vt autem, inquit, de quarto etiam tem-
 pore, & ijs rebus quæ nunc sunt, aliquid dicam: illud
 vobis redigam in memoriam, quod Demosthenes non
 castrenses duntaxat ordines deseruit, sed etiam accepta
 vrbs nostræ triremi, à Græcis pecuniam exegit. In ora-
 tionis fine, quasi de hac methodo gloriaretur, eam his
 verbis repetit. Primum, inquit, leges protuli quæ ratio-
 nibus nondum relatis, quemquem coronari vetant: Se-
 cundo loco, vobis leges præconiorum recensui, in qui-
 bus aperte interdicitur ne is qui à populo coronatur,
 extrâ concionem proclametur. Tertiò id quod maxi-
 mum est, dixi eum non dignum esse præconio. Hic in
 Æschine nostro viuam quādam naturalis methodi ima-
 ginem habes. Demosthenes autem (ne in re tam ma-
 nifesta tempus teram) eundem prorsus ordinem seruat.
 Afferam ipsius Demosthenis verba, quæ statim post pro-
 positionem summæ rei posita sunt. Quæ igitur, inquit,
 in decreto accusat, Athenienses hæc sunt, Ego verò his
 ipsis declaratū vobis opinor, ne iustis rationibus omnia
 refutarum. Seruato enim eodem ordine quem iste in
 accusatione instituit, de omnibus deinceps sygillatim
 dicam, & volens nihil prætermittam. Primum tamen
 agit de tertiò membro, ne aduersario obsequi videretur
 qui in hoc plurimum laborauit, vt Demosthenes vel in-

uitus, eodem ordine respondere cogeretur, quo ipse accusauit. Sequitur transitio ad alterum membrum: reliquum, inquit, nunc esse mihi puto, vt de præconijs dicam, & rationibus referendis. Ad vltimam partem transitio sequitur. Iam verò quod ad præconium in Theatro attinet, sexcenties sexcentos esse proclamatos prætorio! & me sæpe ipsum prius esse corona donatum.

Sic Liuius summam septingentorum annorum initio complectitur, tum per decades diuidit.

C A P. X X.

De Crypticis methodi.

Hæc igitur in varijs axiomatis homogeneis suoque vel syllogismi iudicio notis methodus erit, quoties perspicue res docenda erit: At cum delectatione moriue aliquo maiore, in parte aliqua fallendus erit auditor, homogenea quædam reijciuntur, vt definitionum, partitionum, transitionumque lumina; quædam assumuntur heterogenea, velut digressiones à re & in re commorationes, sed præcipue rerum ordo initio inuertetur, antecedentiæque nonnullæ consequentibus postponentur. Itaque ad illâ perfectæ methodi regulam, hæc alicubi imperfectior forma nō solum deductis rebus mutila est vel superadditis redudat, sed ordinis sui quibusdam gradibus inuersis præpostera est. Quod Poëta facit maiore quadam artificij specie, dum populum ducendum

cendum sibi proponit, id est, belluam multorum capitum, ideoque varijs modis decipit: incipit à medio, ibique primū sæpè comprehendit, postremum denique incerto aliquo & inopinato casu concludit. Sic (vt Horatius ait) Homerus Iliada disposuit.

*Nec gemino bellum Troianum orditur ab ono:
Semper ad euentum festinat, & in medias res
Non secus ac notas auditorem rapit: & quæ
Desperat tractata nitescere posse, relinquit:
Atque ita mentitur, sic veris falsa remiscet,
Primo ne medium, medio ne discrepet inum.*

Sic Vir. Æneam à Silicia exceptit, & in conuiuio Carthaginis præterita narrantem fecit: postrema varijs perturbata casib. induxit. Sic comici poëtæ, tametsi magno iudicio comedias per actus & scenas distinguunt, efficiunt tamen vt omnia fortuita videantur. Oratores verò ad victoriam omnia referunt. Itaque nō tam docendi, quam permouendi gratia firmissimum quòdque primum ab ijs collocatur, dum tamen ea, quæ æquè excellent, seruentur etiam ad extremum, & HomERICA dispositione mediocritia in mediam turbam atq; in gregem conferantur.

FINIS.

REGIÆ MAIESTATIS Privilegio
cantum est, ne quis hanc P. RAMI Dia-
eeticam omnium scientiarum ac artiū exem-
plis illustratam, infra decennium imprimat, aut
alibi extra Angliæ regnum impressam dinendat,
præter illam quod Thomas Vautrollerius typo-
graphus Lōdinensis in clauſtro vulgo Blak-friers
commorans, suis typis excuderit.